


中華文史叢書之卅五
清、光緒廿四年刊本影印
王有立主編



據國立台灣大學
圖書館藏本影印

出使公牘

十卷

(全)

薛福成撰

台灣華文書局印行

此心

使體

光緒戊戌
孟夏開雕

公牘之體曰奏疏下告上之辭也曰咨文平等相告者也其雖平等而稍示不敢與抗者則曰咨呈曰劄文曰批答上行下之辭也其施之官稍下而非所屬者則曰照會曰書函上下平等皆可通行者也曰詳文曰稟牘皆以下官告其上官者也官在兩司上者可勿用大臣出使有洋文照會者蓋以此國使臣告彼國外部大臣之辭亦卽兩國相告之辭也執筆者宜審機勢晰情僞研條約諳公法得其竅則人爲我誦失其竅則我誦於人是非於此明利害於此形強弱於此分實握使事最要之綱領使事既有端緒然後述其梗概而奏之而咨

之劄之意有未達則再爲書以引伸之。胥是物也。故凡治出使公牘者。必以洋文照會爲兢兢。而諸體之公牘。皆由此生焉。電報雖爲昔日所無。邇來籌襄公務之機要。大半渾括於此。故亦當附公牘之列。余奉使海外。四閱寒暑。旣甄錄疏稟。都爲一集。復裒咨函劄批之稍關國計民生者。暨洋文照會及電報。釐存十卷。時自覽觀。以備考鏡焉。自我中國通使東西洋諸大邦。所以諮政俗聯邦交。保權利者。頗獲無形之益。然使職難稱之故。蓋由中國風氣初開。昔日達官。不曉外務。動爲西人所欺。西人狃於積習。輒以不敢施之西洋諸國者。施之中

國爲使臣者遂不能不與之爭爭之稍緩彼必漠視而
不理其病中於畏事爭之過亢彼必借端以相尤其迹
疑於生事邇來當事願生事者較少而習畏事者較多
故失之剛者常少而失之柔者常多余生性戇拙凡遇
交涉大事輒喜斷斷爭辯爭之之具必以洋文照會爲
嚆矢有時用力過銳彼或怒而停議然未嘗不徐自轉
圜未嘗不稍就我範圍蓋我雖執彼所不願聞之言而
其理正其事覈其氣平出以忠信之懷將以誠懇之意
知彼之不能難我也然後斷然用之以難彼而勿疑其
端倪可見於文牘者亦僅十之四五而已久之彼且積

感而釋疑轉嫌而爲敬欺者不敢復欺爭者可漸息爭
矣顧欲與爭辯則平日之聯絡布置尤不可不慎譬之
關弓者必和其幹調其絲引矢一發毅力雖勁不至弧
折弦絕者審固於先事也洋文照會皆余授意譯者所
擬然後再譯爲華文中西文法截然不同頗有詰屈聱
牙之嫌余恐汨其真也未敢驟加刪潤後之覽者亦會
其意焉可耳光緒十九年冬十月無錫薛福成自序於
英倫使館

凡例

一是書凡七類分爲十卷。咨文二卷。書函四卷。照會。咨文批答一卷。洋文照會二卷。電報一卷。各類皆以歲月先後爲次第。

一凡一事而並咨總理各國事務衙門暨南北洋大臣者。祇於起結處有一二不同之字句。則於所敘彙中。雙行夾寫。以免另敘。此係各衙門辦理公牘通例。今仍照原彙刊刻。以存格式。

一中西文法截然不同。洋文照會。本用西洋文理。一經譯爲華文。已難盡依其舊。數人譯之。往往意同而語

不盡同。輒爲斟酌字句。以暢譯者之意。然讀之仍覺艱澁詰屈。微有聱牙意象。此則洋文通病也。今不復加刪潤。庶免汨其本真。

一四國中惟英國交涉最繁。且多緊要事件。法國次之。義比二國雖有往來照會。不過循例公牘而已。

一中國通行電報。不過在此十年之內。而籌襄公務之機要。多在其中。前纂浙東籌防錄。始刊電報。將來足備公牘之一體。茲復集電報一卷。附於各項公牘之後。

一咨文書函照會照公牘格式。原擡之處。皆空一格。凡

應擡字樣無論單擡雙擡三擡皆作平擡以歸簡易而示區別

一凡打電均用號碼故遇應擡之字皆不擡稱名處亦不側寫茲悉仍其舊以存電報格式

日修五篇
下修

7

出使公牘目錄

卷一

咨文

咨總理衙門

與英外部申明滇緬界務舊議

咨總理衙門

與英外部商辦添設領事

咨總理衙門

送摘譯英法兩國新聞紙

咨總理衙門

英外部審量添設領事

咨總理衙門並

北洋大臣李

送編輯中西權度

比較表

咨總理衙門並北洋大臣李

英外部答允添設

各屬部領事

咨總理衙門 酌議添設領事經費及籌辦事宜

咨總理衙門 飭直隸候補知府姚文棟順道查

訪緬境情形

咨總理衙門 補錄告英外部擬派領事姓名

咨總理衙門 請英員保護智利厄瓜多流寓華

民

咨總理衙門並北洋大臣李 義國交還中華書

院產業器具

咨總理衙門並北洋大臣李 與英外部議駁新

金山葛龍巴限制華民

咨總理衙門並

南北洋大臣李劉

與英外部商禁香

港出口軍火

咨總理衙門

英員允許保護厄瓜多流寓華民

咨總理衙門

送出使英法義比四國日記

咨總理衙門

與法外部議除越南等處華民身

稅

咨總理衙門並

南北洋大臣李劉

與英外部議會立

坎巨提新酋

咨總理衙門

摘錄曾前大臣滇緬界務舊卷

咨總理衙門 與英外部催問緬甸入貢年月

卷二

咨文

咨總理衙門並

北洋大臣李雲貴總督王

與英外部理論英

兵進占漢董地方

咨總理衙門並

北洋大臣李劉

與英外部追論英

人梅生勾通會匪讞案

咨總理衙門

派員前赴比國考核罪犯會

咨總理衙門

與英外部開議滇緬界務

咨總理衙門並

北洋大臣李雲貴總督王

與英外部聲明請

英撤兵還地

咨總理衙門並

北洋大臣李雲貴總督王

與英外部催請英

兵退出昔董地方

咨總理衙門並北洋大臣李

與英外部請刪除

加那大苛待華民新例

咨總理衙門並北洋大臣李

巴西國請照約遣

使駐京

咨總理衙門並

北洋大臣李雲貴總督王

與英外部辨論野

人山地

咨總理衙門並北洋大臣李

鈔送直隸候補道

姚文棟稟陳滇邊及緬甸情形

咨總理衙門 遵 旨致謝英君主送呈自製

書集

咨總理衙門 並

北洋大臣李雲貴總督王

與英外部詰問侵

擾滇邊

咨總理衙門

派設檳榔嶼副領事

咨總理衙門 並

北洋大臣李雲貴總督王

送科干地圖

咨總理衙門 並北洋大臣李

雲貴總督王兩廣

法外

部鈔送暫往越南華民免稅兩月新章

咨總理衙門 並

北洋大臣李雲貴總督王

滇邊展界並請查

勘漢龍關地方

咨總理衙門並北洋大臣

李劉

雲貴總督王

與英

外部續催緬甸進貢

咨總理衙門並

北洋大臣李雲貴總督王

收回車里孟連兩

土司全權

咨總理衙門並北洋大臣李

與法外部再論越

南流寓華民身稅

咨總理衙門並北洋大臣李

鈔送加那大新議

華民入口例章

咨總理衙門並北洋大臣李

與法外部詢問法

遲起釁情形

咨北洋大臣 順直水災捐廉助賑

咨總理衙門 與英外部議保護暹羅並甌脫之

地

咨總理衙門並北洋大臣李雲貴總督王與英外部理論英

兵焚燒虎踞關野寨

咨總理衙門並雲貴總督王 鈔送英外部請展

緩緬甸進貢年限

咨總理衙門並雲貴總督王 收回英員新築天

馬關大路

咨總理衙門 進呈新訂滇緬條約

咨總理衙門並

北洋大臣李
雲貴總督王

送譯印野人山新

圖

卷三

書函 致總理衙門總辦

論接見外國使臣書

庚寅

論英使華爾身議華民入英籍書

論英派員駐喀什噶爾及商設香港領事書

論中外辦事情形書

論添設香港領事及英派員駐喀什噶爾書

論藏印通商事宜書

論添設南洋領事書

論添設南洋領事經費書

再論添設香港領事及英派員駐喀什噶爾書

三論添設香港領事及英派員駐喀什噶爾書

論大東大北電報兩公司訂立合同書

再論電報兩公司訂立合同書

論與英爭坎巨提事及滇緬界務書

論英兵入坎巨提意在謀帕米爾書

論爭回坎巨提兩屬體制書

論駐京各使 覲見書

論商立坎巨提新酋書

論滇緬界務書

論會立坎巨提新酋書

四論添設香港領事及英派員駐喀什噶爾書辛卯

論英員駐喀什俄書

論辦理教案書

卷四

書函 致總理衙門總辦

論英兵焚殺野人山寨書

論長江教案書

論外國領事宜由中國給予准照書

論帕米爾情形書

再論長江教案書

論分派兵輪保護長江口岸書

論仰江及加里吉打埠宜設領事書

再論滇緬界務書

壬辰

再論帕米爾情形書

論英國禁煙會始末書

卷五

書函 致總理衙門總辦

論與英國爭梅生罪案並八募設關書

論阿富汗侵擾蘇滿卡倫書

論阿酋擾卡及梅生罪案滇緬界務書

三論滇緬界務書

論漢口英領事帶兵船赴湖南書

論辦理教案善後章程書

論豁除海禁招徠華民書

四論滇緬界務書

論巴西招工事宜書

五論滇緬界務書

卷六

書函 致總理衙門總辦

六論滇緬界務書 癸巳

再論阿富汗侵擾蘇滿卡倫書

七論滇緬界務及帕米爾事書

論坎巨提照舊進貢書

論與法國聲明瀾滄江外滇屬土司書

八論滇緬界務及辭行 國書書

論法使李梅覬佔車里土司書

九論滇緬界務書

論英法兩國議將車里南界外甌脫之地讓歸中

國書

十論滇緬界務書

呈送滇緬條約並論小帕米爾及車里甌脫之地

書
甲午

論熱河法國教堂賠款書

卷七

照會
劄文
批答

照會江南製造局總辦彙送譯刻西學書籍

劄繙譯學生寫呈日記

劄駐法參贊官陳季同合算中西權度表

劄新嘉坡領事官左秉隆籌設義塾章程

劄直隸候補知府姚文棟順道查訪滇邊及緬境

情形

劄仰光紳董林作秉襄辦就地義舉公會並文報

劄新嘉坡總領事官黃遵憲給發英君主準勅

劄新嘉坡總領事官黃遵憲給發英君主準勅

繙譯官那三

劄新嘉坡總領事官黃遵憲設法嚴查華商船隻

販私結會

劄委檳榔嶼紳商候選知府張振勳充當副領事

官

新嘉坡領事官左秉隆稟查各島華民情形由

直隸候補知府姚文棟呈報設立仰光文報由

姚文棟稟請仰光商董著有勞績援案請獎由

姚文棟稟寓居印度華商擬請 奏頒廟額由

印度華商黃琨 熊昭盛等稟請設立加里吉打領事由

越南華商林蕙軒等稟控梁雲峰盜賣農山煤礦

由

廣東惠潮嘉道曾紀渠稟陳辦理南洋各島情形

由

新嘉坡總領事官黃遵憲出巡各島情形由

卷八

洋文照會

與英外部商設英屬各埠領事

與英法外部請給姚文棟游歷印度緬甸越南等

處護照

與英外部阻止駐緬英員率兵私越滇邊土司

與義外部請交還中華書院產業

與英外部駁除新金山葛龍巴兩處限制華民新

例

與英外部請代爲保護智利厄瓜多兩國流寓華

民

與英外部請重定英犯梅生罪名

與英外部轉飭駐緬英員撤兵退出漢董地方

與英外部請禁香港軍火出口展期

與英外部請阻止英兵過野人山境

與法外部議裁越南等處華民身稅

與英外部預擬滇緬劃界事宜

與英外部解明會立坎巨提酋之事

與法外部催請裁去寓越華民身稅

與英外部三論英犯梅生罪名

與英外部理論緬甸入貢事宜

與英法義比外部鈔送借用洋債奏案

與英外部議定會立坎巨提酋體制

與比外部派員赴考核罪犯會

卷九

洋文照會

與英外部再論英犯梅生罪名

與英外部告知奉

旨商辦滇緬界務

與英外部催請商議劃清野人山地及滇緬界務
與英外部派參贊官馬格理與英員會議滇緬界
務

與英外部請退昔董英兵並索問厄勒瓦諦江上
段之地

與英外部請增修管理在華英民條例

與英外部添設檳榔嶼副領事

與英外部請刪除加那大苛待華民新例

與巴西駐法公使允准照約遣使

與英外部續催會議滇緬界務

與英外部三催會議界務並聲明失望情形

與英外部遵

旨致謝英君主送呈自製書集

與英外部聲明開欽野人並厄勒瓦諦江上游應

屬中國

與英外部聲明管理江洪孟連及新設鎮邊廳權

勢

與法外部申論刪除寓越華民身稅有益無損

與英外部條擬展界讓地辦法

與英外部續擬展界讓地辦法

與英外部轉催坎巨提進貢沙金

與英外部願收受緬越甌脫之地並保護暹羅

與英外部再催緬甸進貢

與英外部暫緩緬甸進貢一年

與英外部問照約定期收回新築大路

與英法義比外部告知

皇太后萬壽慶典

與英法外部告知呈遞辭行 國書

卷十

電報

遞總理衙門

錄七十三通

遞北洋大臣李

錄二十二通

遞南洋大臣劉

錄四通

遞兩湖總督張

錄一通

遞雲貴總督王

錄一通

遞蘇松太道聶

錄七通

遞喀什噶爾道李

錄一通

遞森彼得堡使署大臣許

錄二通

遞柏林使署大臣許

錄七通

遞倫敦使署張

錄二通

遞巴黎使署慶

錄一通

遞新嘉坡總領事黃

錄一通

出使公牘(全)

遞入募委員 彭繼志 葉樹勳 錄一通

出使公牘 目錄

三傳經樓校本

上修之期

目録

三

出使公牘卷之一

無錫薛福成叔耘

咨文

咨總理衙門 與英外部申明滇緬界務舊議

爲咨呈事竊照接管卷內光緒十二年六月中英所定緬甸條約內第三條稱中緬邊界應由中英兩國派員會同勘定其邊界通商事宜應另立專章等語在案本大臣近聞英國派員辦理緬甸暹羅邊界之事復閱新聞紙知英商有由緬甸創造鐵路直達滇境之說因查舊案前大臣曾任內互商緬甸各事除業經改議各

節毋庸申述。外當時英文參贊官馬格理與外部侍郎克蕾迭次商論。據克蕾稱英廷願將潞江以東之地。自雲南邊界之外起。南抵暹羅北界。西濱潞江。卽薩爾溫江東抵湄江左右。其中北有南掌國。南有撣人。各種咸歸中國。或留爲屬國。或收爲屬地。悉聽中國之便等語。查此節雖未明載約內。而此事商議具有節略存案。可援爲實據。卽約中第三條。亦卽包括此意。現聞英廷正辦暹緬界務。若彼果開鐵路。直通滇境。似欲將前議所分之地。括而有之。因遣馬格理往外部詢問。旋准外部來文。聲稱俟暹緬交界事辦畢。然後再辦滇緬交界事。

宜本大臣因辦照復申明舊議微逗其端以見中國之意並非置之不論本大臣亦未知該地情形何如中國收受有無利益但彼國方辦界務自不得不重爲引述以爲他時派員勘界會議之根所有緬甸界務與外部往來文牘譯漢咨呈 貴衙門謹請查照辦理須至咨呈者

計黏鈔二件

光緒十六年八月二十五日

咨總理衙門 與英外部商辦添設領事

爲咨呈事。竊照光緒十六年七月初十日承准 貴衙
門文開准 北洋大臣咨開據北洋海軍提督丁汝昌
文稱南洋各島華人巨萬。惟新嘉坡已設有領事。交涉
懋遷。尙稱安謐。其未設領事各島。曰檳榔嶼。曰麻六甲。
曰柔佛。曰芙蓉。曰石蘭莪。曰白蠟。該處商民無不受其
欺凌剝削。環訴哀求。實不忍視。新嘉坡領事旣無兼管
各埠明文。亦無遙制各島權勢。擬請新嘉坡改爲總領
事。其餘隨地設立副領事一員。卽以該處公正殷商攝
之。統轄於新嘉坡之總領事。至應設副領事幾處。每年

經費若干。應由總領事查明樽節稟辦。惟總領事每年巡歷各小埠。應增公費。以爲各項川資。俾示體恤。咨請核辦等因。本衙門查外洋各屬境添設領事。均須先與該國外部商定。核給准照。方能次第籌議。應摘敘原文咨行。試與英國外部商議。如能辦到。實於華民有益。並將商辦情形咨復等因。承准此。本大臣查中英條約。未有設立領事明文。是以前任大臣於新嘉坡初設領事。及續派領事時。與英外部文牘往來辯論。殊費周折。誠如貴衙門文開。須先與該國商定。方能籌議。惟本大臣查英屬各島。華民流寓者極多。而香港一島。附近粵

東尤爲中外往來咽喉。凡華洋各商貨物均先至香港。然後轉運各省。而交涉事務。一曰逃犯。一曰走私。一曰海界繁難叢雜。每出巨案。粵省遇事輒派員至港。而聲氣不通。往往緩不及事。所以該處添設領事。實爲刻不容緩之圖。查閱案卷。在前任大臣曾任內。迭次照會英外部。請於該處設一領事。迄未就緒。至澳大利亞一島。現有限禁華工一事。亦關係緊要。而英國政府於此二處。頗有不欲輕許之意。本大臣以爲設立一處。始商議一處。枝枝節節。徒費唇舌。未見大效。因遣英文參贊官馬格理到外部。先述大意。援照公法。作籠統之辭。祇言

中國欲設領事於英屬各地。不言設於何地。該外部似
尙無峻拒之意。旋即將此意辦文照會。如果外部允辦。
將來某處應設某處緩辦。其操縱之權。似仍在我。本大
臣又查泰西各國所設領事一官。徧於地球。所以保護
人民。疏通商務。蓋枝葉盛則本根固。聲息捷則國勢張。
關繫綦重。卽英國在中國領事。既有二十餘員之多。而
南洋各島。華民流寓者有數百萬。其爲中外門戶。固不
待言。中國從前未甚措意。而近年中外往來交涉日繁。
風氣大開。若謂徧設領事。卽已握長駕遠馭之規。或稱
就地可籌鉅費。或冀收彼華民爲我所用。此皆閱歷未

深之語其事亦斷辦不到。然嘗盱衡全局實有不能不擇要籌措者。卽就英屬各島而論。如能添設領事數員。每歲不過多費數萬金。已隱收無形之益。其效當有十倍於所費者。且商民人等環訴迭求。若置之不顧。頗足以長華民觖望之心。招外人輕侮之議。丁提督所陳均係實在情形。惟檳榔嶼等六處勢不能徧設領事。卽公正殷商亦難多得。或酌量添設而改新嘉坡領事爲總領事。以兼轄之。或將各島統歸新嘉坡領事管轄。令總領事以時巡歷諸島。以通民情而保商務。似尙皆切近可行。除札飭新嘉坡領事左秉隆將各該島情形詳查

具覆外仍俟外部復文到日再行商辦相應將照會外部洋文譯漢咨呈 貴衙門謹請查照須至咨呈者
計鈔單一件

光緒十六年八月二十五日

咨總理衙門 送摘譯英法兩國新聞紙

爲咨呈事。竊照奉使一職。辦理交涉以外。自以覘國勢。審敵情。爲要義。而耳目所寄。不能不借助於新聞紙。查泰西各國新聞紙。主持公議。探究輿情。爲遐邇所依據。其主筆之人。多有曾膺顯職者。若英國泰晤士報。聲望最重。與各國政府消息常通。其所論著。往往可徵其效。於旬月數年之後。雖其中採訪不實。好惡徇情。事所恆有。固不可盡據爲典要。存刻舟求劍之心。亦不宜概斥爲無稽。蹈因噎廢食之弊。本大臣到任以來。每飭令繙譯員生。摘譯新聞之稍有關係者。隨時查閱。以備參考。

茲再刪輯各條自四月至六七月間英法兩國新聞紙
各繕一帙相應咨呈 貴衙門謹請查照須至咨呈者
光緒十六年九月初四日

咨總理衙門 英外部審量添設領事

爲咨呈事。竊照南洋各島擬添設領事一案。承准 貴
衙門來文。與英外部商辦。經照會外部。鈔稟咨呈 貴
衙門在案。茲准外部覆稱。英廷現已審量此事。容後再
覆等語。本大臣復遣英文參贊馬格理。往詢外部侍郎
山特生。據稱來文已交尙書侯爵沙力斯伯里閱過。仍
須侍郎克蕾復勘。伊等之意。以爲可以照行。但必須商
之藩部及印度部。方能定議。惟印度部若再商之印度
總督。非兩三月後。不能得有回音。窺其用意。似亦知勢
難拒卻。又不欲遽爾允許。故稍用支展之法耳。除俟續

得復文再行咨呈外相應將外部復文先行譯漢咨呈
貴衙門謹請查核須至咨呈者

計黏鈔一件

光緒十六年九月初七日

咨總理衙門並北洋大臣送編輯中西權度

比較表

爲咨呈事竊照本大臣承准總理衙門咨開准海軍

衙門咨嗣後遇有購買外洋船礮等項務將外洋尺碼

磅數核出中國觔重尺寸數目等因嗣又承准貴北洋

大臣咨開據北洋沿海水陸營務處劉道詳稱奉札准

海軍衙門咨購買船礮務將外洋尺碼磅數核出中國

觔重尺寸數目擬請咨會出使英法德美各大臣會同

將此數國尺寸與中國營造尺比例各國啟羅噸磅觔

重與中國漕砵秤比例然後咨會海軍衙門通行各省

上 何 公 片 一
以歸劃一。除批示并分咨外。咨請查照核復等因。承准此。本大臣查西國權度。悉由官造。頒之民間。各有定則。毫釐不爽。今欲將中西各項輕重長短數目。兩相比較。必先以中國尺寸爲根。而中國各省。隨地隨事。各殊其用。西人著書。謂中國各尺。與英幅地相校。積至一百尺。極長者當十五因制。又千分之七百六十九。極短者當九因制。又百分之九十二。懸絕如此。則欲求有據。又必以工部營造尺。漕砧秤爲根。近人李善蘭遵數理精蘊。每度二百里。每里一千六百餘尺之數。用西法密率推赤道周徑。以三百六十度約之。定爲每一英尺。當中國

尺九寸八分五釐七毫七絲其說甚精然虛有其名並無其器言其理則可施諸用則不可也而鄒伯奇遺書則謂每一英尺當工部營造尺九寸七分照會典圖式則又每一英尺當工部營造尺九寸一分一釐二毫此皆按圖操器校量而得尙且歧異如此蓋會典圖因板之燥溼而殊形卽銅尺亦因時之寒熱而異度故也本大臣曾用中國工部營造尺漕砧碼將英之權度仔細比較以爲可期精密然仍復參差不符因念條約所載尺寸係本之粵海關粵海關本之工部通商之始準此通行頒之稅關雖所謂八五一之數比之李鄒各家差

有贏餘意必粵關沿用稍拓其制以便徵取然既已據此推算卽爲今日中外通用之尺不可得而改也卽令持籌布算至精極密然苟與此殊卽不堪施用故用以比較西尺必以海關尺爲準海關尺在外洋一時難得祇能以條約所算之尺爲準今輒據此尺布算其筋兩輕重亦准此法編爲三表先以中國之整數比英法意各國之散數爲第一表再以英國之整數比法意各國及中國之散數爲第二表再以法意各國之整數比中國英國之散數爲第三表今已編就備文咨請 貴衙門察核抑本大臣以爲核準權衡度量亦一最要之事

將來頒行各省應據以爲準繩擬請 貴衙門咨商北

洋大臣理衙門會同札飭總稅務司經理蓋通行權度海關既

有定式各國制度關吏亦所熟諳而明算術精繪圖者

亦有其人匯歸一處比之英德美各使署各出已意體

例不一者自當遠勝編排既就即可由海關用精紙刊

印頒發各處自可以免歧誤而歸劃一除分咨外相應

咨呈 貴衙門謹請查照辦理施行茲並購得英文各

國度量權衡算法一本附呈貴衙門總理衙門可否飭交同文

館學生繙譯漢文再上海機器局所譯藝器記珠一種

亦甚詳明似可檄取以資考證須至咨呈者

上傳經樓校本咨文

計鈔中西權度比較表三紙

光緒十六年九月二十一日

咨總理衙門並北洋大臣李 英外部答允添設

各屬部領事

爲咨呈事竊照提督丁汝昌建議增設南洋各島領事

一案承准

貴衙門總理衙門

咨令與外部商議如能辦到實

於華民有裨等因當經照會英國外部並鈔稟咨呈

貴衙門總理衙門

在案茲准外部復稱英廷願給中國領事文

憑與外洋各友邦領事一樣辦理但刻下或有不能照

給者須由英廷察看定奪等語查中國於外洋設立領

事條約未有明文以故各國每多阻撓卽如英國在新

嘉坡初設領事時亦頗費唇舌茲經本大臣請其按照

各國通例辦理而英廷乃慨然允許未始非藉表友睦之意是以本大臣復備文申謝雖外部照會仍稱審量地方情形刻下或有不能照給文憑之處但中國之意亦係擇要而行並非欲一律添設本大臣現擬於香港設一領事而新嘉坡改爲總領事兼轄檳榔嶼麻六甲並附近新嘉坡歸英保護各小國將來或於各該地選擇商董充副領事統計增添經費亦似無多除俟與外部聲明應設地方再行酌定員數籌定費用咨商

貴總

衙門

開辦外相應將往來照會各一件譯漢咨呈

貴衙門

謹請察照辦理須至咨呈者

貴大臣

計鈔外部照會一件
照復外部一件

光緒十六年十一月初一日

出吏公賣
卷一 咨文

三 傳經樓校本

上卷

卷一

三

咨總理衙門 酌議添設領事經費及籌辦事宜

爲咨呈事竊照新嘉坡領事改爲總領事官暨香港添設正領事官業經本大臣具摺奏明揀員充補鈔稟咨呈 貴衙門在案本大臣查新嘉坡總領事現轄各島暨流寓華民較從前加數倍之地廣事繁深慮鞭長莫及計丁軍門原文所敘曰檳榔嶼曰麻六甲曰芙蓉曰白蠟曰石蘭莪曰柔佛應添設領事者已有六處但規模過鉅殊恐所費不貲不能不籌變通之法現擬令總領事選擇各該處殷實公正之華紳畀以副領事名目小事由其經理大事仍待總領事核辦該紳旣各有

本業。但須月給薪水百金。足資津貼。如未得其人。任闕毋濫。儻總領事力可兼顧者。亦卽不必徧設。約畧計算。添設副領事之地。暫以四處爲衡。至總領事銜秩稍崇。雖暫不照總領事之例支領薪俸。亦應與正領事酌示區別。擬定月支薪俸四百三十兩。惟其所轄華民倍多。事務較繁。原設隨員一人。難敷照料。現擬派英館三等繙譯官那三。隨往襄助。該員向係月支薪俸一百六十金。此項日後須在新嘉坡支領。卽應劃撥在新嘉坡經費之內。而英館三等繙譯一員。尙須另調。又擬添供事一人。每月薪俸三十六兩。其原額隨員一人。則仍其舊。

尙有出赴各島巡護華民之費亦須覈實開報現擬六處每歲各往巡二次綜計歲費不得過六百金不出則不開支以上辦法除新嘉坡領事向支歲費七千餘金照舊在歲撥英法兩館經費分給外尙須加費八千金左右不敷支放擬請貴衙門於循照年例撥給經費時添撥此款實爲公便至香港領事雖未開辦約計歲費當與往年新嘉坡相上下以七千金左右爲率除正領事一員照章月支薪俸外其隨員一人及領事署租房一所應給租費似可均仍舊貫但其歲費七千兩擬請貴衙門咨行

兩廣總督部堂
廣東巡撫部院

就近在粵海關劃

撥歸出使經費項下扣除免如新嘉坡之由使館收撥以銀易鎊又以鎊易銀洋輾轉耗折更添往返匯費再香港領事應兼歸

兩廣總督部堂廣東巡撫部院

與出使大臣統轄

蓋其所辦交涉之事大半關係地方之事所以與使臣勢難隔膜而與粵省尤爲切近義當兩有所屬稍殊各口領事情形也所有一切籌辦事宜是否如此擬乞貴衙門迅速核示以便遵循相應咨呈 貴衙門謹請察照施行須至咨呈者

光緒十七年三月二十五日

咨總理衙門

飭候補知府姚文棟順道查訪緬

境情形

爲咨呈事竊照本大臣因緬甸分界事宜亟應豫籌以免臨時棘手於正月二十五日拜發密摺一件已備文鈔稟咨呈一貴衙門在案茲據在洋期滿稟請銷差回華直隸候補知府姚文棟面稱本年正月擬由巴黎起程順道遊歷印度緬甸等處當經出使德國大臣洪批准在案各等情查得該員精勤穩練留心時務研究輿地之學茲旣身歷緬境本大臣檄令順路暗訪密查儻有切要情形隨時稟報本大臣暨雲貴總督部堂

王 以備他日參稽之用再緬甸之仰江亦名漾貢係扼要之地華民在彼者不下三四萬人並令留心查訪當經酌給路費銀三百兩以資津貼相應咨呈 貴衙門謹請查照備案須至咨呈者

光緒十七年正月二十五日

咨總理衙門 補錄告英外部擬派領事姓名

爲咨呈事竊照增設領事一案初經本大臣照會外部准外部覆稱中國欲設領事願照各友邦一律辦理但閒有審量地方情形刻下或有不能照給文憑之處等語當經鈔稟咨呈 貫衙門在案據外部侍郎言及文意係指澳大利亞及香港二處而言復經本大臣再三與外部商辦始允於香港設立領事本大臣復具一牘聲明香港擬派左秉隆新嘉坡改總領事兼轄海門擬派黃遵憲嗣准外部去冬十一月初七日覆文有均經領悉之語本大臣將此憑據以爲事既定局乃次第籌

上卷之片
一
辦具奏請

旨查英國於他國領事必須各國朝廷繕給文憑將此文憑交與外部由外部轉奏君主請頒准勅較他國辦法稍覺鄭重其事既載於星輶指掌中惟他國通行辦法均於本國派委之後然後將姓名達知外部本大臣以香港此舉爲創辦之事誠慮事有變遷先將派委之名告知外部請其覆准原係力求穩妥辦法詎意近日英使華爾身忽生異議承貴衙門電飭索取憑據檢閱前案始知此件覆文漏未鈔咨當時旣得覆文之後以謂事臻妥洽不甚介懷又值啟程往法之際到法後

又以他事雜擾誤謂既經鈔呈竟致遺漏實難辭疏忽之咎相應將照會外部文一件外部覆文一件補鈔咨呈貴衙門謹請察核施行須至咨呈者

鈔呈 與英外部尙書侯爵沙照會一件 又英外部覆文一件

光緒十七年四月二十日

咨總理衙門 請英員保護智利厄瓜多流寓華

民

爲咨呈事竊查本大臣前准 出使大臣崔 文稱秘
魯所屬必沙灣意基忌登拏亞里架等處向有華商貿
易自光緒七八年間秘魯與智利構兵將各地割歸智
利管轄上年智利內亂不免滋擾中國與智利未訂約
章無從保護有華商永安昌寶芳等稟請駐秘參贊轉
求英國駐秘公使一面電達英廷一面函託英國駐智
公使保護旋准英廷電如所請諭令駐智公使一體保
護極爲得力又南美利加洲厄瓜多國亦有華人貿易

該國別立新例。苛禁華人。亦承英國駐劄惠愛磯之領事張百喜。駁除苛例。俾得安業。將來各該處華工有所請託。自益靈通。咨請代謝英廷等因。本大臣當卽照會英外部。致謝英國睦鄰護商之意。茲接英外部大臣照覆。內稱英廷聞得本國駐智利及厄瓜多之官員。能幫助中國人民。英廷深爲欣喜。請煩查照等因。相應鈔錄往來照會各一件。除咨行出使大臣崔查照外。爲此咨呈貴衙門。謹請查核施行。須至咨呈者。計鈔往來照會各一件。

光緒十七年四月二十一日

咨總理衙門並北洋大臣李 義國交還中華書

院產業器具

爲咨呈事竊查接管卷內據義大利國中華書院學生郭棟臣等稟稱納坡里府有中華書院一所係教士馬國賢於康熙年間遊歷中國曾蒙

聖祖仁皇帝賞給器物歸國之後將產業建置書院百餘年來中國學生來義學習者代不乏人近年義國將書院改歸學部管理以致侵蝕院產牽連興訟求爲照會義國外部等情據此本大臣行抵羅馬傳令該生等詢問復據該生等遞稟欲請義國每年撥出三萬佛郎

以充經費。本大臣詳詢原委。乃知此院專爲天主教而設。所有華人遠來學習者。亦祇爲傳教計。書院雖係馬國賢創造。多由教士捐助。不盡出其遺產。至義國將書院改歸學部。乃係將教士產業。改由國家經理。亦不止此一書院。本屬礙難辦理。惟此院原額有華生二十二名。該生等既係中國人。稟求保護。似未便置之度外。因於面商外部之後。繕具一牘。并附原稟。託其查辦。茲據外部覆稱。學部已飭書院賠款一萬二千佛郎。并將一切器具交還教會。另擇善地。以資教育等語。雖不能如該生等所求。亦不至令該生等失所。所有照會外部文。

并外部覆文暨院生來稟相應彙鈔咨呈
貴衙門謹
請察核須至咨呈者

計鈔件

光緒十七年六月二十九日

咨總理衙門並南洋大臣

李劉

與英外部議駁新

金山葛龍巴限制華民

爲咨呈事。竊照限制華工之例。自美國創行。英屬各地亦從而效尤。英國新金山定例。每船三百噸。准載華人一名進口。仍須納進口身稅銀十鎊。方許登岸。此例行之有年。去歲阿泰一案。上控於英國大審院。卒不獲勝。英屬加那大之葛龍巴。亦定例每華人一名進口。納稅銀五十圓。此例行之六年。現據葛龍巴華商英昌隆號等稟稱。本年正月。葛龍巴議院議加進口稅。每人一百圓。無論商人工人。無論新客舊客。一律徵收。該處生意

上卷之九
三
淡泊自魚罐金礦以外無可託業實不堪此種重稅求
爲設法等語查此項限制華工之例屢經各前大臣行
文外部竟難駁除一則以中英條約並無援照最優相
待之語頗難據以立論二則英國管轄之權頗有限制
屬地議院所定之例英廷只能勸令酌改不能飭令廢
除是以屢次駁論仍歸無益惟是該地設例專指華人
明示限制實不合於萬國公法若遂置之不問仍恐苛
例日出無所底止大有礙於華民生計亦恐損中國之
威望茲本大臣特備一牘將新金山葛龍巴二事相提
並論除俟接外部覆文有何切實辦法再行咨明外相

應將往來照會譯漢鈔彙咨明呈

貴衙門請煩查核須

至咨明呈者

計粘鈔

光緒十七年七月初九日

咨總理衙門 與英外部商禁香港出口軍火

爲咨呈事竊照八月二十一日接奉 貴衙門來電內開今年教案紛起云云秉公商辦并婉告有約各國等因當卽遵照辦理並飭參贊官馬格理先往告英外部以近來鬧事私會每向香港購辦軍火若不由英禁止軍器出口斷難遏其來源恐釀釁端外部允電港督華使留神秉公酌辦已將大概情形電達在案茲接英外部大臣沙侯照會內稱香港政府現已禁止鎗礮藥包彈子火藥及水陸軍器出口自西十月初一日起至明年西三月底止鈔送告示底稟請轉達中國 國家各

等因。本大臣當卽照復。謝其克敦睦誼。並告以六箇月
期滿後。設不幸而再有未妥情形。當再告英廷。請將禁
期展久等語。本大臣查英廷此次辦法。尙屬認真。彼意
不欲礙本國利源。所以未能永遠禁止。然隨時展期。則
屬照例之事。竊料半年之後。各省匪徒。尙難一律靜謐。
爲中國計。禁止軍火。愈久愈妙。擬請 貴衙門於滿期
一月以前。察酌情形。電示梗概。以便本大臣照請英廷
續禁。似於防制會匪之事實。有裨益。茲譯錄英外部照
會。並香港政府告示各一件。照覆一件。咨呈 貴衙門。
謹請察核。須至咨呈者。

光緒十七年十二月二十六日

出吏公賣

卷一 咨文

看傳經樓校本

咨總理衙門並南北洋大臣李英員允許保護厄

瓜多流寓華民

為咨呈明事竊照智利厄瓜多華民經英國代為保護前

准出使大臣崔來文當經致謝英國外部並鈔彙

咨呈在案茲准總理衙門函開該處華民得英官代

為保護未嘗無益希請英外部諭令駐智利及厄瓜多

兩國使臣領事如前保護俾華工得以安業益見友誼

之篤等因承准此本大臣當備一牘照會外部茲准外

部覆稱允為照辦除咨呈總理衙門並咨會出使

大臣崔轉飭駐秘參贊領事查照外相應將外部來

往公牘咨明呈貴衙門請煩察照辦理須至咨呈者

計鈔給外部文外部覆文共三件

光緒十七年八月十三日

咨總理衙門 送出使英法義比四國日記

爲咨呈事。竊查接管卷內。光緒四年八月十六日。貴衙門咨行具奏出使各國大臣。應隨時咨送日記等件。一片內稱。凡有關係交涉事件。及各國風土人情。該使臣皆當詳細記載。隨時咨報。數年以後。各國事機。中國人員可以洞悉。不至漫無把握。況且記並無一定體裁。辦理此等事件。自當盡心竭力。以期有益於國。等因。光緒三年十一月初一日奉

旨依議欽此。欽遵在案。本大臣於光緒十六年正月十二日。由上海起程。一路訪察外洋各埠情形。隨所見聞。

據實纂記莅任以後馳驅英法義比四國又逐事攷求於各國形勢政事風俗觀其大略編錄成帙惟日記雖體例不一而出使情事無甚歧異查前出使英法大臣郭及前出使英法大臣曾俱有日記所紀程途頗已詳備若但仿照成式別無發揮雷同之弊恐不能免此一難也出使之職固在聯絡邦交至如覘國勢審敵情貴能見其遠者大者而事之真僞虛實得失利病本不易辨或拘於一隅而不能會其通或震其一端而不能究其極若但掇拾瑣事見其粗而遺其精羨所長而忘所短津津鋪敘舍己芸人無關宏旨此二難也中西

通好本係創舉非絜四千年之史事觀九萬里之全勢無以通其變而應其機偶有論說抑揚稍過恐失其平或致議者之反唇或啟遠人之藉口必斟酌夫理之當然勢之必然權衡輕重不可稍有偏倚此三難也有此三難最宜審慎本大臣奉使之餘據所親歷筆之於書或采新聞或稽舊牘或抒胸臆之議或備掌故之遺不敢謂折衷至當要不過於日記中自備一格始於庚寅正月迄於辛卯二月分爲六卷用西洋糖印法飭員楷錄印訂六冊由文報局附郵賚送相應咨呈 貴衙門謹請查照須至咨呈者

日修公府卷一

光緒十七年十二月二十日

三

咨總理衙門 與法外部議除越南等處華民身

稅

爲咨呈事竊查 劉前大臣移交法署卷內有越南等處徵收華民身稅一案自光緒十二年經 許前大臣照會法國外部以後懸隔五年之久至今尙未催辦本大臣查華民寄寓越南三圻及柬埔寨等處者約計三十萬眾其丁壯每歲所輸身稅約計二三十萬兩之多苟能一律裁革實於華民大有裨益即使不能儘數免徵第能使法國減去一分之稅則華民卽受一分之利前曾函達 貴衙門在案嗣於光緒十七年夏初接奉

貴衙門來函屬卽與法外部商論旋因教案迭出口
舌滋煩停攔將及一年現稍安靜無事卽已照會外部
催其將前事核辦除俟接到該部覆文再行咨呈外謹
將此次致法國外部照會錄呈 貴衙門存案備查須
至咨呈者

計鈔單

光緒十八年二月二十五日

南北洋大臣
李劉

與英外部議會立

坎巨提新酋

爲咨會呈事竊照英兵侵擊坎巨提回部該頭目戰敗出

奔一事。本大臣於正月十六日在巴黎承准
貴衙門總理衙門

貴衛門總理衙

門 咸電當卽馳赴倫敦與英首相兼外部大臣侯爵沙

力斯伯里會晤數次。往復辯論。英廷狃於琉球越南緬

甸之舊樣以爲業被吞併中國卽不能過問又揣中國

向不務勤遠畧謂我平時未嘗管理坎巨提事非若英

之久。筦坎政。籌貼歲費。所以深閉固拒。不願我與聞坎。

事堅韌異常。本大臣就彼兩屬之說。與之力爭。兼用旁

敲側擊之法。隱示形格勢禁之謀。磋商匝月。始稍就緒。議於舊酋之兄弟子姪中。選立一人。由新疆巡撫或喀什噶爾道。就近派員赴坎。會立新酋。然彼猶以坎巨提立酋。中國向不派員。苦相詰難。本大臣答以向來坎酋繼立。是否由喀什噶爾就近派員。一時無從查考。此次事屬非常。必須由中國派員。以表兩屬之證據。將來尋常繼位。不妨查照向章。向若派員。則仍派員。向不派員。亦不因此次而援爲成例等語。外部始願遵議辦理。旋接貴衙門總理衙門二月養電。英使華爾身轉述外部電意。旣將後不爲例一語誤解。又云。不過請我派員到場較

會立字義爲輕。本大臣恐外部或有翻異。因飭英文參贊馬格理赴外部詢問。外部實尙未變議。本大臣欲益堅前說。特再備文照會外部。解明後不爲例一句之義。並申明會同字樣。及中國所有納貢之權。又在外外部與之言定。能選立舊酋之子更妥。如中國派員未到。不得說出所立人名。外部均已電告印度總督矣。相應將照會洋文彙譯漢咨。呈貴衙門謹請察核。貴大臣請煩查核。須至咨會者。

光緒十八年三月十八日咨

咨總理衙門 摘錄曾前大臣滇緬界務舊卷

爲咨呈事。竊照滇緬分界一事。前接英外部照會。並劃界節略地圖等件。當經繙譯華文。就原圖加註。又本大臣照會彙一件。於二月十六日。咨呈 貴衙門在案。查光緒十一年。英人初得緬甸之時。經 前出使大臣曾。派本署英文參贊官馬格理。與外部侍郎克蕾。疊次面談。由克蕾筆誌問答節略。自光緒十一年十二月起。至十二年二月止。先後會商十次。其節略經曾大臣隨時咨呈 貴衙門。所有劃界緊要事宜。均已議及。查閱是年英外部三月十三日照會。大致已屬允行。旋值

上諭
曾大臣交卸回華英廷於劃界一事亦久置未議本大臣近聞英廷不日將派員來華辦理劃界事宜茲特擇全案中節畧照會之尤有關係者摘錄數件咨呈貴衙門謹請察核須至咨呈者

計鈔單

節畧三件

照會二件

咨文一件

光緒十八年四月十五日

咨總理衙門 與英外部催問緬甸入貢年月

爲咨呈事。竊查中英所定緬約第一條內。緬甸每屆十年。向有派員呈進方物成例。英國允由緬甸最大之大臣。每屆十年。派員循例舉行。所派之人。應選緬甸國人等語。當時中外注意。專在申明成例。惟未聲敘緬甸應於何年入貢。所以但有此約。而英之駐緬大員。尙未舉行。本大臣因聞英國印度部各員。頗持異議。有不願遵辦之意。若不及時催問。此約恐成虛設。曾派英文參贊馬格理赴外部探詢情形。外部轉述印度部各員意見。果多支吾搪塞之語。經該參贊執定約章。與之理論。旋

接外部來文內稱應由立約之日算起至光緒二十三年印度政府自當豫備派員等因本大臣查外部所定貢禮年限雖屬較遲然既訂有定期則屆時可查案催問自難翻異惟該文內有緬甸諸事更新之說恐其後來據此一語又多矯變不得不辦文再與辯明相應將與外部往返照會洋文彙各一件譯漢附鈔咨呈 貴衙門謹請察核須至咨呈者

光緒十八年五月二十六日

出使公牘卷之一終

上虞鍾達卿承刻

出使公牘卷之二

無錫薛福成叔耘

咨文

咨總理衙門並

北洋大臣李雲貴總督王

與英外部理論英

兵進佔漢董地方

為咨

呈事

竊查英兵到滇邊土司所屬之漢董燒燬房

屋佔踞地方一案經本大臣辦文照會外部詰以不得

借查察地理為辭進佔邊界責令飭駐緬英員速即退

兵旋接英外部照復內稱英廷自當審量此事等因已

於二月十六日譯鈔往來照會洋文彙咨

主會

貴

衙門

在案茲於五月初六日接據英外部文稱此事恐有差錯誤其緬甸來信所敘英兵祇有百名曾到漢董而其地位之遠近月日之先後均有不符且稱英兵已早回八募本大臣查滇邊相距過遠其情形是否確實無從考覈惟英兵燒燬各村駐緬英員已自認不諱且旣築路一條直通漢董則其心之未嘗一日忘我滇邊可知大抵英之外部亦思勉顧大局其邊吏則壹意以進取爲功並無底止此次英兵往來颺忽或實已早回八募或本大臣行文詰問之後始經外部飭查該英員乃一面潛自撤兵而故挪移其月日以掩飾其前非均未可

定但彼既自退回姑可將就了結自後英兵如有越界

滋擾之處應由請雲貴督部堂貴督部堂豫飭沿邊文武詳查

邊內邊外地名異同月日確據電知本大臣與英外部

理論似有裨益相應將英外部來文譯鈔咨呈貴衙

門謹請經堂請煩查核須至咨呈者

光緒十八年五月十二日

咨總理衙門並

南北洋大臣

與英外部追論英

人梅生勾通會匪讞案

為咨

呈明

事竊照英人梅生勾通會匪代購軍械一案因

判罰太輕曾於本年正月四月兩次照會英外部俟該

犯監禁期滿提至香港再讞先後譯稟咨

呈送

貴衙門

在案茲於西歷七月初二日即中國六月初九日接准

外部來文稱據上海英官律師來函言上年此案辦結

時中國官員已極愜意又上海英按察使來函言此案

所控祇係炸藥故照炸藥定罪不能加重且謂該犯所

做之事僅係癡妄之想並無實在險事等語本大臣查

該犯自供在鎮江通匪謀叛。又香港招雇英人十九名。滬關查獲洋槍三十五箱。種種證據確鑿。可憑。豈能以癡妄之想一語。輕爲開脫。因迭次電商

南洋大臣
貴大臣於

原控炸藥外。更以私通匪黨。偷運軍火。違例雇人三事。

飭江海關道。囑西律師至英按察使處控告。旋接

貴南

洋

大臣閏六月文。電開梅案迭商英律師担文。謂證據

不足。刑司前審供證。西例不爲確據。且與稅司均言再控。必留滬質審。前斷解回。轉作罷論。彼旣聯爲一氣。恐再控必有反覆。已促其解回本國。經滬道屢商。已於十一日押解回國。並允不准再行來華。囑本大臣斟酌與

之辯論等因。本大臣查該犯業既釋放。辯論自屬無益。祇能相機就此收束。將該犯逐出華境完案。惟外部來文。強辭奪理。壹意袒護。上海英讞員。不容不備文照會。正言駁斥。仍用持矛刺盾之語。畧寓立竿見影之法。以申公道而儆將來。茲將外部來文及本大臣照會各一件。譯稟咨送。貴衛門謹請察核大臣請煩查核。須至咨呈者。

計鈔單兩件

光緒十八年閏六月二十三日

咨總理衙門 派員前赴比國考核罪犯會

爲咨呈事。竊照前准 貴衙門函開比國陸使照會稱奉本國來函封送查照。當將洋文譯出。係該國考核罪犯會章。擬請中國派員入會。復據陸使來署面述前因。以中國遣人一往爲榮。茲將原件鈔錄寄閱。屆時希派員前往周旋其間。見復等因。准此。本大臣查中西律法原自不同。該國所請派員入會。本屬無可考核。但不能不虛與委蛇。藉敦睦誼。當卽札飭駐法三等繙譯官知府銜候選同知吳宗濂前赴比京入會聽議。仍將考核情形據實稟復。茲於閏六月廿七日。據該員稟報閏六

月十三日由法起程。馳赴比國。十四日謁見外部及刑部總辦。查各國政府派員入會者。凡十有六邦。各處博學會來赴是會者。凡百數十人。其人皆問官律師醫士等。自十五日起。至二十一日止。每日集議兩次。所議不外三大端。曰根究罪源。曰矜恤瘋犯。曰保全童穉。當集議之時。會中有問中國辦法者。該員遂登議座。略言中國律法。大致責成地方牧令。以教化爲先。是以人民雖眾。犯法者少。十九日比王臨堂聽議。該員又將前意反覆申論。其時聽者約數百人。歡聲雷動。擊節歎美。比王亦向該員點首鼓掌。以致謝。臨行又溫詞慰勞。其執政

大員多有向該員道賀羨慕華律贊美華官溢於言表
二十一日會終大譙延該員於上座極盡敬禮茲已於
二十二日回法據將所聞各議逐條摘譯并將對答之
言稟報前來相應將派員赴比入會考核情形咨呈
貴衙門謹請察核須至咨呈者

附黏鈔件

光緒十八年七月十八日

咨總理衙門 與英外部開議滇緬界務

爲咨呈事。竊照光緒十八年六月十六日准 貴衙門電開本署具奏滇緬界務請專派使臣在英商辦以重事權一摺奉

旨依議欽此。除函牘外先電聞等因。本大臣當卽備文照會英外部請其派員訂期會商。適值外部新舊交替之際未有復文到來。七月初七日准 貴衙門咨開恭錄

諭旨。鈔錄原奏到本大臣謹卽欽遵辦理。復具牘至外部催問。七月初十日接英外部照會稱已派寶星山特

生及印度部參贊一員與本署英文參贊馬格理會同商議定於十二日在外部衙門會商本大臣當卽照復至期飭馬格理前往會議茲將往來照會各件譯稟咨呈貴衙門謹請察核須至咨呈者

附鈔單四件

光緒十八年七月二十四日

咨總理衙門並

北洋大臣李雲貴總督王

與英外部聲明請

英撤兵還地

爲咨呈事竊照滇緬分界一案前准英外部訂期派員會商已譯稟咨呈

貴衙門總理衙門

在案七月十八日本大

臣飭馬格理告外部目前須先撤昔董英兵爲商議界務之第一事旋於西歷九月十二號卽中國七月二十二日英外部侍郎山特生致本署英文參贊馬格理函稱撤兵一事必須細心審量現中國亟欲辦理劃界要務若俟審量昔董之事則商議界務似須多停時日且請中國言明何以要撤兵及索問地段之理云云本大

臣察其語意含混。自係有心延宕。因於二十七日照會
外部。詳晰言明。必應撤兵。及所以索還厄勒瓦諦江東
邊地段之故。茲將山特生來函。及本大臣照會彙各一
件。譯鈔咨明貴督辦堂。謹請察核。須至咨呈者。

光緒十八年七月三十日

咨總理衙門並

北洋大臣李雲貴總督王

與英外部催請英

兵退出昔董地方

爲咨呈事。竊查滇緬劃界會同商議一事。前經本大臣照會英外部。索分野人山地。卽八募以北。大金沙江以東之地。洋人所謂上厄勒瓦諦江中間一段之地也。並請英兵速退出昔董。卽薩洞納以便商議分界之事等因。旋接外部大臣勞俾伯里照復。內稱已轉告印度部尙書。欲與印度總督商議。此事英廷自當用心考核等語。玩其辭氣。已不若從前之堅韌。本大臣乘其游移之際。當卽辦文照會。謝其允爲審量。而仍嚴催英兵退出昔董。

蓋英兵若不守昔董。當卽退至大金沙江以西。英外部曾自言之。中國所以必催撤英兵者。爲劃江分界計也。所以必劃江分界者。爲保固沿邊數十土司。俾英之邊吏不得誘脅爲兩屬也。本大臣發文之後。隨遣馬格理赴外部探問。而外部議論果已漸改。謂中國此舉未嘗無理。已微示轉圜之意。總之中西所見之理。不必盡同。本大臣亦知昔董大寨向未爲中國屬地。然我索之而英廷不能堅拒者。以其本非緬屬。亦更非英屬也。本大臣仍當相機進退。因時變通。總期事可速了。裨益邊務而已。除俟外部如何照復。再行咨明外。相應鈔錄與外

部來往照會三件咨
會呈

貴
衙門
欽
部
堂

請煩查照須至咨

呈者

計鈔照會三件

光緒十八年八月二十日

咨總理衙門並北洋大臣李 與英外部請刪除

加那大苛待華民新例

爲咨呈事。竊照英國屬地加那大政府苛待華民一案。本大臣屢次與外部辨駁。所有寓居加那大之華民。不令其分別看待。俾華民享受權利。與別國之民相同。乃近聞本年西七月初九日。加那大域多利亞議政院新改一例。係於一千八百八十六年所定華人入口之例第十三條修改。以待寓居之華民。更加嚴酷。澳大利亞及加那大自主之屬地。設立分別之例。以治華民。旣不合中英條約之理。亦與萬國公法相背。本大臣因辦文

照會外部請英廷設法令其革除俾華人往來加那大者可以自便旋接外部尙書伯爵勞德伯里照復內稱加那大政府改易一千八百八十六年華人入口之例第十三條一節已轉咨藩部大臣俟接回音再當照復請爲查照等語除俟英外部如何照復再行咨呈外相應鈔錄往來照會各一件咨呈

貴衛門大臣謹請查照須

至咨呈者

光緒十八年九月二十六日

咨總理衙門並北洋大臣李 巴西國請照約遣

使駐京

爲咨呈事竊照光緒十八年九月初五日准巴西國駐法公使畢薩照會稱本國伯里璽天德願照光緒七年八月十一日兩國所定條約遣派使臣駐京請代奏明

中國

大皇帝允准照辦以固邦交等因當經兩次電達

北貴

洋大臣轉電

總理衙門

在案旋承准

北洋大臣

貴轉

到

總理衙門

電復卽遵電示辦文照會巴西國駐法

畢公使告以既願照約遣使駐京自應照中國現行禮

節與各友邦使臣一例接待。並詢畢使。如將所派銜名
開示。即可轉達。總理衙門。奏明辦理等語。除俟畢使
開送遣使銜名前來。再行咨呈外。相應鈔錄來往照會。
並問答節畧各一件。咨呈貴衙門大臣。謹請查照。須至咨
呈者。

計鈔單並問答節畧一件

光緒十八年十月初五日

咨總理衙門並

北洋大臣李雲貴總督王

與英外部辨論野

人山地

為咨

呈會

事竊查滇緬劃界會商一事前經本大臣照會

英外部獎其允為審量之意而仍嚴催英兵退出昔董

曾於本年八月二十日鈔錄與英外部來往照會咨

呈會

貴

衙門

在案旋將切要情形節次電達

貴衙門總理衙

門察核本大臣於九月間往晤外部尚書勞德伯里催

問回文稍有辯論告以野人山地本非緬屬英既踞緬

即為中英兩國廝脫之地按萬國公法本應均分至昔

董駐兵更恐兩國邊境難安早經備文催請速撤惟未

接回文。勢不能不與分界事併辦。勞偲伯里謂昔董英兵勢難速撤。恐中國接防兵未到。無以彈壓野人。又將滋事等語。告以英廷但約定一退兵之期。即可將滇緬界務議定。大概規模。勞偲伯里總以英廷不受勒措爲辭。查外部不肯速撤昔董之兵。未必非俯徇邊吏之意。有所窺伺。然其立說。每謂因議緬界而忽有此舉。近於受我要挾。情尙未甘。不能不辦文照會。示以轉圜之意。蓋野人山地本非緬屬。亦非滇屬。原在滇緬分界之事之外。本大臣初議及此。實爲分界事盤旋作勢。究竟分界與分地兩端。不妨各歸各辦。但仍聲明。

中朝索問厄勒瓦諦江上游東段之地不能稍改其意耳除俟接有回文辦理情形如何再行咨呈外相應鈔錄給英外部照會一件咨呈貫衙門欽謹請察核須至咨呈者

計鈔單

光緒十八年十月十八日

咨總理衙門並北洋大臣李 鈔送直隸候補道
姚文棟稟陳滇邊及緬甸情形

爲咨呈事。竊照本年九月初五日。據奏留雲南二品銜
直隸候補道姚文棟稟稱。竊職道於光緒十七年正月
間。道出法京巴黎。蒙憲臺札委查看印度緬甸各埠華
商情形。並密探雲南邊外與緬甸交界地勢。啟程後業
將查看沿途商務及應辦事宜。歷次稟陳在案。嗣奉鈞
電諭令將途中見聞再行詳稟等因。遵查職道自正月
二十八日。由馬賽海口搭趁法國公司輪舟。經地中海
紅海。歷意大利奧地利。及希臘土耳其等國。又過埃及

國京城之南。阿喇國京城之北。至二月十七日。始抵錫蘭。以上皆歷來使節所經。無庸贅述。自錫蘭換輪舟入孟加拉海。皆印度境。二十日抵本地舍黎。二十一日抵馬搭拉斯。南印度之都城也。二十五日抵噶爾格達。東印度之都城也。凡印度境內商埠。大者三處。小者十餘處。閩粵流寓商人約六七萬人。此印度之情形也。三十日自噶爾格達搭趁英國公司輪舟。三月初三日抵仰光海口。是爲緬甸。初九日。自仰光海口換輪舟入伊勒瓦諦江。十五日。抵阿瓦。緬甸之都城也。二十日。自阿瓦換輪舟。二十二日。抵新街。爲伊勒瓦諦江之上游。

凡緬甸境內商埠海口三處沿江大者二十二處小者二十九處其腹地深山之中亦有商埠不下數十處閩商粵商多在海口約有萬人滇商散布於沿江及山中各埠無處無之幾與緬民相埒約在十萬人左右此緬甸之情形也印緬各地皆近赤道之下春時酷熱較內地暑月尤盛入境後肌膚發赤每日須以涼水澆洗謂之衝涼日當午時頭目眩暈幾若昏迷蓋古所謂身熱頭痛之國卽其地也四月初五日由新街僱民船入大盈江初六日抵蠻弄登岸是爲野人山之西麓初七日乘竹兜度野人山山中皆赤髮野人所居地形極險爲

中外之界限。謝清高所云峭壁不可梯繩。弱水不任舟筏。陳天祥所云上如登高。下如入井者也。初十日抵蠻允。是爲野人山之東麓。過此則一望平夷。無險可扼矣。十三日抵蓋達。十四日抵千崖。十五日抵南甸。皆土司屬於雲南者也。十六日抵騰越。始爲雲南邊境。渡龍川江。潞江。瀾滄江。皆極邊煙瘴之地。至五月二十七日始抵雲南省城。是役也。自歐州海程入亞州。其行三萬八千餘里。行大江中三千二百六十餘里。山程二千餘里。歷時四月有奇。職道竊查雲南邊境。西路以永昌一府及騰越龍陵兩廳爲門戶。其南路以順甯普洱兩府及

緬甯威遠思茅他郎各廳爲門戶而皆以緬甸爲藩籬。自英人得緬甸。藩籬撤而門戶寒矣。所幸者猶有野人山之天險。可以限隔中外。若使野人山爲英所得。則英可長驅而入雲南。有高屋建瓴之勢。而雲南更無可扼之險矣。職道入滇後。稽之志乘舊卷。訪之邊民口碑。乃知野人山實係中國現屬各土司之分地。卽明史所稱南牙山者。本在雲南界內。非甌脫比也。蓋乾隆時滇緬老界。西包孟硯孟養蠻暮南包孟艮木邦孟密六土司在內。其後六土司潛爲緬甸所誘。中國不復過問。於是現屬騰越之南甸隴川孟卯干崖盩達等土司。現屬

龍陵之遮放芒市等土司及現屬普洱之車里十三猛土司爲新界。新界西至大金沙江而止。永昌騰越諸志班班可考。野人山蓋在新界之內也。職道竊按日論之。儒每謂雲南天末遐荒。不關形要。而不知雲南實有倒挈天下之勢。由雲南入四川。則據長江之上游。由雲南趨湖南而據荆襄。則可搖動北方。明儒顧炎武郡國利病書嘗極言之矣。況今有印度緬甸以爲後路之肩背。則形勢更勝於昔。英之覬覦雲南。非一朝夕之故矣。然則雲南之得失。關乎天下。而野人山之得失。關乎雲南。能保野人山。則雲南安。能保雲南。則天下皆安。一山之

所繫實不淺渺也。查自騰越龍陵兩廳度野人山以通緬甸。其間其有九道。皆匯於新街。新街者。乾隆時蠻暮土司故地也。若能如憲臺原議。收回新街。以扼門戶之總樞。是爲防邊上策。新街旣淪於英。而不可返。於是職道有保守野人山九道之議。守吾界以遏其闌入。猶不失爲中策。若并野人山而棄之。則日後邊防無險可扼。雖使孫吳復起。亦無策矣。此就雲南西路邊務界務言之也。自西路而外。又有南路北路。皆關緊要。南路車里土司之外。爲乾隆時土司孟艮木邦之地。卽英所謂撣人在潞江下游之東者。車里與孟艮相接處。僅有小江。

數道無險可扼。惟孟艮在潞江之濱。爲邊外重鎮。又係商賈四集之大埠。由緬甸渡潞江而犯思茅。其有三道。孟艮總扼其江道之衝。實爲要地。職道嘗論新街孟艮之於雲南。如鳥之有雙翼。新街跨山爲險。屏衛其西。孟艮扼江爲險。屏衛其南。皆形勢必爭之地。若失此兩險。則如無翼之鳥。就擒必矣。昔年英廷欲舉潞江下游以東。悉歸於我。卽指孟艮以內之地。於雲南邊務裨益非淺。奈之何其遲疑不受也。北路在野人山之北。有甌脫之地。千八百餘里。相傳爲明時茶山里麻兩土司之故地。今亦野人居之。旣不屬華。亦不屬緬。職道在邊外詳

查地勢由彼處入華有三道一道通西藏一道通四川之打箭鑪一道通雲南之永北廳若使日後淪入於英則三省邊防疲於奔命實爲一大隱憂山中產黃果樹百千萬株多難勝計故俗呼其地爲樹漿廠外洋購買其樹中之漿以爲器皿凡可收放寬緊者皆是此漿所成一樹所出每年可得小洋四百餘員利源極大又有金礦兩處礦苗亦旺以雲南民貧地瘠而其邊外乃有此沃饒不及今取以爲資而後來棄以資敵甚非計也且樹漿一物爲外洋所必需其權自我操之則亦可藉以制馭英人如康熙時俄人仰給我茶葉大黃卽借此

二物之微以施操縱之術也。職道前過野人境時聞者或疑爲險途可畏而豈知壺漿載道婦孺爭迎野官負弩執鞭咸有求庇之意卽遠處樹漿廠之頭目亦遣使奉書譯其詞意自稱本是漢民願仍隸漢等語彼皆恐洋人之見逼耳以上三節皆係雲南邊地之要務不可不於勘界之先熟籌而審處之西路之野人山本係現屬土司界內之地有新舊各志可據此可折之以情理者也南路潞江以東之孟艮爲乾隆時舊土司英廷嘗議歸於我案懸未定此當引伸初議者也至北路之樹漿廠距緬最遠向未屬緬而所關於我三省邊防者甚

大按公法云遇荒地不屬邦國管轄者無論何國皆得據爲己有此當以兵力豫占可以先入爲主也職道奏委密查邊地界址踏勘既周詢訪既詳不得不悉心籌畫質之邊地耆民及有識之士僉以爲然而雲南省垣距邊已遠京師距雲南更遠燭照所不能及雖使職道上書建白而不免有位卑言高之罪惟有據實稟請憲臺密奏

朝廷以爭先著而杜後患輦數千里之邊防爲億萬年之久計是否有當伏候鈞裁各等情本大臣查前駐德隨員現保直隸候補道姚文棟於光緒十七年正月期

滿銷差回華道出巴黎面稱擬順道遊歷印度緬甸暹羅越南等處舍海登陸繞出滇黔業經出使德國大臣洪批准在案比經本大臣以中緬界務關係緊要乘該道遊歷印度回華之便可順路諮訪印緬切要情形據實稟報本大臣暨雲貴總督部堂王以備他日參稽之用密札該員遵照在案茲據稟稱各情於滇邊及緬甸形勢頗能留心攷核議論亦尙有見地雖間有做不到之處而其博諮周訪備歷艱辛似於時務見聞不無裨益自應據稟詳咨以備查攷相應咨呈貴衙門謹請查照備案須至咨呈者

光緒十八年十月二十八日

出吏公賣

卷二 咨文

三 傳經樓校本

咨總理衙門 遵 旨謝英君主送呈自製書集

爲咨呈事。竊照光緒十八年十月二十五日承准 貴衙門電開二十五日英使歐格訥

覲見呈遞國書禮成。另呈英君主所贈自製書集奉

旨著薛福成遵

旨致謝。欽此。本大臣當於二十六日親赴外部傳

旨致謝。英國君主友睦之意。該外部大臣勞德伯里稱
卽日轉奏君主。本大臣旋辦文照會外部。重申前意去
後。茲按照復內稱。已將來文送呈君主閱看。君主聞中
國

大皇帝見愛此書極爲欣喜已囑駐京使臣竭力辦事必令兩國交情日益堅固等語諭令答復前來相應鈔錄往來照會各一件咨呈 貴衙門謹請查核須至咨呈者

計鈔單

光緒十八年十一月十八日

咨總理衙門並

北洋大臣李雲貴總督王

與英外部詰問侵

擾滇邊

為咨會呈事竊查滇緬分界並理論分割野人山地一事

本大臣曾於十月十八日鈔錄與英外部往來照會咨

呈會

貴

衙門

欽經堂

在案旋將切要情形節次電達

貴衙總理

衙門

察核查英外部於本大臣索問野人山地之文遲

遲不覆意存延宕經本大臣疊次催促至十月二十五

日十一月初九日連接外部來文語意既多含混足徵

理屈詞窮文後微露其意若中國不索野人山地彼可

稍分緬屬揮人地以償我而又不肯明言誠恐一經答

允彼又狡賴所以不能不示以堅持。磋磨作勢彼又謂

車里

即江洪

孟連兩土司曾經入貢緬甸英國亦有索問

之權雖係強辭奪理然查該兩土司昔年畏緬侵擾實有貢緬之事茲本大臣據理答覆不必曲爲諱飾而英之無權索問已可概見至永昌府及騰越鎮廳會銜告示措辭失當致彼族執爲中國不管野人山地之鐵據

昨准

雲貴督部堂王貴督部堂

電稱已將張鎮等記過在案稍

足示儆再印度部尙書金白雷蠻橫無理專聽武員愆惡不遵外部之言非但昔董不肯退兵又在昔馬修築礮臺近又派兵赴蓋西土司邊外之開社地方攻擊野

人如此不顧公法難保不恃強趁勢窺伺滇邊似應請

雲貴督部堂
貴督部堂

密審機宜整軍經武庶足爲建威銷萌

之計本大臣一面設法催問相機應付期於速了此事

相應鈔錄與英外部往來照會六件遣參贊官馬格理

赴英外部傳語一件永昌府等告示一件咨呈貴衙

門謹請察核
額堂請煩查照須至咨呈者

光緒十八年十二月初九日



咨總理衙門 派設檳榔嶼副領事

爲咨呈事。竊照新嘉坡英屬各埠酌設副領事一案。本大臣屢飭總領事黃道遵憲留心訪察。堪以派充副領事者。總期人地相宜。任闕毋濫。據實稟報。以憑核辦。前據該員稟稱。選得紳士候選知府張振勳。卽檳榔嶼之富商。在海門等處經商三十年。聲望素著。若爲檳榔嶼及其屬地威利司雷省。並丹定斯等處之副領事官。堪以勝任等情。稟請查核前來。本大臣覆核屬實。曾經照會外部。請英廷允准。並發諭照辦。旋接外部大臣勞德伯里復稱。檳榔嶼設中國副領事官。已轉咨英廷辦理。

此事之衙門矣等因。自應俟查明再辦。現據外部函稱接到新嘉坡及海門等處總督來函。稱張振勳派爲檳榔嶼之副領事。無所不可。是以已認其爲中國副領事等語。相應鈔錄往來照會函件咨呈貴衙門。謹請查核。須至咨呈者。

計鈔單

光緒十九年正月二十日

咨總理衙門並

北洋大臣李雲貴總督王

送科干地圖

為咨

呈

事竊查滇緬分界並爭論野人山地一事本大

臣曾於光緒十八年十二月初九日抄錄與英外部往

來照會及永昌府等告示各件咨

呈

貴

衙門

察核

在案英外部自經本大臣疊次催促仍為印度部及印

度總督所牽制未肯就範旋又送到照會一件措語尚

多矯強專以中國無管轄野人山地證據為辭而於本

大臣前詰數端仍無一句詳覆不知中國近年雖無管

轄野人山地證據英與緬甸更無管轄大金沙江以東

野人山地證據外部非不深知底蘊特姑為遊辭以支

展耳。惟其後段有讓地互換之說。本大臣遣參贊馬格理告以此等照會暫緩不覆。本大臣但務實事。不必以空文往返。徒延時日。因詢其所讓何地。彼始送到科干地圖及節略一件。告以地太褊小。彼又允添潞江西地。與科干地大小相等。尙未送到圖說。而大金沙江以東之野人山地。仍作中英兩國甌脫。如此既可限制英人。杜其誘脅滇西土司之漸。而中國辦理交涉。稍覺得體。可免爲各國所輕視。詎料印度部旣允復翻。未肯遵辦。現正與外部逐日爭論。俟確有就緒。相機了結。再行咨呈外。相應鈔錄外部來文一件。科干地圖並節略各一

件咨呈貴衙門謹請察核
會歡誼堂請煩查核須至咨呈者
光緒十九年二月初二日

咨總理衙門並北洋大臣李

雲貴總督王兩廣總督李

法外

部鈔送暫往越南華民免稅兩月新章

爲咨

呈事

竊照越南等處徵收華民身稅一案屢經本

大臣照會法外部請其設法裁革以蘇民困無如該外部總以酌辦爲詞久未見復本大臣因於正月十六日備文照會重申前說並飭駐法代理使事參贊官慶常面爲催詢並與反復理論茲於二月初一日接法外部照會內稱聲明尙有未盡情形應候查核先將該處鈔送新章一通咨送查閱按照西曆一千八百九十年五月十五日定例凡有華商經中國官員向法國領事等

官請領護照者准赴越南及北圻地方出入往來限兩箇月內免徵內地一切賦稅等因查法外部此次送到越南總督畢楷新定章程凡有華商赴越南及北圻地方往來兩箇月內免徵一切賦稅雖爲日太促究於暫往之華民稍有裨益自應行知滇粵各省查照以便嗣後凡有華商請照赴越南及北圻地方出入往來兩箇月內即可免交一切賦稅除俟法外部將越南未盡情形查明知照前來再咨達外相應鈔錄兩次問答節略並往來照會各一件又越南新章一通咨會呈貴衙門謹請查核須至咨呈者

計鈔單五件

光緒十九年二月二十日

咨總理衙門並

北洋大臣李雲貴總督王

滇邊展界並請查

勘漢龍關地方

為咨

呈會

事竊照滇緬分界並爭論野人山地一事本大

臣曾於二月初二日鈔錄英外部來文並科干地圖節

略各件咨

呈會

貴

衙門欽差

察核在案外部既送科干地

圖後又允添潞江以西地與科干地大小相等始論及

大金沙江以東野人山地辦法本大臣初仍執劃江為

界之說該外部侍郎山特生乃云可作中英兩國甌脫

本大臣已飭馬格理允之矣次日外部忽又翻異堅稱

印度部不肯答允且謂潞江左右彼已讓地不少何以

此地仍作甌脫。本大臣往晤該外部大臣勞憊伯里。詰以山特生自出此言。堂堂外部豈可失信。彼以山特生並未請示爲辭。迨再三辯駁。始據稱願中國仍受彼讓地兩處。滇西老界毘連野人山地者。亦可酌量展出。所展里數若干。俟本大臣辦文去後。再行答復等語。本大臣因卽辦文。酌擬辦法。所索各端。大致皆已與彼議定者。惟邊界外展拓之地。扯算闊二十英里一節。因滇邊直抵大金沙江。約計不滿四十英里。本大臣仍隱主各半均分之意。以立說也。行文去後。彼又以電商印度總督爲辭。遲遲不復。再三催促。始據稱印度部大臣金白

雷願讓我展出邊界五英里而昔董大寨尙不能在我
界內查五英里實合中國十六里又半告以所展太窄
且昔董不歸中國斷難了結頃據送到復文則又稍變
五英里之說改爲以庚老開欽全地讓我約三百英方
里昔馬亦在其內又將坪隴之南界線以西地一小塊
劃歸中國約數十英方里如此則我所得地仍與展五
英里之說通計不相上下查昔馬在野人山地非蓋達
邊內之昔馬去冬印度發兵佔踞駐營築臺於滇西形
勢不無關礙彼既堅不肯讓昔董苟可收回昔馬亦稍
足爲固圉之計惟當與議定退出期限耳至漢龍關自

明季已淪於緬。騰越八關既去其一。形勢不全。本大臣曾向索還。外部屢電緬員查覆。因華名與土音歧異。彼族亦不能勘得其地。據云若在猛卯土司東南。必可歸還中國。若在猛卯西南。彼恐隔斷與緬屬南坎土司往來之路。勢難歸還。查漢龍關土名宛定金養。檢閱各圖。或在猛卯東南。或在西南。往往歧出。似應

咨明

雲貴

督部堂。豫電騰越廳。派員會同猛卯土司勘實。漢龍關所在地方。以免勘界時爲緬員所朦混。實有裨益。除外部來文。尚有數端。須與理論。再辦復文。一面電達梗概。請

總理衙門

核示外。相應鈔錄與外部往來文件。暨洋

漢文地圖咨

呈會

貴

衙門
勸諭

堂

謹請察核
請煩查核

須至咨呈者

計鈔往來文三件洋漢地圖各一件

光緒十九年四月初三日

市人書
咨文

三傳經樓校本

咨總理衙門並

北洋大臣李
南洋大臣劉

雲貴總督王

與英

外部續催緬甸進貢

爲咨

呈會

事竊查中英所定緬約第一條內緬甸每屆十

年向有派員呈進方物成例英國允由緬甸最大之大
臣每屆十年派員循例舉行所派之人應選緬甸國人
等語本大臣前聞英國印度部各員頗持異議有不願
遵辦之意恐此約遂成虛設曾經行文催論查此事又
與滇緬分界一事互相牽制蓋英本大國其輿論恥有
納貢中國之名頗譏外部前此定約爲非法德各國新
報又從而揶揄之外部不無悔意然彼亦知此約所關

於名者稍損。所得於實者已多。蓋必力行此約。然後可將。前出使大臣曾。所議界務商務三端。悉棄不顧。迨本大臣屢與理論。彼始咨文。稱英廷現已豫備。於光緒二十年第一次派員赴中國。蓋其用意甚深。實爲滇緬分界。不能稍讓地也。然彼又於商論界務時。屢示微意。謂我於貢事如稍允通融。彼亦於界務可格外退讓。本大臣以中國體面攸關。堅持原約。而於分界各端。仍斷斷與爭。乃稍出彼意外。印度部之所以屢允屢翻者。職是之故。外部此文接到已久。本大臣以界務未了。難免變端。未敢信爲定論。今既逐漸就範。貢事亦不至誤。

期相應譯鈔外部來文一件咨呈

貴

衙門
歡部

堂
謹請
煩查

核須至咨呈者
計鈔單一件

光緒十九年四月初三日

咨總理衙門並

北洋大臣李雲貴總督王

收回車里孟連兩

土司全權

為咨

呈會

事竊照英廷前因滇緬分界一事曾行文爭論

江洪

即車里

孟連兩土司向為兩屬又稱新設威邊一廳

係江洪孟連所分之地彼不能認中國此舉為合例等

語經本大臣據理答復曾於光緒十八年十二月

初九十六

日鈔錄往來照會咨

呈會

貴

衙門欽部堂

察核在案查英廷

用意在獨踞大金沙江以東野人山地欲杜我爭辯因

特舉此事以相抵制本大臣曾與再三駁論彼已允我

收回江洪孟連全權而威邊廳亦即在外外部三月二

咨文

登傳經樓校本

十三日來文。既照辦矣。次日外部又稱歐格訥寄到證
據。謂我自稱新關夷疆。實不能認為中國之舊地。彼族
於中國邸鈔等件。隨處留意。足見其用心之深長。然揣
其命意。則仍在促我了結。不再多索。大金沙江以東之
野人山地也。彼視野人山地。如此鄭重。則知我發端之
初。力索野人山地。稍足扼其要領。所以能使彼漸就範
圍者。未始不由於此耳。除仍切實理論。相機速了外。相
應鈔錄外部來文節畧。並恭錄邸鈔。咨呈
貴衙門
會
貴
猷
離
堂
謹請察核
請煩查核惟外部來文所稱原奏。尚未查到。須至咨呈
者。

計鈔單三件

光緒十九年四月初三日

以吏人書
容文

傳經樓校本

咨總理衙門並北洋大臣李 與法外部再論越

南流寓華民身稅

爲咨呈事。竊照越南等處徵收華民身稅一案。前經法外部先將該處鈔送新章一通。咨送查閱。聲明凡有華商。經中國官員向法國領事等官。請領護照者。准赴越南及北圻地方出入往來。限兩箇月內。免徵內地一切賦稅等因。比經本大臣咨明 貴衙門查核在案。查華商赴越南及北圻往來。限兩箇月。免徵內地賦稅。爲期太促。因飭代理使務駐法參贊慶常。往法外部再與理論。須將身稅一項。全行裁革。以蘇民困。茲據該參贊稟

稱與法外部大臣德維勒會晤。所論身稅並李梅在京辦理交涉事件。法商辦理鐵路工程之事。以及瀾滄江上游老撾土司之地。有屬越南者。應與中國會商如何劃分。請達總理衙門。以便開辦各節。不無關係。均已遵照本大臣所告各節。一一與辯駁等情。並將問答節畧錄呈前來。相應鈔錄問答節畧一件。咨呈貴衙門大臣謹請察核。又法議院會議鐵路一事。應併譯鈔。以備查考。須至咨呈者。

計鈔單

光緒十九年五月初一日

咨總理衙門並北洋大臣李 鈔送加那大新議

華民入口例章

爲咨呈事。竊查英國屬地加那大政府苛待華民一案。本大臣前經照會外部。請英廷設法。令其革除。俾華人往來加那大者。可以自便。旋接外部照覆。內稱加那大政府改易一千八百八十六年華人入口之例第十三條一節。已轉咨藩部大臣。俟接回音。再當照復。請爲查照等語。經本大臣於上年九月二十六日。備文鈔錄往來照會。咨呈 貴衙門查核在案。茲接英外部尙書伯爵勞德伯里照會。稱加那大新改華民入口之例。藩部

尙書已將此單轉咨加那大之總督。今藩部接得加那大議政院詳。茲特附上。貴大臣卽知其例。必須修改之故。並辯明。並無不睦於

中朝之意等因。相應鈔錄照會一件。報單一件。咨呈

貴

衙門大臣

謹請查照。須至咨呈者。

光緒十九年五月二十八日

咨總理衙門並北洋大臣李 與法外部詢問法

暹起釁情形

爲咨呈事竊查法國與暹羅啟衅一事英報屢言中國
將有派兵助暹之舉以警動法國法人亦有鑒於越南
前事不能不以中國爲虞稍覺躊躇本大臣思中國固
不願攙預暹羅之事致生枝節然處之當在不離不卽
之間若竟置不問難免爲法國所輕視且寓暹華民數
十萬未便漠視而瀾滄江上下游兩岸皆係中國雲南
之地誠恐法人肆然無忌得步進步亦不能不聲明在
先因函飭駐法參贊官慶常赴法外部詢問法暹起釁

緣由並與申說一切茲據該參贊稟稱已與外部大臣
德維勒會晤詢明各事據稱事可就範不致大動干戈
法不願兼併暹羅亦不廢其自主之權卽將晤談情形
及法遲起豐緣由電囑公使李梅詳達 貴衙門大臣以免
疑慮等情據此並送問答節畧前來相應鈔錄問答咨
呈 貴衙門大臣謹請察核須至咨呈者

計鈔單

光緒十九年六月十三日

咨北洋大臣 順直水災捐廉助賑

爲咨呈事竊查今年永定河北運河水勢盛漲衝決隄
埵順直數十州縣皆成澤國漂沒田廬爲近年未有之
巨災畿輔生靈屢遭昏墊困苦饑寒殊爲可念本大臣
查捐賑一事久成弩末遠隔海外措手尤難去年九月
本大臣曾經奏明請

旨將光緒十四年力襄蘇皖賑務之英國新嘉坡總督
施密司等傳諭嘉獎以資鼓勵而策後效除迭次函飭
新嘉坡黃總領事陸續募捐徑匯天津籌賑局外本大
臣又欲就英法兩館設法勸捐祇因參隨各員所得俸

薪俸形減折殊多竭蹶不得不酌予體恤茲本大臣自
捐庫平銀三千兩購買匯豐銀票相應附文咨請 貴
大臣飭交籌賑局查收備用稍盡微忱仍請示覆施行
須至咨呈者

光緒十九年十一月十四日

咨總理衙門

與法外部議保護暹羅並甌脫之

地

爲咨呈事竊照本大臣於十月二十五日承准 貴衙

門電開密英使言彼現與法在巴黎商湄江東岸局外地願歸中國及保暹之策欲中國亦助力向法商議以定三國共保之約可免後患希飭參贊思恭塞克與法外部言之得覆再商辦法等因本大臣查英法互商保護之約大致可望就緒不至決裂所議局外甌脫之地須由英法兩國派員往勘情形再行定奪其歸中國統轄一節屢見法國新報咸以中國並未用力無端得此

利益眾情頗爲不悅幸外部尙無異言英外部亦以中國此次爲之助力屢持公論謂此地歸中國爲最妥且欲令其地形寬闊本大臣所注意者一則欲以南瓠江卽大宣河爲東界可與法人界劃清楚卽將來車里勘界亦省無窮轆轤一則英法派員中國亦須派員同往以免車里南界受彼朦混已飭署理法館參贊思恭塞克與法外部商議法人未肯遽允現託英外部代爲磋商約須稍緩方有眉目至英法兩國互約不許因以甌脫地歸中國藉此另圖得中國利益彼旣互相猜防中國尤隱受其益此舉爲有利無弊矣竊查英法現定甌

脫之地可歸中國者東西約一百四五十里南北約三百餘里幅員不亞於帕米爾西南兩面皆據湄江形勝其襟帶之雄人物之蕃土脈之腴似過於帕米爾遠矣除緊要機宜陸續電達外茲將致英法外部照會暨思恭塞克來函法外部所印黃書並譯彙及一切信函節畧其十一件相應咨呈貴衙門謹請察核須至咨呈者

光緒十九年十一月十四日

咨總理衙門並

北洋大臣李雲貴總督王

與英外部理論英

兵焚燒虎踞關野寨

為咨

呈

事竊照本大臣於光緒十九年十二月十五日

承准

總理衙門貴衙門

電開滇督電稱月初有英兵二百餘

深入虎踞關距章鳳街相近之邦且寨焚燒野寨十餘

虜野人二名其兵官密約士聲稱上年英兵過境野人

攔路放槍奉札至彼罰錢交不滿數故焚燬十三家查

現有英參贊巴衛理在彼會同勘界而兵官尚深入邊

地橫行不顧大局請轉電向外部理論嚴禁以杜將來

等語除告歐使外希向外部詰問禁阻即電復等因准

此本大臣當已赴外部理論。電陳大概情形在案。查虎踞關距滇邊近。守新街較形寫遠。英人始終不肯認虎踞關在我境內。印度總督尤異常狡悍。此發兵焚燬野寨。正在勘明虎踞關界址之時。未始非明示不願讓關之意。蓋恐我力索此關。則彼讓地較多。情有所不甘也。本大臣察度情勢。勘分邊界。不可再緩。未便因爭論一隅。致妨全局。因與外部通融商榷。將虎踞關以東界線劃定。所訂條約。亦已告竣。自此其混詐虞。當可相安。前據外部送到節略。亦稱俟劃界條約定妥。英廷當囑英員於擬讓中國各地所居野人。不去切實管理。亦不干

預野人之事等語。是此後可無慮生事矣。然本大臣尤以兩國辦理勘界之事。愈速愈妙也。相應譯錄英外部所送節略。咨呈貴衙門查核。須至咨呈者。

光緒二十年正月初十日

會呈

貴

衙門

查核。須至咨呈者。

咨總理衙門並雲貴總督王 鈔送英外部請展

緩緬甸進貢年限

爲咨會事竊查緬甸條約第一款內開緬甸每屆十年向有派員呈進方物成例英國允由緬甸最大之大臣循例舉行所派之人應選緬甸國人等語本大臣初聞英廷意在延宕是以商議滇緬條約之先卽將貢事迭次催詢外部與印度部商議初次覆稱貢期應在光緒二十七年經本大臣按約辯論不稍鬆勁外部繼稱應在光緒二十三年最後乃稱光緒二十年爲初次派員之期然本大臣知其意甚勉強實爲議約不肯稍讓起

見姑作是說以塞中國之望。既而分界通商條款逐漸
議定。似聞印度總督深咎外部所讓較多。頗悔貢期之
太早。本大臣所以辦文催問。外部覆文果有聲請展緩
之說。本大臣思外部於分界諸事。頗能勉力通融。若必
責令緬員於本年入貢。爲期已甚匆促。萬一辦理不能
應手。轉啟後來玩視之漸。爰卽辦文允其暫緩一年。並
堅持原約。告以明年必須如約舉行。詎該外部以文中
無咨送
總理衙門
貴衙門 察度字樣。竟將原文送還。堅請轉
咨。希冀多許展緩之期。本大臣一面告以
總理衙門
貴衙門 必不能許多緩。姑允轉達。以候酌復。仍請
總理衙門
貴衙門

堅持約章。駁以礙難久緩。咨行使館。即可由使館照會外部。以杜彼族之覬覦。抑或由貴衙門再許展緩一年。以示格外睦誼。則日後責彼照約辦理。彼更無辭。總之非有絕大權利。絕大體面。足與貢事相當者。斷難允其常緩。相應將往來照會四件。譯漢鈔咨貴衙門督部堂察核。須至咨會者。

光緒二十年正月二十四日

咨總理衙門並雲貴總督王 收回英員新築天

馬關大路

為咨呈事竊照本大臣於上年八月二十九日九月二

十四日迭准

雲貴督部堂王貴督部堂

電開查得天馬關在猛

密邦欠兩山間坐東北向西南營盤基址洞門均存東

北至猛卯屬之蠻允六十里西北至大石頭一百里係

走猛洞大路路內屬猛名路外屬猛密英人所修由新

街達南坎之路係在關內山梁上又於十一月二十六

日承准

總理衙門貴衙門轉

雲貴督部堂王貴督部堂

電開天馬關

既允歸還關內英修之路如准其作為借用則華人亦

須出入情形如此均請酌定等語查本大臣初向英廷索還天馬關之時不知英兵已築新路卽英廷亦未之知也旣聞關內有英路一條較形掣肘固不能因此而遂不收回此關英人堅稱八募南坎往來之大路斷難隔斷歷年所用工程經費斷難棄擲且此時尙未竣工緬官亦未肯罷役本大臣與外部仔細商議知南碗河之南天馬關之北中國一小段地內有最捷之大路可姑允英人行走則所經中國之境較短不如所修英路之長而英路一條卽可永歸中國英人不復顧問亦不借用蓋旣爲彼自修之路雖名爲歸我若仍許借用究

恐喧賓奪主。彼將阻抑華人。我亦無從遙制。今許行稍北之大路。則離邊更近。且非彼所自修。在我立約限制。尤爲名正言順。今於約內議定。除中國商民與土人仍舊任意行走外。亦聽英國官員商民行走。英國如欲修理改築。以臻平穩。告知中國官後。便可動工。或須保護商賈。亦准籌備辦理。議定英國之兵。經過此路者。如逾二百名。若未經中國官答允。卽不准過此路。如在二十名以上。卽須豫先行文。知照中國等因。似於防弊之法。略備梗概。除條約另派委員賁送。總理衙門外。至英貴衙門。外部所詢。能否於未換約勘界之前。先將此路借用一

節應請咨行

雲貴督部堂貴督部堂

查覆以便答覆外部相應

將往來照會二件譯漢鈔咨

貴督衙門謹請察核須

至咨呈者

計鈔單

光緒二十年二月初二日

咨總理衙門 進呈新訂滇緬條約

爲咨呈事。竊照本大臣遵

旨。與英國外部議定滇緬界務商務約款。共二十條。擬
與英外部大臣勞德伯里。先將草約畫諾。以杜狡變。業
於本年正月二十日。專摺奏明。並鈔錄原摺咨呈在案。
本大臣隨於正月二十四日。率同參贊馬格理等赴英
外部。會同該尙書勞德伯里。將華英文約稿。互相畫押
蓋印。現復照繕正本條約華英文一冊。賚送 貴衙門。
謹請進呈

御覽。恭候

批准以備互換。並將本大臣與英外部互相畫押蓋印之華英文一冊。賚送貴衙門驗收存案。開辦施行。所有繕正之條約。暨畫押蓋印之條約。共計二冊。裝成一匣。並畫押蓋印之滇緬分界圖一分二張。茲派駐法三等繙譯官同知銜候選知縣世增。駐英隨員同知銜江蘇候補知縣沈翊清。賚赴貴衙門呈交。以昭慎重。除分別札飭妥慎經理外。相應咨呈貴衙門。謹請查照。分別驗收。恭進施行。須至咨呈者。

計開

恭繕進呈滇緬條約華英合璧文一冊
畫押蓋印滇緬條約華英合璧文一冊
畫押蓋印滇緬分界圖一分兩張

光緒二十年二月十八日

附錄新訂滇緬條約

第一條 一今議定兩國邊界自北緯二十五度三十五分起由格林尼址東經九十八度十四分卽北京西經十八度十六分之尖高山起隨山脊而行向西南過高崙坪及瓦崙山尖由此過華昌村與高崙村之中間以華昌村歸緬甸高崙村歸中國直至薩

伯坪。自薩伯坪起。其綫向西而行。稍向南。過式脫
崙坪。到納門格坪。由此綫向西南。隨山脊而行。至大
薩爾河。自此河源至此。河與南太白江相會處。分尤
克村在東。列棒村在西。自大薩爾河與太白江相
會處起。界綫溯南太白江而行。至此江與雷格拉江
相會。循雷格拉江上至其源。在尼克蘭相近。自雷格
拉江發源處。分尼克蘭古庚昇格拉在西。昔馬及美
利在東。其綫自來色江之西源起。至此江與美利江
相會處。復溯美利江上至其源。在赫畚辣希岡相近。
分克同村在西。列塞村在東。界綫卽循穆雷江向東。

南而行。至與既陽江相會處。然後溯既陽江上至其源。在愛路坪。然後由南奔江。卽紅蚌河西支源起。順南奔江而行。至流入太平江。卽大盈河一處。以上係首段之邊界綫。

第二條 一第二段之邊界。由庫弄河

一譯作葛龍江

與太

平江相會處起。循庫弄河經過其西邊一條之支江。

至其根源。自此向南而行。與洗帕河

卽下南太白江

相會。適

在漢董之西南。以麻湯歸英國。壘弄格東鐵壁關漢

董歸中國。至此溯洗帕河之支江而上。此江有根源。

最近孟定格江之根源。卽循山脊而行。向東南方。至

南碗河邊靠南之克沱以克沱歸中國配爾歸英國。循南碗河向西南方而行下至該河轉向東南處約在北緯二十三度五十五分其綫由此往南稍向西至南莫江以南蓋歸英國循南莫江而行至南莫江分開處約在北緯二十三度四十七分溯南邊一條之支江而行至蠻透南邊高嶺之脊約在北緯二十三度四十五分卽循此嶺脊而行此嶺脊係向東行稍向北至瑞麗江卽龍川江與南莫江相會處以蠻秀地方及天馬關欣隆拱卯各村歸中國此數處在以上高嶺之北首卽溯瑞麗江而上至此江分流處再溯

南邊一條之支江而上以江中大洲歸中國至此江與孟卯相對東邊合流相近之處如第三條所開中國答允由八募至南坎各路中之最捷一條大路經南碗河之南中國一小段地內除中國商民與土人仍舊任意行走外亦可聽英國辦事官員及商民游歷之人行走並不阻止英國如欲修理此路或設法改築可臻平穩告知中國官後便可動工辦理又有須保護商賈或防偷漏等事英國亦可籌備辦理又議定英國之兵可以隨便經過此路但如兵數過二百名者若未經中國官答允即不准過此路所有

帶軍器之兵如在二十名以上。即須預先行文知照中國。

第三條 一第三段之邊界。自瑞麗江與孟卯相對東邊合流相近之處起。照天然界限及本地情形。東南向麻栗壩而行。約到格林尼址東經九十八度零七分。北京西經十八度二十三分。北緯二十三度五十二分地方。有一大山嶺。自此循嶺脊而行。過來邦及來本隴。至薩爾溫江。江即潞約在北緯二十三度四十一分。此段由瑞麗江至薩爾溫江之邊界。應照第六條所開。由勘界官劃定。所有歸與中國之地極少。

須與孟卯至麻栗壩作一直綫爲邊界所包括之地
相等。儻查得合式可爲邊界之處。尙須加添少許之
地歸中國。則中國應將別處邊界之地給還少許與
英國。此事俟日後酌辦可也。自北緯二十三度四
十一分起。邊界綫循薩爾溫江至工隆北首之邊界。
卽循此工隆邊界向東。留出工隆全地。及工隆渡歸
英國。科干歸中國。由此循英國所屬之瑣麥與中國
所屬之孟定分界處之江而行。仍隨此兩地土人所
熟識之界綫。至界綫離此江登山處。以薩爾溫江及
湄江卽瀾滄江之支江水分流處爲界綫。約自格林尼址

東經九十九度。北京西經十七度三十分。北緯二十
三度二十分。約至格林尼址東經九十九度四十分。
北京西經十六度五十分。北緯二十三度。將耿馬猛
董猛角歸中國。在格林尼址東經九十九度四十分。
北京西經十六度五十分。北緯二十三度處。邊界綫
卽上一高山嶺。此山名公明山。循山嶺向南而行。約
至格林尼址東經九十九度三十分。北京西經十七
度。北緯二十二度三十分。以鎮邊廳地歸中國。然後
其綫由山之西斜坡而下。至南卡江。卽順南卡江而
行。約過緯度十分之路。以孟連歸中國。孟俞歸英國。

然後循孟連與康東之界綫。此界綫亦皆土人所熟悉。至北緯二十二度稍北處。卽離開南卡江向東略南。循山脊而行。至南壘江。約在北緯二十一度四十分。格林尼址東經一百度。北京西經十六度三十分。由此循康東及江洪之界綫。此界綫大半係順南壘江而行。惟除屬江洪一小帶之地。係在南壘江之西北。緯二十一度四十五分稍南。界綫行至江場邊界後。約在北緯二十一度二十七分。格林尼址東經一百度十二分。北京西經十六度十八分。卽循江場與江洪之界。淺而至湄江。

第四條 一今議定北緯二十五度三十五分以北一段邊界俟將來查明該處情形稍詳兩國再定界綫。

第五條 一現因中國不再索問永昌騰越邊界外之隙地英國大君主於北丹尼即木邦地及科干照以

上所劃邊界讓與中國之外又允將從前屬中國兼屬緬甸之孟連江洪所有緬甸上邦之權均歸中國

大皇帝永遠管理英國大君后於該地所有權利一切退讓惟訂明一事若未經大皇帝與大君后豫先議定中國必不將孟連與江洪之全地或

片土讓與別國

第六條 一約內所開邊界各綫及所附之地圖繪明詳細應由兩國所派勘界官比較劃定以免地方官民爭論如查得無論何處有未甚妥協者應行更正兩國勘界官查出所定界綫必須改易其互易之地不應僅視其地面之大小須論其地土地之肥瘠及緊要與否儻勘界官不能商妥應速將未妥情形各報明本國 國家核辦 勘界官又須設法查勘中國舊邊界名爲漢龍關者儻查得在英國境內英國當審察可否歸還中國

如查係在孟卯東南卽係在孟卯至麻栗壩直綫之

北邊則已
歸中國矣

第七條 一劃界之事經兩國勘界官勘定後兩國如有越界之兵寨等於八箇月之內一概退出彼國兵退此國立卽派兵接駐兩國應將退兵駐兵日期豫相知照自駐兵之日起應各擔保界內所居之各種野人安靜無事 除保護邊界各地安靜必應有之兵寨外兩國答允各不在邊界十英里之內建修新舊礮臺營寨英里量法係從最近之邊界作一直綫量之

第八條 一英國極欲振興中緬陸路商務答允自

條約批准之日起以六年爲期。中國所出之貨及製造之物。由旱道運入緬甸。除鹽之外。概不收稅。英國製造之物及緬甸土產。運出緬甸。由旱道赴中國。除米之外。概不收稅。其餘悉照第十條第十一條辦理。以上鹽米之稅。不得多於出入海口所收之稅。

第九條 一凡貨由緬甸入中國。或由中國赴緬甸。過邊界之處。准其由蠻允蓋西兩路行走。俟將來貿易興旺。可以設立別處邊關時。再當酌量添設。中國欲令中緬商務興旺。答允自批准條約後。以六年爲期。凡貨經以上所開之路運入中國者。完稅照海關

稅則減十分之三。若貨由中國經此路運往緬甸者。完稅照海關稅則減十分之四。凡有陸路出入貨物。應給發三聯單。即予口稅單照通海口岸章程一律辦理。運貨經過中國地段。如在此約所准之路之外。及有偷漏等弊。儻中國官願行查辦。即可將該貨充公。

第十條 一凡以下所開軍器。非經國家准購。不得由緬甸運入中國。亦不得由中國運往緬甸。此等貨物。僅准售與奉國家明諭購辦之人。不得售與他人。如各種槍礮及實心彈。開花彈。大小彈子。各種軍械。軍火。硝磺。火藥。炸藥。棉花火藥。及別種轟發之藥。

第十一條 一食鹽不准由緬甸運入中國。中國銅錢米豆五穀不准運往緬甸。鴉片及酒不准由兩國邊界販運出入。惟行路之人准其各帶若干以備自用。每人准帶之數應照關章定奪。若犯此條及前一條。即將所有之貨充公。

第十二條 一英國欲令兩國邊界商務興旺。並使雲南及約內中國新得各地之礦務一律興旺。答允中國運貨及運礦產之船隻。由中國來。或往中國去。任意在厄勒瓦諦江即大金沙江行走。英國待中國之船。如稅鈔及一切事例。均與待英國船一律。

第十三條 一中國 大皇帝可派領事官一員駐
劄緬甸仰光英國 大君主可派領事官一員駐劄蠻允
中國領事官在緬甸英國領事官在中國彼此各享權利
應與相待最優之國領事官所享權利相同如將來中緬
商務興旺兩國尙須添設領事官應由兩國互相商准派
設其領事官駐劄滇緬之地須俟貿易爲定 中英兩國
領事官在所駐之地與地方大員往來均係平行

第十四條 一英國商民等欲由緬甸 應向
合宜之英員請中國派駐仰光之領事官或邊界上
之中國官給發護照方能前往其護照式樣一邊英

文。一邊華文。與通商口岸所給護照無異。華民欲由中國赴緬甸。如願領護照者。可向華官請英國駐劄蠻允之領事官給發護照。儻遇中國別地有一英國領事官。亦可就近請給護照。

第十五條 一英國之民有犯罪逃至中國地界者。或中國之民有犯罪逃至英國地界者。一經行文請交逃犯。兩國卽應設法搜拿。查有可信其爲犯罪之據。交與索犯之官。行文請交逃犯之意。係言無論兩國何官。祇要有官印。便可行文請交。此種請交逃犯之文書。亦可行於罪犯逃往之地最近之邊界官。

第十六條 一今欲令兩國交涉與貿易日臻蕃盛。並欲中國派駐仰光之領事官與中國大憲往來通電。兩國答允。俟可設法通電之時。應將兩國電綫接連。此綫創辦之始。專寄滇緬官商等往來電報。

第十七條 一兩國人民。無論英民在中國地界。凡有一切應享權利。現在所有。或日後所添。均與相待最優之國一律。不得有異。

第十八條 一約內所開通商各節。俱非尋常款例。此由兩國察看地方情形。及中緬陸路通商應辦之事。互相允讓而立。所有互給權利。兩國之民除有同

樣情形外不得在別處接壤之地照樣索問。即使有同樣情形亦必有同樣之允讓方可。

第十九條 一以上通商章程係暫行試辦俟兩國察看得詳細情形如何去礙獲益可於交換批准條約六年後或中國願行修改或英國願行修改均可商議。儻兩國俱願略早修改亦可。

第二十條 一此約由 大清國 大皇帝 大英

國 大君主五印度 太后帝批准自畫押之日起

准六箇月在倫敦互換或能畧早亦可此條約應於交換後立即開辦現在

大清國各大臣先蓋用關

防以照信守

此約共四分華文二分英文二分

光緒二十年正月二十四日卽西曆一千八百九十四年二月初一日在倫敦立

大清國

大皇帝特派欽差駐紮英京大臣二品

頂戴都察院左副都御史薛

大英國

大君主

五印度

太后帝特派欽差管理外部事務大臣

勲賜極尊韞帶寶星世襲伯爵勞

各將

欽奉全

權文憑互相較閱均屬妥協議定條款如右

咨總理衙門並

北洋大臣李雲貴總督王

送譯印野人山新

圖

爲咨

呈送

事竊照本大臣與英廷商議滇緬分界事宜滇

省西南兩面均與野人山地毘連犬牙相錯延袤不下
千餘里英外部曾出示野人分部地圖一幅攷覈頗爲
詳實卽大金沙江以東野人種類不同名號不一分疆
畫界彼此截然此等野人雖非內地人民可比從前中
國以不治治之亦常羈縻勿絕涵濡

聖化者數百年近被強鄰以兵威脅服未嘗無喁喁內
嚮之心經本大臣儘力爭論旣酌量劃地分隸中國以

固邊圉而全體統本大臣尤愛其圖之指畫詳明因向

外部暫借翻印二十分又將地名另譯華文亦印二十

分以備分咨查考除咨送總理衙門雲貴總督部堂外相應將

華洋文野人山地各部野人界域圖各二分另野人山

地洋圖二紙咨呈貴衙門謹請貴督部堂請煩存案備查須至咨

呈送者

光緒二十年二月二十二日

出使公牘卷之二終
上虞鍾達卿承刻

出使公牘卷之三

無錫薛福成叔耘

書函 致總理衙門總辦

論接見外國使臣書 庚寅

敬啟者六月二十七日肅布英字第五號書計達 荃

覽

福成

到洋後倏已五月有餘察看交涉情形粗有所

見茲謹具一摺二片敬求

貴衙門恭遞除鈔稟咨照

外有摺中未敢陳明者請為

執事言之查西洋通例

於各國使臣來駐國都者平日接待禮文頗為周至異
乎尋常卽如朝會禮節其待各國使臣與本國貴戚一

體而與待國中之臣不同以寓賓敬之意卽以聯彼此之情福成來英四月除常例朝會外樽俎款接聽樂觀舞已非一次前日閱彼國泰晤士新報將此事著爲論說謂中國

皇上親政之後尙未接見外國使臣其意不無缺望且似咎中國使臣不將外人接待情形告知本國以致中外交際之禮厚薄懸殊云云在彼族不知中國堂陛尊嚴自有體制萬不能與外邦之禮相提並論然準情酌理歐洲各使駐京十數年尙未一邀

覲見似於情誼愬然

福成

竊揣彼族不久必有合詞請

見之舉。屆時似不能卻。然此議與其發之於彼而我始俯允之。不如發之自我。尤爲得體。若

諭旨定期召見。慰勞數語。俾各如所願而退。此王會之隆儀。實懷柔之勝算。福成於正摺中微引其端。附片復

詳陳之。而於明請

諭旨一節。仍不敢輕言於

君父之前。誠以事體重大。未可瀆陳。而區區之愚。終不能自閤。伏祈回明。堂憲裁奪爲禱。專肅布達。謹請

勛安。

七月初六日
英字第六號

論英使華爾身議華民入英籍書

庚寅

敬再啟者。昨聞人談及新嘉坡近事。知英使華爾身曾在貴衙門建議。令英屬地華民悉入英籍之說。此舉殊駭聽聞。卽飭參贊馬格理至外部。詢其知否。外部亦深訝異。謂華使老成穩練。不應輕發此議。

福成

竊揣情

形或因商議保護新金山華民。華使姑發此說以資搪塞。亦知其未必能行。遂未報知外部。從前威妥瑪常有此等舉動。希冀墮其術中。僥倖成議。出於外部之所不料。彼乃自詡其功。竊謂華使此說。直可置之不理。彼亦無從置喙。今日海外各國屬地。寄寓華民不下二三百

萬其墳墓眷口均在中國不願竟化爲異類亦正斯民
不忘本之意萬無拒之之理儻一國強令入籍則各國
必相仿倣英屬地之待華民除新金山外均尙不至十
分苛刻若法屬之西貢日斯巴尼亞之小呂宋其虐待
華人情狀殆不可言如悉令就地入籍則絕百萬華人
喁喁內嚮之心恐各國聞之益滋輕侮不獨以後保護
二字無可復言且非吾民所願辦理必多窒礙迨我旣
辦不動而彼據成約以相責召衅更多

福成

未知華使

是否實有此說 貴衙門曾否與之開議但旣有所見
不敢不罄其愚若因保護新金山等處華民與華使商

議未能就範。似不妨徑飭做處與彼外部磋商。此間各
島華民消息較靈。且事務稍簡。可以專精經理。斷不敢
稍有推諉。除電達大意外。茲再泐陳梗概。希卽回明
堂憲裁奪。是禱。手此再頌
勛安。七月二十日

論英派員駐喀什噶爾及商設香港領事書

庚寅

敬啟者。本月初六日。接奉 鈞署來電。當卽電復大意。

查英人欲於喀什噶爾駐員一節。前月下旬。敝署英文參贊馬格理因事至外部。晤侍郎山特生。曾言有三事相商。一中國回疆之西南。英屬阿富汗之東北。中間有地五六百里。爲布魯特遊牧所到。該部久去其地。幾同甌脫。旣不屬中。亦未屬英。而逼近俄境。恐日久必思佔據。英人不願阿富汗之與俄爲鄰。現擬占先手。會同中國勘明。分轄其地。以杜他族窺伺。一中國允俄在喀城駐設領事。其地實無貿易。俄人在彼設官。籌度一切。難

保不於印度有損英人隔在嶺外聲息不通無從窺測
擬請中國允英在喀設一領事以便伺察俄人一葉爾
羌之南克什米爾境內有一廢礮臺名曰剎衣都拉現
聞中國官兵屯紮其中此雖無甚緊要但此後卽當永
久駐守勿再棄去致被俄據以上三事是否與中國使
臣在此商議報知中國辦理抑由英國駐京公使在
總理衙門商量辦理囑馬格理詢覆福成當時竊揣彼
雖設爲兩可之詞實則隱謀已定必電該使華爾身先
探 鈞署意嚮再行相機設法又念 鈞署公事旣繁
其中委曲底蘊未必盡悉做處屢於新聞紙中見其梗

概倉猝間又無由詳達。因囑馬格理覆以不妨在此籌商再告。鈞署外部果不出。福成所料。諉以現印度方派員前往察勘情形。須兩月後再商。而喀城駐員一層。果囑華使在。鈞署開議矣。福成就馬格理所述三事而論。其第一第二兩端。若盡如該外部之說。似於中國無損。辦理得宜。或可有益。尙非專係彼之有求於我。故暫匿不以告。或將來由伊自行區畫。竟不再言。亦未可定。其駐員一層。則必須中國允准。方可舉辦。所以先行抽出來探口氣。再作計議。福成竊思駐員一節。於彼國誠爲大益。於中國似尙無損。何以言之。俄人覬覦阿富汗。

汗蓄意已久。若英派員在喀。則俄人圖阿富汗之舉動。纖悉必知。喀與印度呼吸相通。不致落人後著。此所謂有益於彼也。中俄接境。幾二萬里。萬一有衅。防不勝防。關外信息阻隔。不能靈捷。尤爲可慮。若喀城駐一英員。於英人通信固便。但使新疆大臣。駕馭外人有法。於我亦未嘗不便。且喀城北鄰俄。而允俄駐員。南鄰印度。而允英駐員。彼此接壤。事屬一體。此所謂無損於我也。惟俄於喀城。以貿易爲詞。英現無貿易。故不免閃爍其詞。或將來漸有通商之說。亦未可定。然通商一事。固無損於中國也。所慮者。喀城派員。係俄之專約。若許英亦駐員。

恐開他國照行俄約之漸欲將此一層幹旋妥協似亦
不難蓋凡條約本無之事如一旦驟議開端必彼此所
讓利益足以相當後來自不滋流弊喀城添駐英員此
條約之所無拒之原無不可但拒之而俄不見德英適
見怨則不如不拒而索以利益相當之前奉 鈞署
大咨議設南洋各島領事此事英廷允否尙未可必然
如檳榔嶼麻六甲柔佛等處能令允設領事固於保護
華民一事有裨惟香港一區逼近粵垣且華人生聚日
繁閩粵盜犯均恃此爲逋逃藪諸多掣肘從前屢次商
設領事彼國堅持不允 福成現擬乘此機會與之熟商

稍緩卽當鈔稟咨呈查核。彼以英人未到之喀城尙欲駐員。我以華人麇集之香港而與議駐員名正言順。若彼或有未便而因此輟喀城之議。我可不任受怨。若彼因喀城設員勢不能已。則香港之事。彼亦當就我範圍。然福成尙未以此二事明與相提並論。萬一彼遵公法先允我添設領事。鄙意或留喀城派員之舉。另索他項利益更妙。蓋因舊時交涉。喫虧甚多。所須更正者不止一端。則鈞署此時似不可鬆口。稍露能允之意。儻告華使以此事現方函詢。做處或稱已交福成就近與英外部妥商。似尙渾含無迹。是否如此。卽乞回明。堂憲

裁奪并乞先將大意電示爲盼肅泐密布敬請 勛安

八月十二日
英字第八號

上卷之片

卷之三

下

論中外辦事情形書

庚寅

敬再啟者。福成自到洋後。熟察交涉情形。大約彼國外部。尚能遇事主持公道。不如駐華使臣。一味日逞私意。強人所難。如從前威妥瑪巴夏里之徒。動輒要挾。實皆以此爲見長之地。非盡出英廷本意。論者咸謂外部。筭數十國交涉之事。統籌大局。故其心寬平。駐華公使。所筭祇一國之事。其心迫隘。皆欲多占利益。取悅於其本國商民。況從前中國未知外洋情形。所予外人利益。每以勉強得之。因而習以爲常。華使爲人。雖較威巴諸使忠厚。不甚生事。然受在華商民之懇懇。恐所難免。又如

所議英地華民入籍一事亦於理勢多所窒礙彼或如鈞署綜理各國各口交涉之事公務繁冗海外情形倉猝又難詳達所以輒思嘗試近來外部亦頗恃此爲獨得之秘鄙意交涉之事有必須在內地辦結者如重慶通商等事非由鈞署主裁斷難如此妥洽以其與內地督撫大臣行文商辦亦較順手也其不必盡由內地辦結者如保護華民等事或徑檄出使大臣與外部從容辯論或由鈞署主持而與使臣函電頻商務求靈通一氣蓋因使署事簡可以專精攷究全神應付且海外大局與彼國命意所在信息較內地靈捷也惟中

外相隔既遠。函牘往來。每延時日。又苦電價太昂。細情難達。福成現方籌輕減電價。疏通消息之法。俟有端倪。

再當詳細布達。請鈞署酌核示遵。敬泐。再頌。

勛安。福成又肅。八月十二日。

論添設香港領事及英派員駐喀什噶爾書 庚寅

敬啟者南洋添設領事一節昨備文照會英外部已譯

稟咨呈 冰案旋准外部文稱此事英廷現須詳審稍

緩卽復

福成

惟恐其將香港一區聲明除開不設則仍

無異買櫝還珠因囑馬格理以已意微探外部侍郎出

特生口氣明指香港而言山特生謂只要中國能得一

深明洋務之領事不致侵權越分亦無礙難之處察其

詞意似尙易商惟每事必設法支展俟迭經催商而始

辦則外部之常例也至喀城駐員一節邇來外部尙未

提及竊思此事係華使在 鈞署所請與南洋所請領

事初不相涉。惟目前彼之鬆口。實因有求於我。若知
鈞署於喀城之事。竟不通融。彼或因絕望而變前議。抑
或遽爾允許。又恐其已得所欲。轉將我商設領事之議
擱起。刻下鈞署似亦宜用支展之法。告以未知喀城
情形。以函詢彼處疆吏爲辭。一往返之間。即可展緩數
月。以觀動靜。將來確知其無甚關礙。再由鈞署另索
他項利益。相當之事。更爲妥洽。總之香港設領事與喀
城駐員二事。本係分開各辦。現似不必相提並論。惟內
外消息。卻須靈通。仍乞隨時電示。至鈞署慮及喀
城通商一事。似尙非彼族命意所重。如眾議以爲不便。

或將此層預與說明以杜後患亦無不可卽乞回明
堂憲裁奪除將外部照復譯稟咨呈外肅泐奉布敬請

助安

九月初十日
英字第九號

論藏印通商事宜書

庚寅

敬再啟者。查藏印條約第四款。有藏哲通商。應如何增
益便利一事。容後再議之語。福成詢之馬格理。據云。廓
爾喀等國。與印度通商。入印度境。不收進口稅。以英人
意在招徠也。印度貨入廓爾喀境。須納進口稅。以其地
素貧。不能不藉供國用也。將來印藏商務。若與議藏貨
入印。不納稅。印貨入藏。須收稅。英官似可應允等語。自
不妨以此說。知照升大臣。存爲此時議約之料件。因從
前各約。當時未審利弊。日久。每形掣肘。此後爭得一分
利益。卽有一分體面。且可據爲別案。張本也。愚見如此。

伏乞回明 堂憲裁奪爲荷肅此再請 勛安

九月初十日

廿四日

論添設南洋領事書

庚寅

敬啟者南洋添設領事一節頃已准英外部照復應允
尙無難詞其所稱間有待查地方情形刻下或難照給
文憑須由英廷察看定奪者係指新金山一處而言福
成現擬先將調左秉隆前往香港開辦一層及改新嘉
坡爲總領事兼轄檳榔嶼麻六甲各島之說備文照會
外部以免緩則彼族另生枝節查前任郭大臣議設新
嘉坡領事時開辦之初大費筆舌始獲應允後曾侯擬
設香港領事辯論再三迄無成議此次南洋各島及香
港之議彼遽慨然允諾固由

朝廷威福漸摩所致亦因喀城駐員一層彼所注意或
以此示先施之義聞華使在 鈞署開議未知曾否略
索他項利益示以可允之機抑或行查一說藉稍宕
緩以觀動靜想 堂憲必有主裁此事 福成 既未與聞
未敢遙參末議惟念南洋准添領事則法日荷各國屬
地皆可以次仿行徐商添設於海外商民大有裨益香
港准設領事則於廣東省垣政事裨補尤多是此舉在
我所收權利已不爲少其喀城派員英意重在伺察俄
情聞其所遣之員不必定以領事爲名若我駕馭有方
萬一中俄有釁我亦可藉英以察俄情似尙有益無損

侍訂議時斟酌可耳。鄙見如此伏乞回明。堂憲酌奪。
爲荷。除將英外部照復原文。譯漢咨呈外。肅泐奉布。敬

請

勛安

十一月初一日
英字第十一號

論添設南洋領事經費書

庚寅

敬再啟者。香港及檳榔嶼各島事宜。

福成

再四籌思。將

來開辦之日。香港歲費約略與新嘉坡相等。當以七千

金左右爲譜。似須由廣東

督撫

院就近在粵海關劃撥。歸

出使經費項下扣除。免如新嘉坡之由敝處收撥。以銀

易鎊。又以鎊易洋銀。輾轉耗折。更添往返匯費。惟派員

則須歸出使大臣。以便外部如有異議。可與理論。仍兼

歸粵省與使臣統轄。蓋其所辦交涉之事。大半關係地

方之事。所以與使臣勢難隔膜。而與粵省尤爲切近。義

當兩屬。稍殊各口領事情形也。至新嘉坡附近各島。查

丁軍門原文所敘計檳榔嶼麻六甲芙蓉白蠟石蘭莪柔佛共有六處若必處處循照定章添設領事殊恐所費不貲今籌變通之法擬改新嘉坡領事爲兼轄檳榔嶼麻六甲總領事俾其銜秩稍崇便於控制暫不必盡照總領事之例支領月薪稍資撙節惟其所管華民倍多事務較繁不能不添派繙譯隨員各一人襄理一切至其出赴各島巡護華民之費亦須覈實開報不出則不開支又芙蓉等四處應令該總領事選擇各處殷實公正之紳商畀以副領事名目月薪約以百金爲度如未得其人甯闕毋濫統計所用歲費當不逾八千餘金

之數較之歷年新嘉坡所用僅加一倍而六十萬華民
均獲保護裨益實多此缺地當衝要局面更廣非熟悉
洋情者不能勝任愉快查有使署參贊黃道遵憲精明
幹練曾充舊金山總領事措置裕如堪膺斯任以上辦
理各節擬請回明 堂憲詳悉指示二面容與外部商
定明年再行開辦手泐再請 勛安 十一月初一日

再論添設香港領事及英派員駐喀什噶爾書 庚寅

寅

敬啟者英廷允設南洋各島領事及調左秉隆往香港開辦業經外部照復陸續鈔彙咨呈 冰案 福成 前於

英字第九號函中曾聲明香港設領事與喀什噶爾駐員二事分開各辦不必相提並論誠以向來中外交涉之件外部往往設法支展且因到洋日淺外人之情實亦未能深信不敢遽謂確有把握也乃此次外部始終無一言阻難且並未支展時日慨然應允力顧兩國交誼實出意料之外 福成 前函謂其必因喀什噶爾一事以示先施

之義第念此事由華使在 鈞署所請應由 堂憲主裁非使臣所敢遙參末議則仍不欲以兩事相提並論之意乃近日外部侍郎山特生致本署參贊馬格理函措詞雖極婉轉而已微示責報之意竊思

福成

初接

鈞署大咨於南洋籌設領事一節頗苦無從著手及聞華使有喀城駐員之請乃得乘間而入先詰以公法中國在英屬地皆可添設領事繼又明指香港一區而言亦思彼若允我所請則我收回權利已多與彼所求既足相抵萬一不允所請則喀城駐員就此可作罷論刻下英廷既一一允許頗有意結歡中國若以施

而論似亦祇可俯允所求。向之不欲以二事相提並論者。今則勢不能不以此絜彼。又念向來外人要求利益。大都不盡循理。勉強得之。或僅有施而無報。此次獨致先施之意。亦未始非

朝廷近年德禮漸摩之效。若彼以好來而我漠然不應。恐彼謂中國之事。仍須待迫脅而成。轉覺乏味。至於就事而論。此舉在中國實亦無損。新疆距內地太遠。中外信息每患不能靈通。英俄同處一洲。而其互相猜忌之心。時見於日報。中國若許英在喀駐員。固可藉英以察俄情。駐英使臣常與外部往來。必能聞其消息。報知

鈞署若慮其藉此通商致各國競思援照則彼之派員
可稍變名目彼函中所謂經手領事人卽與另商再改
亦無不可茲將山特生原信譯彙呈覽敬乞回明
堂憲裁奪是禱手肅布達敬請 勛安
號

十一月二十三日
英字第十三

三論添設香港領事及英派員駐喀什噶爾書

庚寅

敬再啟者

福成

八月十二日致

尊處函中曾云萬一

彼遵公法允我添設領事則留喀城派員之舉尙稍可
設法另索他項利益未知 鈞署曾否籌及擬索何項
爲抵 福成 查俄在喀通商當時曾侯因此路商務初興
貿易未旺故於俄貨入境關稅一節暫允免征今屆修
約之期間俄尙未肯完稅此次英欲駐員或稍有商務
可與議明循照通例凡貨入喀境須照值百抽五章程
一律征收亦可使俄人無詞再圖宕緩日前馬格理見
山特生時曾言及此今其來函似已答允此亦利益之

一端然鄙意尙有大於此者。從前洋人在中國欲設領事。並不請中國准照。隨意遣派。竟若在中國有自主之權者。因而輒敢與地方有司。遇事掣肘。動輒要挾。蠻橫無理。查此事實不合公法。從前李傅相與巴西議約。欲復領事官領准照之例。甚費躊躇。然僅一弱國。尙辦不勤。此次趁英國欲在喀城駐員。可與議明。必須待中國給予准照。然後新疆地方官纔認爲英國領事。自此次爲始。各口領事亦必領給准照。此亦萬國通行之法。諒彼無詞堅拒。英人允許。卽可相機推之各國。一律照行。此則裨益更大。將來如遇外國領事官。桀驁不馴。我卽

可追回准照不認。向時肆行無忌之心。從此當可稍戢。
如索此項利益。似較入境征稅一節。尤有關係。至於通
商一節。在彼已爲第二層義。竊料該處荒瘠之地。貿易
亦驟難見旺。但不借商務爲名。則無端設一領事。恐啟
俄人之疑。故山特生致馬格里函中。已有商務字樣。竊
謂喀城遠在邊徼。果能商務大興。則照章抽稅於事亦
未爲無裨。並非損礙之事。似不必過慮也。愚陋之見。是
否如此。并乞回明。堂憲裁奪爲禱。手此再請。勛安。
十一月二十一日

譯錄英外部侍郎山特生致參贊馬格理函

敬啟者數月之前此間曾囑駐京公使寶星華爾身
勸中國允許英國派一經手領事人於新疆以爲兩
國獲益起見況俄國已有一領事在彼矣現英廷已
允中國派所擬領事官於英地望華爾身所勸一節
中朝亦能允許儻貴欽差能相助速允此事沙侯實
爲欣望然此舉亦於兩國商務及政務均有益處閣
下前來此間曾說英貨入華界中國或欲略收微稅
每百取五此節想亦不難特到辦理時須與印度政
府一商肅布敬請台安山特生謹啟

論大東大北電報兩公司訂立合同書

庚寅

敬啟者。大東大北兩公司報効官電訂立合同一節。十一月十八日寄上一電。因查該公司之例。凡爲電報公事發電者。不給電費。爰將辦法詳敘電中。惟須俟該局閒暇時。始能發遞。聞逾半月後。甫經達到。旋接鈞署來電。謹悉壹是。已經電覆梗概。所擬合同第二款內。除中國電報局外。不准別國公司在中國海邊安設水綫等語。該公司初意。欲作不准別公司在中國海邊安設水綫。而無別國字樣。則中國電局將來亦不能設。自斷無此辦法。理論數月。始改爲不准別國公司字樣。然合

同全款皆從此生根。北東公司所得利益祇此一事。至第一款明認其在吳淞等處設綫原係空文。並非實惠。蓋彼之設綫已一二十年矣。勢固難以不認而驟撤之。但我須以此說幹旋。方無損於體制。彼亦知此條並無所獲。而彼於第四第五第八等款皆予我以絕大權利。實專酬第二款之益耳。若第二款不行。則全款當廢。功敗垂成。殊屬可惜。竊意北東公司前函謂他國必生異議。實係兩公司爭論時情形。昔年大北來華先設海綫。大東起而相爭。謂英使威妥瑪前在鈞署理論滇案。曾議請英商在中國設水陸電綫。當時曾否答允。固未

可知而威使之藉端要挾不循公法亦與近來各國情

形不同

福成

近到外洋竊觀各國於電綫鐵路等事尤

以自主之權爲兢兢斷不任他人干預無論交何國何
人承辦惟其自爲酌度友邦不能過問查蒲安臣所定
中美續約第八款亦聲明電綫鐵路均係內治之法美
國並無干預之權光緒初年英商在吳淞私設鐵路經
沈文肅公力與相持彼遂停輟者殆格於公法也中國
二十年前於此等利害尙未深諳大北乘隙先來擅自
設綫當時亦以彼族饒舌爲疑慮並未從嚴禁阻以致
大東相繼效尤并託威使原議以爲券與大北兩不相

讓勢難堅拒。今大東早經設綫，則於威使前議一層業已安置妥帖。目下各國交涉與前迥殊，均能循理，且不生要挾之端，更無異議。鄙意乘此閒暇，亟定規模，收回權利，最爲要著。從前合肥傅相亦與大北訂立合同六條，惟於報效官電之外，尙無別項利益。且於合同字句未及仔細推敲，因有不准別公司設綫之說。彼時中國電局適自造綫，大東又來攬越，而大北乃趁此翻悔，不肯踐約。迄今未有歸宿。福成所深慮者，北東來華設綫而我未能禁阻，又不責其報效。若各國公司援照前來，我將無辭以拒之。凡值用兵之時，電綫尤關緊要。儻德

奧法倭諸國並遣公司來華設綫則中國爲各邦公其
通電之地門戶洞開何所底止卽如甲申年孤拔接法
廷密電掩我不備遂有馬江之失其時爲法通電者非
大北卽大東因我未訂合同故彼並無所忌也今之辦
法借北東兩公司之報効而予以保護兩公司爲名而
杜他綫之來各國公司旣知有此合同自不妄生覬覦
前電所云英丹俄公使若來問此事請以中國自主之
權回覆決絕者蓋彼使不能與聞明非國家交涉之事
則各國自不能援均霑之例爲辭因係我與該公司自
訂合同猶之在英購製機器法不能以此相責望在德

采辦軍火。奧不能以此相瀆擾也。況北東既爲我用。遇有他公司潛來設綫。彼必偵探密報。我可豫籌設法。禁拒。非若昔日辦理之棘手。福成深知電務關係緊要。派

員與兩公司理論。舌敝唇焦。已有八閱月之心力。注於其間。始獲漸就範圍。卽現擬九款。亦經句斟字酌。與彼往返駁論者五六次矣。硜硜之見。竊謂此舉。俾各國不生覬覦。永保中國自主之權。爲第一義。有事時受我監察。不爲我敵國通電。爲第二義。疏通中外消息。辦理交涉。隱獲裨益。爲第三義。中外各署。每歲可節省電費數萬金。猶係第四義也。前電各款。彼此磋商既久。大致已

無甚出入第三款應改之語謹遵 鈞電當與北東商

定惟中國電局與兩公司商訂各項章程一句仍擬作
爲允兩公司與中國電局自行商訂各項章程以下再
照 電示之語敘入則電局已獲無形之權利蓋合同
之語謂電局應商之公司則權在公司若云允公司商
之電局則權在電局查兩公司在中國僅有海綫數處
較之電局陸綫通連各省究有主客之分眾寡之殊察
其隱情似不能不聯絡電局且其交涉之事甚多勢固
不能不與商也 福成已於臘月初二日移駐巴黎而大
東總辦亦有事外出仲春始返倫敦 福成擬於回英時

再與商訂合同。俟議妥後。一面咨報候核。一面奏聞。請旨。緣前此大北合同六條。北洋曾有奏案。此次必須具奏。以示鄭重。乃足取信於洋人。俾無翻悔。而核定之權。仍在鈞署也。重洋遠隔。電價過昂。每致信息不靈。竊冀此局早定一日。卽早收一日。擲節之益。卽使趕速就緒。恐通行開辦。已在明年夏秋間矣。以上各情。敬乞回明。堂憲裁奪。肅泐奉布。敬請 勛安。
十二月二十六日
法字第三十六號

再論電報兩公司訂立合同書

庚寅

敬再啟者。前與北東兩公司先議合同節略。據稱該兩公司係英俄國家扶持創設。今與中國商訂合同。必須請示國家。並請將此節敘入合同之內。福成思我若明認其請示。必受彼國家牽制。且自主之權。隱被英俄干預。殊多不便。所以不允將此層敘入。告以此係中國之事。與英俄國家無涉。彼之請示與否。非中國所能過問。但我總不能明認耳。兩公司遂亦無辭。萬一英俄公使詣鈞署詢問此事。請明告以此非兩國交涉之事。應由中國自主。不願他人與聞。否則彼且認爲當問之事。

始而干預繼而把持流弊恐無窮矣合併縷陳再請
勛安 十二月二十五日

論與英爭坎巨提事及滇緬界務書 辛卯

敬啟者

福成

初在巴黎使館擬與英外部爭論滇緬邊

界事務及梅生罪案早欲剋期啟行適因感冒咳嗽頗

劇屢展行期旋接到

鈞署來電隨於十八日力疾過

海赴英十九日與外部面談一切廿三日晚又接鈞

電廿四日至外部辯論先後電復在案茲再將詳細情

形布陳查英人認坎巨提爲印度屬部一節去歲七月

中外部已有此說臘月初二日接鈞署十月初五日

大咨並鈔錄光緒十四年四月間疆撫咨呈五月間英

使華爾身照會益知此事在英人蓄謀已久故華使照

會有云欲免葛藤莫若早知坎巨提亦係久歸克什米爾所屬年呈貢獻歲受賜金等語。福成第一次晤外部時遵照電意祇詰其因何起釁并告以坎部久隸中國回疆管轄斷不能聽英國遽爾廢滅外部初以坎部納貢中國甚微支吾其詞繼以我所執者係兩國會商之正論遂有廢父立子之說而仍以電詢印督爲活筆第二次與之會晤則本鈞署電意詰以坎部與帕米爾中國視同一體新疆巡撫皆有管轄之權俄不宜佔帕英亦不宜佔坎且英若佔坎俄必佔帕中國更無詞以折之外部見我提及帕事意似稍動而深訝中國不

及時布置。且云英兵欲守興都哥士山門戶。意在保護邊界。亦於中國有益。窺其意似因彼前送帕米爾地圖。華使赴鈞署探問消息。未見動靜。疑我竟置度外。遂欲趁此下手。爲先發制人之計。免被俄人侵佔。福成告

以中國業經行文疆撫。在帕米爾立界牌。修墩臺。常時派兵巡歷。彼始欣然。意似大轉。惟仍以坎部與帕米爾情形不同。瑣瑣致辨。福成告以俄人方伺英之舉動。英

若佔坎。俄人豈肯甘休。則兩國兵爭方始。未見其利。外部始云。立即電詢印督。迅速妥商。再行回覆。除俟得確音。再發電外。茲將兩次問答節略鈔錄呈覽。滇邊土

司。屢有英兵騷擾一節。

福成

晤外部時亦經提及外部

答以分界之後。纔能相安無事。又云野人山地一帶。常有不華不緬之匪徒出而滋擾。勢不能不示以兵威。福成告以英在緬界剿匪。中國自不過問。但不應涉及滇界。以致土司屬地。時有驚惶。設因此啟釁。誰執其咎。且查照曾侯前議。英兵不應到騰越之西北。外部答以時異勢殊。難以執一而論。查從前曾侯與外部議明。緬甸所轄野人山地。以赤道北二十四度爲界綫。再北則本非緬屬。當由兩國另議劃分辦法。我如堅持此層。則裨益匪細。但外部以歐格訥前定緬約六條。未將此層敘

入頗有不能全認之意似亦將來分界時所不能不堅持之事

福成

因坎事喫緊恐論事較多轉難得力因告

以滇邊事另口尙須詳送文函又聞英廷現擬派歐格訥爲華使替人將來分界一事勢必以緬甸巡撫主政或以駐緬較久熟悉邊情之英員主政而以歐格訥綜其大綱

鄙

意曾侯前議

鈞署必有函牘可稽屆時檢

出與之辯論似亦不無稍補以上各節伏乞回明

堂

憲裁奪爲禱再坎巨提卽新疆識略及西域水道記之

乾竺特一統輿地圖之略楚特中俄交界圖之棍雜實

一地也不過譯音之互轉耳

福成

因教堂等事尙有須

與法外部商議之處俟坎事稍有結束擬卽暫回巴黎
并以附 聞肅泐布達謹請 勛安
正月二十七日
法字第九號

論英兵入坎巨提意在謀帕米爾書

辛卯

敬再啟者英兵入坎巨提意在謀帕米爾。外部已明明說破。足見彼國處心積慮。著著爭先。不肯落後。若帕米爾一地。俄人讓之。英人取之。無論俄人不服。卽中國亦何詞以自解於俄。而英俄兩不相下。其勢必至搆兵。屆時新疆邊外。必受波及之累。且兩國必有一勝。勝則更難免乘勢侵占。爲今之計。但求英俄各守本界。則中國西邊亦稍免多事。刻下專候印督回電。未知能否就範。卽使此事幸而完結。在我亦宜早設法。自固藩籬。聞外部函告華爾身。有言興都哥士山北。如中國自能整理。原無須英

人越境遠謀。帕米爾正在山北。而坎則通帕之道也。查中國一統輿圖所載。回疆之外。分別回部名目。凡哈薩克。布魯特。各種均爲中國轄部。無疑。自咸豐年間內地多事。未遑遠略。俄人因於中亞細亞境內。盡收諸部。英之印度。向以阿富汗爲屏蔽。其注意防俄者。乃在阿富汗以北。近年中俄分界既定。英人乃覺阿富汗以東。與俄相隔甚近。俄稍得勢。即可直窺印度。客歲所送帕米爾地圖。其是否意存嫁禍。抑或冀我之枝格其間。而俄之競心稍戢。或明知我未必收受。然後彼自取之。乃爲有辭。三者均未敢懸揣。但就鄙見測之。帕坎兩事似已

牽合爲一。若英知我意不在帕。彼以自籌保護爲言。中國旣難力阻。更非口舌所能爭。而坎部存亡。終在不可知之數。然此猶僅一小端。而後患之大者。則不可勝言矣。竊思鈞署統籌全局。於俄英交涉之情形。旣多成案可稽。卽新疆邊界之事勢。亦可函電查問。似宜通盤合計。斟酌一大中至正之道。速定辦法。卽帕米爾一事。亦當妥籌所以應之。則彼疑竇旣釋。可免枝節叢生。或又謂帕米爾以外。如什克南等處。似未必非中國之地。若我但受帕。則帕以外轉皆棄之。而英坐享其利。未免得不償失。然莫如乘此機會。索性與英理論。兼索什克

南等處彼若不允則我更有詞矣。大抵此等不毛之地。收之則猶獲石田。去之則慮撤門戶。總之兩利相形。取其重者。兩害相形。取其輕者而已矣。近者各部落之於中國。亦尙喁喁內嚮。有不願服屬外國之意。因勢利導。整頓聯絡。未始非策。管蠡之見。不敢不罄其愚。伏乞回明。堂憲爲禱。手此再叩。勛安。正月二十七日。

與英外部議坎巨提事問答節略

正月十九日申刻。偕參贊馬格理至外部。晤見尙書兼首相沙侯。侍郎山特生。印度部侍郎貝雷。寒暄畢。薛云。本大臣昨接到總理衙門來電。知坎巨提頭目

近因英兵侵界。接戰失利。現率男女五百餘人。逃至塔克敦巴什卡外。我總理衙門深爲詫異。請問英國與坎部究因何事起釁。並欲知英國實意如何。沙云。英廷並無欲阻坎入貢中國之意。亦不欲礙中國在坎所有之權。英兵在坎境內修路一條。僅欲保護疆界。不令俄人侵佔。並可保護中國疆界。因疆界若無別人侵佔。英國亦不欲出興都哥士山界綫之外。有所舉動。儻俄人於興都哥士界綫上佔一地方。則界綫東之華地。亦必被俄佔據。不啻撤我藩籬。中國旣不駐兵守坎。又不爲其應爲之事。如修路築臺。

等類。安能望英人寂然不動。不自籌保護之計乎。況坎酋所報中國之語。類多不確。該酋輕慢英員。已違條約。然我尙能寬恕。且此次築路。曾明告以欲保坎地。並保印度門戶之意。彼何得卽行招兵。以攻我築路之人。

薛云。坎酋有錯。亦應會商。

中朝辦理。何必操切從事。

沙云。事機緊迫。實不能待。

薛云。路有若干長。築到何處。何時竣工。

貝云。印度政府之意。欲築至坎巨提城。須察看情形。

或竟築至興都哥士山口進門處以便扼守山口現此路或已築進去或已全成均未可定沙云聞坎部於中國十年一貢僅沙金一兩五錢確否

薛云中國體卹遠人向不苛責貢物是以當時定貢甚微但係每年一貢並非十年一貢貴大臣旣云並無阻貢之意亦不欲礙中國所有之權請卽告我坎酋究如何位置以便報知總理衙門

貝云前此印度總督來信頗不欲干預坎巨提內政惟坎酋弑父母殺兄弟罪惡多端斷難勝任擬立其

子爲頭目。但近時尚未接信。

薛云。姑將此節報我總理衙門。俟

中朝之意如何再說。

沙云。英廷諸事。必與印督相商。此係前信所云。尙非
定局。但據我看來。印督或不至改易前意。且英廷苟
可合

中朝之意。無不竭力。

薛云。尙有一事須問貴大臣。敝處前接總理衙門電
報。現在滇邊土司。時有英國弁兵侵擾。此等英兵已
越緬界。前曾照會貴大臣。請速發電駐緬英官及早

禁止未知已電止否

沙云緬界與土司界總須勘劃之後纔有一定界限。現在英兵所到地方歸何國管轄甚未清楚。但近數日內英廷已告印度政府轉諭駐緬兵官辦事不可逆中國邊界官之意亦不可使中國邊界有不便之處。

薛云中國亦極願早將邊界分清以免滋事但不知貴國何時派員分界。

沙云大約須俟秋間先派歐格訥往代華爾身再議分界之事。

薛云從前曾侯與貴大臣說明緬甸轄境在野人山
左近者不得過赤道以北二十四度將來但照此辦
理自易分清界限且係議定之事可免多費口舌
沙云從前歐格訥在北京立約時可惜未將此層載
入曾侯前議我亦約略記之大抵此邊所讓之事必
由彼邊所讓之事而來若所讓之事未經載入條約
必由兌換所讓之事未經讓與之故但我極願互商
究竟可讓與否或讓至何處爲止如其可讓英廷向
來辦事大方決不計較可以放心言畢握手而散
與英外部議坎巨提事問答節略

正月二十三日申刻。偕馬格理至外部。晤見尙書沙侯侍郎山特生。印度部侍郎貝雷。

薛云。本大臣前日將貴大臣所言。電告總理衙門。昨日總理衙門來電。言坎部服屬中國已百餘年。該頭目卽有不是。亦應會商中國辦理。卽如近日俄兵游獵帕米爾。本大臣電達中國。言英廷意欲防俄佔帕。我總理衙門卽電許大臣告俄外部。俄國立刻發電。將該弁兵撤回。坎部歸中國回疆管轄。與帕米爾事同一體。俄現不佔帕。則英亦不應佔坎。請早日將兵撤回。

沙云。此次起釁。由於修路。請問此路應該修否。假如英國不去修路。中國肯修此路否。我知中國風氣。凡緊要邊境。平時並不防備。竟似開門待賊。直至有人經理。偏又出而阻之。我實告貴大臣。坎巨提乃中英最要門戶。可以直達帕米爾。不能不及早經營也。薛云。我接總理衙門來文。已行文新疆撫臺。須於帕米爾境內立界牌。修墩臺。常時派兵巡歷。仍須查明實在情形。妥商辦法。

沙云。我聞此語甚喜。只要中國有備便好。但說坎巨提與帕米爾一樣。此卻有辨。坎巨提服屬克什彌爾。

已久向聽印度總督號令其於中國不過年例進貢沙金一事爲數甚微似不能說與帕米爾一樣此層我要聲明在先

薛云此事我昨已說過中國不重在貢物而重在體統且坎之入貢在服屬印度之先設使百餘年之屬國一旦置之不顧豈不於中國體面大有關礙沙云中國於屬國凡有政治大端一切利害並不代之經理此與歐洲各國之事不同歐洲所謂屬國均有管理政治之權

薛云總之英若佔坎巨提俄必再入帕米爾中國斷

日修公牘 卷三 三
無辭以阻之。若英專恃兵力，則英俄戰爭方始，亦未見兩國之利也。

沙云：我立即發電與印度總督，總須商量妥法。俟得回電，再以奉告。

薛云：尚有告知貴大臣者。我總理衙門之意，萬一坎酋有廢立之事，必應會商中國辦理。方昭公允。本大臣因法國有事，不日即赴巴黎，並速候印督回電，以憑轉報。言畢而散。

論爭回坎巨提兩屬體制書

庚寅

敬啟者二月初三初九日續奉 鈞署兩電當經先後

電復在案

福成

自到英後已將坎巨提事與外部晤談

三次第一二次情形前已函達末後一次因守候半月
彼未將印督回電送來不能不再往詰問外部始終不
肯吐一實語總以印度政府目前既未商妥礙難憑空
回覆爲詞揣其用意良由狃於從前琉球越緬榜樣彼
謂此等極小部落一被吞併中國斷不能用大力與爭
若祇爭以口舌彼更可置之不理所以一聞派員會辦
之說卽甚不願慮我從此分其轄坎之權也乃託言未

接回電欲爲併翻前議地步。堅執如故。且謂外國卽辦事遲緩。較之中國猶爲快速。因詰以華使所行照會。亦僅認爲兩屬。今英廢立坎酋。不使中國與聞。兩屬之體何在。彼云坎酋更換。中國向不遣使冊立。今忽欲派員。恐係創舉。答以英忽廢立坎酋。亦係創舉。辯論一時之久。彼始微露其意。若中國派員會立坎酋。將來不沿爲常例。或可與印督相商。福成知再爭無益。不得不見風收帆。允暫回法候信。且申明向來坎酋繼立。是否由喀道就近派員。我不深知。日後之事。不妨查照向章辦理。以昭公允。又微諷以坎事尙小。若英不還中國體面。使

他國視爲榜樣。將來遇有中英俄三國交涉之事。恐更棘手。沙侯聞之。頗似心動。頃在法館接英館來信。知外部已送回音。願遵前說。已發銑電陳明。又探聞坎酋實係惡人。不值保護。印督現擬於其兄弟子姪中擇立一人。擇定後。卽請中國派員會同往立。竊思此事。選酋之權。隱屬於英。在我則僅如告朔餼羊。稍存體制。然坎之政權在英。實非一口。中國因有越緬前事。稍欲爭回體制。已若登天之難。爭回一分。卽保全一分。不過求勿損上國聲名。勿使他國效尤耳。派員一節。如電喀什噶爾道就近遴委赴坎。尤覺途捷而費省。且免彼以不能久

待爲詞則事不致中變也。

鈞署擬將帕米爾作爲中

英俄三國不侵佔之地。辦法甚善。前遣馬格理赴外部
微露此意。雖未始非英人所願。然亦有疑我受俄人之
囑者。有云三國旣皆不筭。終究恐多事者。而俄人之能
否意見相符。亦尙難逆料。卽華使樂聞一層。想亦須由
外部詳審。再行定奪。在我祇能相機措注。遇便調停。但
就節次而論。總須俟坎事妥協之後。始能理論帕事耳。
再目下與英外部辯論之件。一滇緬邊事。一梅生罪名。
俱在喫緊時候。若件件不放鬆。必致件件不得力。權其
輕重。則坎事視二者關係較輕。坎事旣可暫作收束。鄙

意滇邊之事緊要十位 坎何以言之滇邊表延三四

千里環境錯列之土司不下數十每一土司地廣人眾

皆數倍於坎英人初倖我不遽與分界乘間派兵迭入

土司各境肆其誘脅俾爲兩屬及我致詰問則以遊歷

爲名以勘界爲詞蓋西人狡謀先誘我所屬之小邦號

爲兩屬及旣兩屬然後劫以兵威奪其權利使我無從

插手乃其慣技也今聞普洱之車里孟連諸土司已被

英脅爲兩屬矣王夔帥函電頻仍邊警日至竊恐日後

非但原議之作爲甌脫地者及擇人南掌之應歸中國

者俱爲英有漸且齟及土司漸且睨及內地大局將不

三傳經樓校本

堪設想

福成

是以不憚煩難擇邊事之確有證據者逐

件與之理論雖未能顯著全效或可冀爭回二三而其

不早分界之隱謀微經

福成

點破所以近有欲商分界

之說刻下最要關鍵似宜由

鈞署主持趕速派員分

界以清輭轡譬之門戶謹嚴則宵小自絕覬覦也以上

各節伏乞回明

堂憲酌核爲禱肅泐布達敬請 台

安 二月十九日

論駐京各使 覲見書 辛卯

敬再啟者前奉 堂憲吉字第十三號公函并鈔件敬
悉

覲見一節此係各使無理取鬧 福成 以爲 承光殿之

見已屬格外優待曲示懷柔若再有後言祇可暫置之

不理 福成 正月間抱病在法未能自赴外部先飭參贊

官慶常往告以 鈞署來函大意法外部尙無偏聽爲

難之處但以年例在邇德國巴使駐華已久當推渠領

袖法使無格外吹求亦難獨甘退讓云云 福成 由英

回法二月十一日偕慶常往晤外部尙書李寶其語意

尙與前無異茲將面談節略一件鈔錄附寄又有瑞士國女子遊歷廣東一案粵省以無約之國不肯蓋印外部則謂無約之國可請友邦領事保護係各國通行之例斷斷爭論

福成

因思中國駐法駐德使臣往來俄奧

荷義等國偶或道經瑞士未嘗不用德法護照保護智利厄瓜多等處華民我亦煩英公使領事保護若我力擯此例自立於公法之外尤多窒礙喫虧之處此事似與認法保護別國教務不同若果無甚關係應否速許以省口舌方可於事之大者以全力與之堅持附鈔外部節略呈覽擬請回明堂憲酌核爲荷手泐再頌

台安
二月十九日

論商立坎巨提新酋書 辛卯

再此次坎事與英理論英雖隱司其柄而面子則大半
須讓中國英亦有借重於我之處已算格外遷就惟初
議立坎酋之子而坎酋舉族出奔不敢還國現今坎酋
舊臣暫攝仍由印督設法招致聞坎酋之子甚幼恐難
一定招到現議在其兄弟子姪中招立一人總不出舊
酋一家之中惟華員未到以前英人不得先將選定人
名說出並請 鈞署電告疆撫或喀道嚴諭舊酋以中
國最重孝悌之道該酋平日所爲悖於倫理是以中國
不能許其復位現已會商英廷在其家中選立一人云

云不必宣明廢立爲英人之意示若中國之意本如此者則體統益尊矣擬請回明 堂憲察酌辦理 福成又

肅
二月十九日

論滇緬界務書

辛卯

敬啟者前奉客臘 鈞電以騰越西北沿邊土司報稱英兵游弋邊外已過野人山勢將入境人情洶洶屬告外部速電緬督轉飭英兵切勿越境等情旋即商之外部彼以我電不能指出英兵實到何地爲辭謂印度部不肯發電

福成

竊思土司所屬極小地名華洋各圖多

未採入且中外命義不同譯音更滋歧異本屬無從查攷曾發漾東兩電略陳梗概旋將滇省來函仔細查核並閱倫敦新報稍知英兵所到地名於是迭發照會與外部理論如隴川土司所屬之漢董有英兵四百踞駐

則請其立即撤退。野人山地之薩洞納被英兵攻破，則責其不應輒至近邊滋擾。已各將洋文牘彙譯漢咨達冰案。外部均以行查緬督爲徐作轉圜之計。固未敢悍然不認也。伏查英人佔據全緬已七八年。聞其密計在遲遲分界。欲使我門戶洞開。彼乃以派兵勘界及遊歷爲名。窺伺滇邊數十土司。往來姦忽。脅爲兩屬。然後徐與我分界。各土司既有兩屬證據。一俟有隙可乘。彼卽以兵佔取。再閱數十年後。土司之存者幾何。土司盡而內地亦告警矣。此其狡焉思啟之故智也。福成頗窺見及此。故於野人山地各事。不憚悉力與爭。春初因坎

巨提事赴英之便復與沙侯商論兩次微示以滇緬若未分界則商務斷難開辦彼既欲盼通商之利又自覺機謀漸露知我未必竟墮其術中於是毅然有劃界之說送到節略一通附圖一幅彼時坎事相持正急未暇詳細攷覈日內始擬一節略覆之檢查舊卷當英兵進據緬甸之初鈞署疊電有展拓邊界之議英人亦自以驟獲全緬已饜所欲曾惠敏乘其有願讓之意遂與外部議定節略大致讓我約有三端一普洱西南邊外之揔人南掌各地均歸中國一大金沙江上立一中國碼頭一大金沙江爲兩國公用之江俾中國船可行走

出海又野人山地。在二十四度以北者。昔時本非緬地。應俟滇緬劃界之後。另由中英兩國會勘劃分。此一端則我有此議。而英人亦未駁復者。竊釋 鈞署展界之意。豈不知邊外磽瘠之地。收之無益。誠以界不稍展。則彼之鐵路直抵沿邊。各土司被其侵逼。而無甌脫之地。以闢之。必寢受彼誘脅。後患甚巨。故拓之所以固吾圉也。迨 鈞署與歐格訥議約五條。似以兩國派員會勘一語。括前數端在內。或因罷去西藏遊歷一節。稍有更換。亦未可知。然此數端於滇邊大局。關係甚重。觀於外部所送節略。反欲我將滇邊讓進一層。則我之不能不

堅持前說更可概見。總之邊外隙地如擇人野人等種類不齊。所有翡翠玉石紅藍寶石琥珀金剛鑽之屬。礦產多出於此。我視之爲棄壤。彼視之爲寶山。我得之固無甚裨益。彼得之則獲利無窮。然我得之以屏障諸土司。俾其地不與強鄰犬牙相錯。則無用之用。爲用實大。蓋此等地在百年前得之。猶獲石田。今則恃有石田環其外。而膏腴之地方可任我安心耕穫。此形勢之自然者也。且此數端爭之亦未必全得。然有明知彼甚欲之。而我故靳之。繼乃相機度勢。徐讓一二。以調換他項之利益。如是則棄之亦不徒擲。通盤計算。或能爭得十之

六七當於滇邊大局有裨。福成所以先答外部節略一

一援照前案聲明。鈞署難允之意則將來更易措詞

但條約中並未敘入彼必藉端辯論不得不徑以漏敘
告之明知當時或別有調換之處或因有他事牽掣未
必定係遺漏然使竟如此次外部劃界節略則是中
既失緬甸於前復蹙滇界於後殊覺喫虧已甚今欲與
之爭論必須援引前議方能得勢欲解條約未載前議
之故必以漏敘爲詞方可著力且此間卷據較齊人證
具在料外部亦難盡翻舊說馬格理亦云譬之購物此
次外部節略係是第一次討價彼亦將視我還價以爲

進退。

福成

恐彼希冀一生較難應付。是以不待鈞署

之裁示。輒先告以難允之意也。惟外部派歐格訥來華。似有深意。聞須秋初起程。其人精明彊辯。過於華使。且係原訂條約之人。萬一堅執不肯稍讓。或假託外部之意。不允通融。則屆時易致棘手。儻由

福成

徑商外部。則

中間先少英使一層之隔闕。或稍易於磋磨。

福成

因在

洋不服水土。俟到冬底期滿之時。亟盼趕早交卸啟行。

回華調理。儻此函到時。

鈞署欲乘歐使未到之先。豫

爲措注。應請斟酌機宜。或函示。或電示。並明告華使。以

商議界務一事已交

敝

處辦理。則外部亦不能見拒。

福

成尙有半年工夫可與外部妥商外部如能就範圍善
卽使堅持不讓冬間必已定局再瀆亦自無益竊料此
事歐使若不從中阻撓外部自少扞格如能爭到得半
之數或更有進於此者福成自當相度情勢遙承 指
示爲見風收帆之計但能將大概規模先行商妥卽歐
使到京不過再商詳細節目彼自不能要挾 鈞署亦
不致爲難抑或索性俟歐使到京由 鈞署一氣與之
妥商亦請示知大略福成尙當檢鈔舊卷之緊要者咨
送以備查核除野人山地事已另案議辦外茲將外部
往來節略各一件外部所送地圖一幅附寄伏乞回明

堂憲定奪爲禱。外部洋文地圖。茲已譯填漢文。並將
古今地名。略爲攷證。而英人前所議讓之地。及今所欲
進佔之地。形勢似尙清晰。肅泐布達。敬請
台安。三月初四日
日法字第
十一號

論會立坎巨提新酋書 辛卯

敬再啟者。坎巨提事已詳法字第十號函。續奉 鈞署
兩電。華使所解後不爲例語。全係臆說。然若不加駁正。
彼必執爲把柄。將來又多波折。福成前與沙侯所論此
次廢立坎酋。事屬非常。必須由中國派員會立新酋。以
作兩屬之證。至於尋常繼位。是否由喀道就近派員。須
查照向章辦理。如向係派員。則仍派員。向不派員。亦不
因此次派員而援爲常例。萬一再有廢立。卽係非常之
舉。非但必須派員。且必須會商中國無疑矣。華使忽謂
坎再鬧事。英自辦理。中國不能過問。似係有心朦混。因

函飭馬格理赴外部申明前議並詰以華使誤解之語。山特生云外部發電並無此說想係華使誤會然將來中國援別理以爭會立坎酋之事外部無阻止之意何必多慮惟尋常繼立照向來同樣辦理印督已電駐坎之英員探訪呈報等語立子一節並中國派員未到不得說出所立人名業經再四申論外部均允切實電商印督貢金賞緞一切均照舊章總之英人狃越緬前事謂一經吞併中國卽不能過問此次坎事尤忌我之插手動以中國向不筦坎事爲詞儻彼竟置不理殊難以口舌與爭。福成不能不相機應付委曲求全以派員到

場會立新酋。暫作收束。保全兩屬面子。僅稍勝越緬事。
一籌耳。雖較之會辦字義爲稍輕。然當時若再與爭恐。
其併翻前議。據山特生稱外部勉囑印督轉圜。甚費周。
折。似非盡誑語。帕米爾事尙未與議。聞外部之意似欲。
我先與俄商定耳。再頌 台安。三月初四日。

四論添設香港領事及英派員駐喀什噶爾書

辛卯

敬密啟者前在巴黎接奉吉字二三四號 堂憲鈞函

謹悉壹是三月廿五本月初一初六等日疊奉三次

電示

做

處發有三電布達大意想均登

籤記矣

鈞

署來電之意欲將喀什員港員兩罷以作收束自因華使

言香港領事請派稅司又謂英廷不發准照致有此議

然與外部現商情形實已不符電文簡略易致誤會茲

特詳陳之溯查喀什事發端係在去秋七月其時

做

處添

設南洋領事一層尚未咨照外部迨後外部照復允准

始又明提香港一區已在十月以後與喀什議絕不相涉

福成

秋冬之間疊次布函俱謂兩事分開各辦卽與外部言港事從未一語牽連喀事在內不過因彼意有所求隱相抵制並非顯爲互換之局此次若因喀事而罷港議不獨喀事能罷與否尙無把握而港員之設原據萬國公例而言且暹羅日本皆已有香港領事而中國獨無之英人亦自覺其不情所以不能不允今旣得而又棄之轉覺難以措詞若明言因喀事難在應俄牽連而罷則恐更着痕迹邇來兩國相交有不妨揭其隱情以告人者有不宜露其隱情以示人者卽如華使來言喀事固可明告以難在應俄藉索應得之利益兼以示

德於彼。若以喀事而至願罷港員。使英人謂我意在親
俄。則必以忌俄而啟嫌。謂我意在畏俄。則必以輕我而
變計。鈞署慮及俄之見猜。亦宜防及英之生隙。大抵
港議之成。由於英廷明示睦誼。客秋華使請喀城設員。
鈞署以香港之事折之。實已握其肯綮。俾英人有歉
於中。而激其先施之意者。未始不因乎此。然沙侯以宰
相而兼外部。位尊望重。左黃之派。港坡既有復文允准
在先。今我忽欲罷議於後。在我固失其權利。在彼亦失
其體面。以後遇有交涉之事。恐難和平商辦。勢當較前
棘手。諒鈞署必不願有此反覆籌思。祇能抱定原議。

責其不應將港喀兩事牽混致華使在 鈞署曉瀆外
部此次辦事亦尙大方不欲顯露抵制之形業已電飭
華使勿阻港事此事因 福成 馳赴法義兩國留住數月
不能兼顧遂生波折費盡氣力與之理論始仍以辦妥
港員爲收束然已舌敝脣焦矣至於試辦一年之說 福
成初亦疑其卜喀事成否旋聞香港總督不願中國在
彼設員轉謂華民多所疑慮有函到其藩部茲外部已
商之藩部函勸港督勿稍梗阻并云以試辦釋華民之
疑且爲港督前議轉圜又據侍郎克蕾面稱決不因喀
事而圖抵制但使年內華民不與領事爲難領事不侵

英官之權。卽係長局。從前新嘉坡開辦之初。亦云試辦。久而相安無事。卽以爲常。蓋華民之喁喁慕義。不至滋事。事實有可豫必者。請紓。厘慮。交犯一層。須領事官設定後。察看情形。方可妥議章程。此事自有公法。不必預提。且所關不僅香港一區。不宜於此時添入多費筆舌。准照一層。英章與美國不同。必須奉有諭旨。始給文憑。外部電告華使。亦如此說。現惟靜待電傳奉。

旨日期。卽可請發准照。飭左黃前赴新任矣。竊思華使以港略兩事相提並論。致多周折。似非盡出外部初意。

或因赫德近在咫尺。就與商議。作此狡獪。亦未可知。九龍稅司兼辦一層。既與外部申說。外部亦不謂然。蓋華使既欲用稅司。斷無不與赫德籌商而先自開口者。況赫德意在攬權。彼既聞有此事。恐不免挾私指使。另生枝節。尚祈鈞署隨時留意。爲禱。刻下喀事既言明與港事不相牽涉。則操縱之權自在。鈞署儘可從容商辦。談笑應之。赫成竊觀近年中外交涉大局。似有轉機。歐洲諸大國。頗思結好。

中朝引以爲重。中英交固。則俄益重中國。中俄交固。則英亦重中國。英俄雖互爲猜忌。旦夕亦未必有釁。其視

用兵極爲鄭重。各報館播弄筆墨。臆測之談。未可盡信。
竊謂中國此時。正宜兩利俱存。於投桃報李之中。寓鑑
空衡平之意。則柔遠綏邊。中外蒙福矣。愚見如此。伏乞
回明。堂憲裁示爲禱。除俟將修約各事。另函續陳外。
肅泐密佈。敬請 勛安。
四月十二日
英字第十四號

論英員駐喀偵俄書 辛卯

敬再啟者。正在封函接奉吉字第五號 堂憲鈞諭。敬

悉種種。港員既允喀事。亦難終拒。憲意極爲持平。西

陸逼近強鄰。得英牽制。亦可戢俄戎心。尤爲不刊之論。

無任欽佩。蓋交涉權利。撈到一分。卽得一分之益。前者

港員機有可乘。未便逆料其別有所求而拒之不受。現

敵處已與外部論明。不能將港員喀事兩相牽涉。則

鈞署應付此事。尤可操縱自如。第念英廷既力顧邦交。

則中國不能不答其好意。將來應允之時。稅則一端。固

爲易辦。准照一節。亦似不難。福成初回倫敦之時。聞外

部以早允港員有自悔失其把握之說。因念英廷旣意在偵俄。乃告以派員游歷。常住喀城。亦可偵探而於事更無痕迹。不致啟俄猜嫌。外部始以實情相告。謂現有游歷之員在彼。由鈞署給與護照前往。福成因謂如此則同一偵探。何必更請設員。多費周折。外部亦遂無辭。但平心察度。彼旣先施於我。恐未必遂能忘情。鄙意俟其再來開議之時。鈞署當詢以虛設領事。與派人游歷常住。有何利益分別。因告以如允設員。此後亦仿西法。凡設領事。須中國給予文憑。方可作准。卽以此次喀城之事爲始。并告以英國旣允將推行各國。度華使

亦不致爲難。而納稅一層已有端倪在先。祇須臨時一
提。不必多費議論。是兩端利益。或尙可兼而有之。即使
僅得一端。而我據以明告於人。則各國無從援照。俄人
亦不敢嫌疑矣。福成因昔年舊約喫虧之處頗多。如能
相機乘便。逐漸收回利權。未始無裨。似未便逆料其不
允。過於持重。坐失事機。此事當由鈞署主持。福成特
竭其一得之愚。用備芻蕘之採。并乞回明。堂憲是否
可行。裁示爲禱。

論辦理教案書 辛卯

敬密啟者五月二十八日接奉 鈞署來電謹悉壹是
敝處於本月初二初五日發過兩電知已早經 鑒及
福成 接電之後當日即赴英外部詳達 鈞署之意外
部副尙書克蕾初聞辦法似已滿意且云緝犯既嚴再
議賠償即可了結越數日侍郎山特生又稱有一天主
教之公爵及威妥瑪相繼到署謂中國不認真辦理則
法人不服必糾合英德兩國多生枝節且教門力量較
大足以鼓動議院屆時外部亦無法阻止察其詞色似
因接在華英官文函又稍蓄他意者當即相機與之剖

辯又據駐法參贊官慶常來稟言往告法外部據外部之意祇在嚴防未來不在苛懲既往所言極爲近情越數日又稱有法兵官自中國發電到巴黎謂此次滋鬧係有會匪煽動中國官員束手無策勢須彼國自辦云云此係彼族恫喝長技若欲藉此啟釁者然我自審辦法不錯豈能盡如彼意彼固無如我何也福成現又函致該參贊以目下平靜情形告之矣竊查西人傳教雖條約所許而數十年來民教不和勢同水火終非久計似宜俟全案清結之後借此事爲由與之理論設法挽回卽如中國與美立約明言待中國人與待最優之國

無異。及至華傭在彼種種不妥。卽云有礙於其地方平安。初議立法限制。繼竟禁絕不許登岸。若執條約而言。大相逕庭。而彼竟悍然行之。中國不能責其違約者。以民情之所不便。條約可得而變通也。且近日德法義奧等國於教民限制約束。與二十年前大不相同。彼在本國則禁約之。在中國則縱庇之。亦甚不合於公法。福成愚見此次拆毀教堂之案。幾近十起之多。初疑有會匪暗中鼓煽。繼思民情憤激。亦概可想見。必其平日有恃教欺壓情形。蕪湖並無殺死教士。必須擬抵之事業已正法二人。辦理非不從重。而彼國公使猶在鈞署曉

瀆是直一味蠻橫而已。猶憶同治庚午年天津案結之後。當時鈞署曾議辦法八條。照會各國公使。旋聞各使相約駁回。其議遂罷。實則此等情形。若令彼國外部詳知。未必盡以各使爲然。刻下中國既有使臣駐洋。與彼外部可以和平商辦。非復如前隔膜。竊謂此次案結之後。或仍將庚午年所擬辦法八條。或量爲增損。由鈞署行文來洋。囑使臣照會外部。稍改前約。妥籌辦法。但抱定民教不和。有礙地方太平立論。不過多費筆舌。儻稍能就我範圍。所裨甚大。即使竟難依允。而我先自立腳。萬一再有民教不和之事。轉足間執彼族之口。似

亦相時補救之一道也。查西國通例遇有此等案件大抵命意重在賠償不在多誅兇犯竊謂除人命緝兇擬抵外其餘各案若僅愚民逞忿既許賠償似當堅持定見不允株連庶可固結民心至此中如查出會匪實在蹤跡固當嚴辦乃自治之道如此其迹雖因教案牽涉其意實不與教案相關也再威妥瑪居鄉家食已久素不出門而精神甚健前日忽聞親赴外部頗以中國教案迭起有愆惠藉端挾制之言似有覬覦復出之意果爾則以後辦事又將棘手

福成

尚須設法措辭以解外

以上各節伏乞回明

堂憲裁示爲禱專肅布

達敬請

勛安

六月十一日
英字第十七號

出使公牘卷之四

無錫薛福成叔耘

書函 致總理衙門總辦

論英兵焚殺野人山寨書 辛卯

敬啟者本月十一日肅布英字十七號函想達 籤記
做處於五月二十八日接奉 鈞署三月二十九日吉

字第七號 堂憲公函并鈔示滇省督撫咨文一件謹

悉壹是 福成 查騰越鎮所稟野人與英人互相焚殺一

案其地是否係中國土司轄境並未申說明晰但稱隴
川與緬甸分界係在洗帕河麻湯在洗帕河以內洋人

所焚之三寨。尙距麻湯五六十里。究竟野人殺斃洋人之處。及洋人焚寨之處。是否在洗帕河之內。抑在河外。此係緊要關鍵。亟宜澈底根究。查出實在地址。使館無滇界精確地圖。而相隔過遠。倉猝難以查攷。因思此處野人若果係中國土司轄境。則有殺斃洋人多命。彼族或未肯甘休。我一提及。轉恐惹出枝節。若我明知此事。而視爲無甚要緊。恐其指爲緬屬舊境。視爲己有。不但將來據爲分界張本。或彼邊吏藉端嘗試。滇邊從此多事。皆在意中。所以此時照會外部。必須斟酌盡善。至騰越鎮所稟洋人在該土司境內繪畫地圖。及普洱鎮迤

南道所稟委員刀丕文遇見洋官踏勘緬屬地界各節。大抵皆預爲將來中緬分界起見。洋人到處用心。凡事必占先手。此其長技。福成正月間所陳滇緬界務一摺。謂我若不求展出。彼或反將勘入。卽已慮及此層。前據遊歷人員姚道文棟密報英兵屯駐新街。爲剿撫野人山之計。果爾則騰越一隅愈形侵逼。鄙議所以欲及早開談。稍留甌脫。以界隔中外也。英員不請中國給發護照。輒至中國所屬土司地方。於理亦屬不合。洋人性情。我若準情據理。直指其失。轉可使之折服。福成已於本月初五日照會英外部。告以近來英兵遊歷中緬交界。

地方有未合常規之處請英廷諭知鎮守緬甸大員如有遊歷人員欲往中國地界者必須先行知會給發護照以便保護儻兵丁等遊歷邊界者不得准其越界免滋事端并以英緬相距路遠囑其從速電知鎮緬之員而於野人洋人焚殺之事暫置不提俟查攷明確如有必須理論之處不妨補行照會如此庶較活動昨已接到外部照復允爲迅速查辦除另備公文譯鈔往返照會咨呈冰案外所有以上情形伏乞回明堂憲爲禱肅此布達敬請 勛安

六月十八日
英字第十八號

論長江教案書 辛卯

敬再啟者。六月初九日接奉 鈞署來電。教案除七起外。又如舉毀堂三十餘間。南昌拆華教士房一進。現各省嚴防。尙安靜。惟武穴已誅正兇二人。而英領事意在株連。並欲罪及印官。多方作難。尙未提及卹償等因。除函飭駐法參贊慶常往告外部。俾免著急。並勸李梅軒緩回華外。因思英外部前聞威妥瑪之議。頗勸藉端掣制。儻該領事再唆華使。華使或聳外部。又將多生枝節。不得不先事豫防。爲釜底抽薪之計。乃告外部侍郎山特生。以教案已共誅四人。獲犯數十人。卽武穴亦已誅

正兇二人此等案件雖在西國恐辦理亦不能如此之嚴且速而領事意在株連不欲了結實所不解且當教案初出之時中國不待各國催問辦理格外從嚴今地方業已平靜辦法亦無可復加領事雖欲苛求中國亦不過如是而止蓋凡事自有一定繩尺也威前大臣所論乃中國二三十年前情形與今日已格不相入矣山特生云中國向來事急之時則拏兇犯事緩則仍釋去所以公使領事不能不爭答以所拏之犯姑置勿論今教案已誅四人死者不可以復生矣且英國向遇教案尙稱公允因教案而喜多事者乃在法國此次教案除

武穴外以法教堂之受損爲多而多方作難者乃在英領事何也山特生云蕪湖英領事館亦被滋鬧答以此因法教堂而波及究係略受虛驚並無大損山特生云英之貿易在中國者最多公使領事意在保護商務故欲嚴懲教案以儆將來答以從前法國教案辦理常失其平中國民心積憤愈深所以日久不能相安一發不可復遏凡事未能持平者往往激變譬之救火非以遏其燄正以揚其燄也山特生云威大臣謂法國必借此案大得中國便宜是以英國不可落後答以我接中國電報後函飭駐法參贊往告外部尙書李寶李寶謂中

國辦理如此認真甚爲感激並無他辭則威大臣之言似看錯矣山特生聞言色動乃舉筆記之且云將轉達沙侯或當電致華使俾止領事云云刻下是否議及卹償能否一律妥結至以爲念再頌 勛安

六月十八日

論外國領事宜由中國給予准照書 辛卯

敬再啟者。正擬封函。接到 鈞署來電。謹悉武穴已誅
正兇二人。英領事尙意在株連。多方作難。揣其情。不過
知償卹一層。非中國所難。視爲勢所必得。是以借端盤
旋作勢。或別欲肆其奢望。或仍歸於多索償卹之費。均
未可知。福成思蕪湖武穴兩案。已誅四人。辦理不可謂
不嚴。而公使領事尙思無理取鬧者。則由該領事之設。
不由中國給予准照。雖肆行無忌。中國不得而撤去之
也。領事以無厭之求。唆公使以無厭之求。瀆 鈞
署。實則彼國外部。絕未聞知。成則公使領事以此居功。

不成彼無所損。此數十年來受外人欺侮之積弊。言之可爲太息者也。福成前議中如允喀城設員。必商明英外部。此後亦援西例。須由我給予准照。權其得失。所益較多。鈞署二月十七日。堂憲公函亦謂港事就緒。喀員勢難終拒。而亦歸重於給發准照一層。刻下港員之設。未審。鈞署已否覆奏。近日華使曾否又來提及喀事。做處聞華使現將任滿。威妥瑪希圖復出。儻署以喀城駐員無甚大礙。或及華使任內。與之妥商。援照西例。收回中國給發領事准照之權。得從早辦成。最妙。儻慮一時未必就範。或逕將此事交。做處與外部熟

商亦無不可。福成爲領事蠻橫不得不思駕馭之術起

見總之交涉事件應挽回者甚多然欲挽回一事不能
憑空如願必須有所抵換夫抵換非盡不可行在權其
利害之輕重耳喀城設員充其究竟不過通商然通商
亦於我無大礙公函謂得英牽制亦可戢俄戎心未
始無益實洞見癥結之論亦持平切實之言。福成既有
所見不敢不再三煩貼亦並無迴護前說樂於多事之
意港員一節略而不論可也伏乞回明堂憲是否可
行裁示爲禱肅此再叩 勛綏 六月十八日

上卷

片

朱

一

論帕米爾情形書

辛卯

敬啟者。昨英外部侍郎山特生送來節略一件。并地圖一幅。言上年七月所談喀什噶爾邊外帕米爾之地。英廷派兵官楊哈思班至彼處游歷。詳細測繪形勢。審定界綫。現將梗概報知國家。英廷之意。原因該處係回部游牧舊地。既未屬中。亦未屬俄。而與阿富汗逼近。是以初擬會同中國勘明。分轄其地。以免俄人得占先手。致與阿富汗有損。頃據遊歷官楊哈思班云。曾詢喀什噶爾道員。當時喀道答以帕米爾係中國地界。詢其以何爲憑。則云西邊界上有大石。上書中國某年某官帶兵

驅逐叛回。至此接仗獲勝。此卽中國地界之證。楊哈思班云。此尙不足爲憑。緣帶兵接仗之事。不必定在界內也。外部又云。英廷本無利此土地之心。旣據喀城道員認爲中國轄境。亦屬甚好。但須及早豎立界碑。或時派兵四五人在彼巡哨。見有遊歷者。但詢問有無護照。毋須攔阻。俄人知其地屬中國。方不萌占據之意。茲將勘明該處地圖。及註中西地名字樣。移送中國一分。以表英廷睦誼。但事須秘密。不便備具公文。或致漏洩。招俄人見怪。是以函交本署參贊官馬格理。由

福成轉呈

鈞署察收云云。竊思英廷派員至喀遊歷。探察地形。蓄

謀甚深。徒以喀城道員認爲轄境。遂不復萌他想。且將地圖慨贈。是其志在聯絡中國。謹防俄人。顯而易明。似無惡意。惟福成檢查洪文卿侍郎新譯中俄交界圖。帕米爾部落。係在中國界綫之外。亦非俄境所屬。但旣據英官稱喀道認係中國轄地。而英廷亦非定欲中國派兵駐守。但願我始終明認。勿使他族生心而已。相隔過遠。此中詳細情形。福成無從遙揣。應否由鈞署密致新疆巡撫。轉行喀道。迅速查復。籌定辦法。以便敝處轉復外部。伏乞回明。堂憲裁奪爲禱。所有山特生致馬格理函一件。秘密節略一件。一并譯呈。又將來圖照樣。

摹譯一分隨函同寄。因原圖係洋紙，易致碎裂，不便封

遞也。肅泐敬請

勛安。

七月二十三日
英字第二十號

譯英外部侍郎山特生致參贊馬格理密函

敬啟者：頃奉沙侯命，飭送節略一紙，內言中國與阿

富汗在帕米爾交界之事，祈卽轉呈。欽差查閱，作

爲秘密文件，是爲至要。此請台安。山特生謹啟。

譯英外部秘密節略

中國使館英文參贊昨在外部談及兵官楊哈思班到帕米爾平原荒地探路，並到喀什噶爾遊歷各節。欲請將印度政府所以派楊兵官前往之故，明白示

知以便轉稟中國 欽差當時已告知該參贊派楊
兵官前往一則考查是處與英國邊界相連地方之
地理形勢一則考查該處地方官暨居民等有認定
實在界限能指明何處屬阿富汗何處屬中國與否
因阿富汗國王與英國交際情形英廷視爲甚關緊
要故也據楊兵官稟稱查悉舊有界限足備考證之
用此界限自穆司搭格嶺及因都庫什嶺志略作興都哥士山
兩山毘連不遠之處起有一大山嶺可以畫分南北
南爲音達司窪地北爲葉爾羌與阿克蘇河自此山
嶺起由克里克山口而西其分六段今列如左

第一段以水流入阿克蘇河之兩枝河爲分界。一西流入噴赤河。一譯作阿布噴治一東流入阿克蘇河。分開小帕米爾爲兩段。

第二段自大帕米爾北相離不遠之處起。以水流入噴赤河及阿克蘇河爲分界。至大山嶺。隔開大帕米爾與阿爾楚爾。帕米爾而止。以上兩段界限。英廷可以認爲定界。

第三段向西而行。以水流入大帕米爾湖及葉西庫爾湖爲分界。葉西庫爾湖爲棍屯河之發源處此界經過布才拱巴什及哈爾果什兩山口。至相近哥意德色。一譯科山口

爲止。此段界限亦甚明晰。

第四段經過以上所說哥意德色山口相近處。以水流分界後。往北直行。向棍屯河或阿爾楚爾河下游處。經過葉西庫爾湖之下。再折而往北。斜行直上。仍以水流入阿爾楚爾及穆爾格布河地方爲分界。再從帕米爾高地。遠望什克南低地。此段界限雖無天然形勢不甚清楚。然亦足備行事考證之用。

第五段折向東行。以水流入阿爾楚爾河及穆爾格布或阿克蘇河爲分界。過模乍奈一譯作山口。至察瑪三奈提爾塔什之北一處爲止。

第六段自以上某處起往下直入穆爾格布下游至

梅丁

一譯作瑪地安

之下再由此處轉而往北復上行以水

流入麥爾格比江之二枝河爲分界至俄人所稱爲

俄國邊界相近阿克拜塔爾河源某處爲止

以上所開界限圖說並觀便知詳細

此圖已交馬參贊

此次

所開界限未審中國政府以該處所轄邊界認爲相符與否英國之意認此爲無悞儻中國亦以爲然希卽示知卽當知照印度政府遵照辦理可也

一千八百九十一年八月十六日自英外部衙門發

再論長江教案書

辛卯

敬啟者。八月十一日。接奉六月十九日蘭字第四號
堂憲公函。敬悉各教案起事緣由。十五日又接到
署來電。當卽詳告英外部。并飭駐法參贊官慶常告法
外部。已於十七十八日。將問答大意。摘要電復在案。茲
再詳晰陳之。查此次未接來電之先。外洋各新報譏謗
之詞。不勝枚舉。大略謂中國始終毫無振作。視

上諭爲具文。政令不行於四境。照約保護一層。各國不
能相信。英國則以宜昌新案之故。屢接公使領事等電。
稱大局岌岌。請速添派兵船來華。并聞赫德致畢稅司

函亦有中國將大亂之語。是以各國外務部聞此信息。咸謂此事於歐洲全局有損。必須添兵到華。合力自衛。據駐法參贊官慶常稟報本月十四日。法外務部李寶約伊面談。聲色俱厲。大旨以中國不能竭力保護各公使。將與鈞署絕交云云。并有節略一件。譯出寄來。自接到寒電之後。復電飭該參贊往告外務部。詳加開導。外務部意似轉圜。而仍以未提杜絕後患一層爲言。該參贊答以此係中國分內應盡之責。不必另提。外務部意始釋然。已允會同各國籌議。並電囑李梅和平商辦。此法外務部近日情形也。十六日。福成見英外務部山特生。詳述電意。因

詰以各使在華所請辦法不外四端曰緝犯効官賠償及保護將來今中國於緝犯効官賠償三者既一二辦到至於保護將來中國無不盡心竭力且須從容詳議不知各國何尙如此紛紜山特生聞電開各節尙無挑剔惟云可惜辦理太遲又云現在駐華各公使方聯名稟請各國政府求添派兵船自行保護此事應俟各國政府核奪

福成

謂此案以英法爲領袖法又視英爲轉移中英近方輯睦自應篤念交誼妥籌善法山特生以

沙侯現尙避暑在外必須轉告方可照復旋於十九日接到復函謂沙侯之意中國果能力任保護不再出事

端英國當與各國妥商辦法再行函告此英外部近日情形也大抵英法兩國均注意防範將來杜絕後患爲第一要著英重商務甚於法之重教此次人心惶擾英商受累較多故英法始終一氣驟不可離刻下法允與各國籌議英亦允與各國妥商善策似已漸有轉機但求不再出新案可冀平安無事惟各國公使於鈞署則惡語相加於本國則危詞聳聽不但無消弭之意并有挑釁之思其用心殊爲可惡此次九國聯幫勢盛謀狡尤覺棘手祇可暫示包荒以柔其氣相機應付以戢其謀且各國外務部於公使亦多袒護卽如英法外部往

往經

福成

詳告之後意似豁然及一接彼使唆聳之詞

則轉疑

福成

前言爲不實蓋其信中國使臣之言自不

如其本國使臣之言此外洋辦事極難之處求其機括

惟有鈞署平日接待各國使臣妥爲駕馭加以聯絡

儻能使集泮之鵠懷我好音或亦省事之一道也茲將

法外部問答節略二件節略一件

做

處答復節略一件

英外部問答節略一件復函三件一併鈔呈伏乞回明

堂憲爲禱嗣後情形當俟陸續奉告肅泐敬請 勛

安

八月二十二日

英字第二十二號

上卷之序

目錄

三

論分派兵輪保護長江口岸書

辛卯

敬再啟者。前閱外洋新報。謂此次沿江上下滋事之時。正值北洋閱看海軍。所有南洋兵輪。盡數北行。以至會匪乘間而動。甚有稱蕪湖四月出案在前。閱兵之期在後。不應拘泥前說。再調南洋之船。謂係中國不肯實心防範之明證。彼族強詞奪理。壹意吹求。大抵如此。及聞各國公使領事迭次電請添派兵船。謂由中國不能力任保護之故。昨晤山特生。亦云六七月間不再滋事。乃彼各國分派兵船鎮守。極力彈壓之效。方悟前報所傳。大局可危。實因今年鬧事之處過多。西人驚心風鶴。顧

念身家不免視此事太重。彼既視之太重，動輒疑我視之太輕，遂有因懼生忿之意。又聞六月間丁軍門帶鐵艦七艘，駛往日本遊歷，雍容於槃敦之間。西人謂值此人心紛擾，而我海軍不爲保護，顯形漠視，益滋藉口。福成謂成事不說，且我之辦法，亦豈能盡如彼意。惟東遊之事既畢，兵艦正合用之時，北洋之艦尤多於南洋。若分派南北洋兵輪巡駐江海要埠，顯示保護，隱寓防維，且杜彼自護之說。俟一半年無事，洋輪逐漸撤退，即可與議善後章程。是全案轉圜在此，結穴亦在此。惟聞北洋兵輪喫水較深，不能入江，或者沿海各埠，北洋兵輪

任之沿江各埠南洋兵輪任之似亦變通盡利之一說
而其樞紐則仍在 鈞署籠絡各使使之就範各使非
盡虛言可動事之較有實際者其在分派兵輪保護之
一說乎計此函到日或者大局已定萬一尙有紛擾彼
所注意專重在杜後患一端福成 既有所見不敢緘默
伏乞回明 堂憲裁示爲禱肅此再頌 助綏

八月二
十二日

論仰光及加里吉打埠宜設領事書

辛卯

敬啟者香港設領事一節英外部答允於前華使阻難於後以致九仞之功虧於一簣事機不順良可慨惜

鈞署覆奏囑告外部以試辦一年之說中國未能滿意看其如何答復竊揣執定原議與之磋磨不難變爲常局惟港喀兩事雖可不相抵換而彼族注意在此我能令其全允港事若欲保其不再提喀事似無把握則屆時仍費鈞署盡籌似不妨暫置不提留爲後圖

福成

所致慮者從前西洋各邦向不以公例待中國客冬外部答允中國於英屬地通設領事其來文之意甚爲堅

決非若香港新金山兩處尙有須審量之語無非明示睦誼意在結歡是以外洋新報多有忌中英之親睦者我能乘此機會多設幾處領事卽可證明英廷允照以公例待中國之券且可據爲照商他國推行張本亦可爲抽換舊約喫虧之處張本所關係者非僅一時一地已也刻下香港如作罷論而新嘉坡係原設領事之埠雖永改爲總領事究無顯然添設確證日久恐其狡變漸翻成議查英屬仰江一埠亦號爲南緬甸華商不下五六萬人東印度孟加臘之省城加里吉打埠志略作加爾各搭尤多殷實華商此兩埠華民之多均在新嘉

坡之前。本年春間有德國隨員姚守文棟呈請游歷印

緬地方。

福成

札令順道探查中緬交界兼察仰江商務

情形曾經咨呈

冰案旋據該道稟稱華民在緬不獨

受英人凌虐兼受緬人欺侮沿途環訴叩求稟請設官

保護又聞升竹珊星使去年由藏赴印。有聞廣巨商環

求籌設領事。竹翁許以相機留意。現據姚守亦稟稱該

處殷商不少貿易頗旺。自應一例添設。且該處係歐人

東來孔道。又與西藏邊外相近。萬一印藏有事。該處有

一中國官員可通聲息。裨益非淺。

福成

現擬籌設此兩

處領事。以爲英廷答允中國在英屬地照公例通設領

事之券不致異時變易前說而英人視之亦非如香港
較爲鄭重更不與他事牽涉惟必須先與 鈞署函商
妥協方敢具摺上陳至港事雖暫不提並非永罷如一
二年內事勢稍變亦可再議伏乞回明 堂憲酌奪示
復如謂該二處無須添設領事仍應將港事辦妥
亦卽遵照也專泐布達敬請 勛安

十月二十一日
英字第二十五號

福成

再論滇緬界務書

壬辰

敬啟者四月十九日接奉 鈞署來電敬悉壹是瑞士女子遊歷電粵准行此係通融省事辦法但當示以顧全睦誼起見自主之權實在中國耳帕米爾事初因英外部沙侯出遊未回是以稍緩開談帕部舊係中屬英既送圖於前俄亦撤兵於後在彼兩國皆有不能侵佔之證據今中國既願推而勿有與兩國共之論理當無窒礙探聞英廷已飭駐俄英使先自與俄外部商論英俄各須派員赴帕察看情形再與中國會商是定議須在明年矣滇緬邊界一事據山特生云印度部各員見

福成所覆節略援案索取三端利益意不甚以爲然至外部於劃界之事擬令華使在鈞署商辦竊揣其意

或恐

福成

固執不讓勢難全拒姑令華使先探實在消

息稍作宕筆仍待歐使到京之後俾其一手始終經理

則此事須在鈞署收束者乃一定之理勢

鄙

意彼卽

狡詭百端我當一成不變查閱舊卷當日英人所以許

此三項利益者實因鈞署之意重在索還八募曾侯

據此立論故彼意既不將八募讓還則此三項亦足稍爲點綴用示睦誼刻下事移勢易彼族審知中國現無展界之心是以決計將前議置而不論但欲乘機進取

大抵外部初意未嘗不欲顧全大局而英之疆吏則一味以進取爲功外部仍察度彼我之情勢苟可俯順疆吏之意亦未始非其隱願今我若不執前案與之力爭則彼勢必以上次所送節略地圖作爲定本恐滇邊界外各土司自此將悉爲英屬矣竊謂此事無論在外洋在 鈞署開談總以抱定展界舊說與之堅持爲要卽令此數端未必全得或得一二端或另得他項利益以相抵換亦未爲不可譬之逆水行船必力爭上游透過數步則從容放棹之時乃可適如吾意所欲住之處此案能辦到以稍展滇界爲歸宿庶可保全附近滇邊各

土司。否則彼得步進步。恐未必能容我安守舊境也。日
內擬將舊卷中緊要之處。擇其可據以執辨者。摘鈔數
件。具牘咨呈。冰案以備查核。伏乞回明。堂憲裁示
爲禱。肅泐布達。敬請 勛安。

四月十三日
英字第二十六號

再論帕米爾情形書

壬辰

敬啟者四月二十四日奉到 鈞署來電敬悉壹是業

於五月初二日摘要電復在案帕米爾之事

福成

月前

會晤沙侯以三國各不佔之說告之沙云既作公其之地辦法諸多窒礙緣帕部人才物產不能爲自立之國

設或有似生番刦殺之事究歸何國承辦何國管理

福

成答以自應三國會同辦理沙云如此必多意見不合

易啟猜嫌從前歐洲常有此種地方此種辦法終無不

能善其後者

福成

直告之云帕地孤懸三面不易設防

如守此地勞費既多而裨益甚少是以中國不願收取

貴國與此地隔一大山。守之亦頗不易。果爾則俄必取之。俄取之恐於中英兩國均多不便。似不如立約共同保護。較可經久。沙云。英廷已飭駐俄公使與俄外部商議。英俄須各自派員赴帕察看情形。再告中國云云。昨得竹筴同年來信。謂俄外部之意。以帕地係中俄接壤。英祇因保護之阿富汗稍有毗連。與中俄情事不同。似欲擯英不使與聞。福成竊謂俄人所以欲拒英者。以去英則中國較易商量也。中國所以願合英者。以得英則中國隱張聲勢也。刻下此事能否就範。其樞要在俄而不在英。尤在英俄之先自籌商。而中國暫無從攬越中。

國祇能靜候音信。隨宜應付。遲速聽之可也。滇緬界務。既交倣處開議。如能先定大略規模。則勘界大臣可稍免臨時周折。駁辯數條。頃始接外部覆文。堅持不肯稍讓。據外部稱緬督將到。尙當約同集議。馬格理係原議畫押人員。屆時擬遣往爭論。須儘數月之內與之磋商。希冀爭到得半之數。亦可收場。已甚喫力。總之此事持論則以援案展界爲詞。命意則以保固滇邊爲主。要使數十土司稍有外障以闌之。不致被英邊吏脅爲兩屬。此則於大局不無裨益耳。以上各節。伏乞回明。堂憲爲禱。肅泐奉達。敬請 勛安。
五月初八日
英字第二十七號

出傳五應

卷四

三

論英國禁煙會始末書

壬辰

敬再啟者。上年五月間有英國禁煙會紳士埽司屋爾
阿來山德兩人來做處謁見。面陳本年該會紳等在下
議院議禁止印度種煙一事。議員中意見相同者多至
一百六十餘人。爲向來所未有。當卽聞之英廷。英廷交
上議院答覆之詞。頗以印度餉項無出爲慮。惟謂此時
中國如欲加重抽稅。以期禁止。或從此禁止不准進口。
英國決無啟釁之意云云。該紳等念鴉片流毒中國已
久。今英廷顧念大局。既有此言。應請中國乘此機會。設
法禁止。當將上議院答覆會紳之文面呈做處以爲憑。

證并携呈同治八年 鈞署照會英國阿使之文內有

勸英國禁止販煙之語謂今日情形異於疇昔中國如持此議該會紳等竭力相助不難辦到囑將此意轉達

鈞署請示

福成

明知事體重大辦理正復不易念其

來意誠懇未便漠然不應因囑該會紳繕具公函許爲轉達此五月杪事也旋值內地教案蠢起該會中係教士居多眾心惶怯不暇及此未幾而議院放假會紳各自散歸至十一月初在巴黎接到該紳等來函二件當卽譯出核其所言大旨卽係五月間面談之語本擬卽時代陳惟念交涉事繁如梅生之案坎部之事滇邊之

議頭緒方多恐 鈞署不遑議及是以暫將此件擱起

昨該紳等又來使署探問回音

福成

自不得不爲轉達

鈞署第體察目前事勢議院諸人既有悔禍之心英政府亦無啟釁之意但以禁止一節聽中國辦理爲詞雖其意仍在誘過中國未必真有願我禁止之心然我於此時果能迎機而導未始非轉弱爲強之候且洋人所謂禁止之道仍不外乎加重抽稅一法查光緒十一年曾侯與外部議定稅釐并徵之時奏稿及條約中俱已預爲陸續議加張本是此事如果籌辦亦非全無根據儻因此而進口之數少減固爲正本清源之上策卽

不減而稅釐有加於舊亦不失爲取益防損之善謀惟事體關係較重非到機緣十分湊拍究未敢輕於發端所有該會紳先後交來各件一併譯彙錄呈應如何答覆之處卽請回明 堂憲裁示爲禱肅此再叩 勛安

五月初
八日

譯禁煙會參贊阿來山德來函

敬陳者七月初一日蒙大人接見並埽司屋爾囑將禁煙之事繕具公函呈閱自謁見後適值放假之期相近是以耽延時日不能早將此稟繕成殊深悵悵茲本會董事等已擬就一稟經總統董事參贊等簽

名並將四月初一日寶星弗爾克孫在議院代國家所議各節一併載入送呈鈞鑒蓋本會欲鄭重出之令一切良法美意足備

中朝之採擇非敢輕忽此事遂致遲延也現已將稟刊印所簽之名亦照原底彙列諒與大人之意吻合本會欲刷印此稟者非卽欲流傳廣布故不刻入本會報單亦不刊入新聞紙不過備會中各董事閱看而已儻

中朝欲將此稟付梓亦無不可今附上稟彙三分並報單如再要多容後續寄特肅布陳敬請鈞安阿來

山德謹啟

譯禁煙會

董事麥的士
總辦比利斯
參贊阿來山德

公函

敬陳者。本會總統前在下議院所擬各節。蒙大人允達。貴國政府不勝欣幸之至。本會設立已閱十七年。會中皆公保各黨執政之人。及各方耶穌教人。查一千八百四十年間。爲鴉片事。兩國構兵。旋經議和。修好。而洋煙從此暢銷中國。有損華人。且與華律相背。本會每深悵惜。自天津條約稅則定後。鴉片不在禁貨之列。竊揣此非

中朝頓改初意。謂鴉片無害於民。良由迫於歷年戰

事無暇驟禁。本會故欲力助。

中朝冀兩國修改條約之時。中國可以力禁鴉片進口。前煙台條約議改稅釐併徵。卒於一千八百八十五年立約。此約係照

中朝所擬而定。時前任大臣曾侯訂立此約。極嘉許本會相助之意。語載曾侯信內。此信曾刊於一千八百八十六年十二月。本會報單中。但本會不能以立此約後。卽已副期望之意。若印度政府仍做此害人貿易。本會意總不安。嘗聞道光年間。我國公使勸中國將鴉片作進口貨收稅。當時奉中國

上諭曾云欲朕收取害民貨稅萬不能行本會每思此言極爲欽佩凡教中規矩視四海如同氣譬如兄弟二人兄受利弟受害則大以爲不然歷年以來本會每乘機會陳說於議院中所可喜者議院各紳近以此爲非者較多於往年本會總統議院紳士寶星比斯於四月初十日擬一應辦之意見附列於下

本議院意見以爲但加重鴉片稅則尙非合理辦法須力勸印度政府不再給發種煙及賣煙之准單除售作藥料之鴉片不計外又應禁止馬爾華鴉片過英國印度之境

此意見一百六十人爲是。一百二十九人爲非。本會甚願各紳意見多合。當議論時。前孟買總督外部侍郎寶星弗爾克孫代國家聲明禁煙之語。附列於下。

此事我可聲明。儻中國欲加重鴉片煙稅。雖加至極多。或竟全行禁止。不准入口。英國必不欲費一鎊金錢。以買藥彈。以傷一兵。強令鴉片入中國。本會欲將此要語。請大人轉告。

貴國政府。至如何趁此機會。禁止此等害人貿易。本會固不敢代爲設法。但所欲表明者。中國儻有禁止。

印度鴉片之意本會極願扶持刻下英國知中國受
喫煙之毒較前更詳一千八百六十九年間總理
衙門行文於寶星阿里國極言鴉片之害茲將此文
譯錄於後內載所擬各條彼時竟置之不理今若擬
有此辦法必不至於寢擱但中國內地不准種罌粟
一層亦須切實擔保在內本會極望大人並中國
國家承受

天祐速滅鴉片無窮之災難及中國民人昌盛肅稟
敬請鈞安伏惟垂鑒總統比斯董事麥的生參贊阿
來山德代禁煙會簽名一千八百九十一年十一月

十一日

譯禁煙會刊刻阿公使申報本國原文

一千八百六十九年英公使阿大臣與 恭親王及
總署大臣往來會商多時 恭親王等欲將鴉片准
入中國之款作爲廢紙茲將中國來文節錄如左
華商賣給貴國者乃佳茶好絲均係有益之物英商
賣給中國者乃係鴉片無異毒藥似此作爲殊屬不
公無怪人心不服最可慮者中國官民每謂英國有
意毀壞中國並無真實和睦之情英國旣稱富而好
禮之邦專爲流通中外貿易而來何不將此害人之

物除去。想英國必不因此無益生理。致招中國官民
怨恨。通國斥罵。蓋停止種煙。所失帑項有限。特請貴
大臣轉稟貴國。飭下印度及他處。將種煙之地。改種
穀米棉花。我中國亦嚴禁栽種。則此項生理。既
停。自無喫煙之害矣。本王等深有厚望焉。

出使公牘卷之四終

上虞鍾達卿承刻

出使公牘卷之五

無錫薛福成叔耘

書函 致總理衙門總辦

論與英國爭梅生罪案並八募設關書

壬辰

敬啟者五月初八日肅布一緘詳論各事計達 典籤

六月初四日接奉 堂憲四月十三日公函敬悉壹是

梅生一案外部初次復文及 敝處第二次照會外部文

前已譯稟咨呈 冰案近日外部尙無復文惟據馬格

理述及外部之言初次則謂接上海英按察使來信稱

上海華官於渠判斷此案均已愜意並無謂其辦理不

公之處且有送禮酬勞之說頗疑做處有心挑剔又謂

律例之事由刑司專政卽外部亦不能盡知等語及接

做處第二次照會則云此文甚爲利害頗覺不易回答

又聲稱已交大律師秉公速斷惟現距監禁九月之期

將滿福成慮其屆時先行釋放然後以不能捕得爲詞

昨已電達南洋請其在滬延西律師担文於前控炸藥

之外另以三事控之英按察使一通會匪二違例雇人

三偷運禁物並將做處與外部前後照會洋文原稟函

鈔寄去總之梅生之事若不切實理論彼必以含糊了

結則後患滋多鄙意必須辦到更判定罪庶足彰公道

而倣將來外部度我堅持到底或稍有轉圜之說馬格
理又云此事喫緊一分則周漢之案暗中即可放鬆一
分其餘可隱相抵制者亦頗不少雖小事而實要端也
滇緬分界之事近遣馬格理赴外部與山特生歐格納
及印度部侍郎貝蕾會議一次貝蕾謂中國向不講求
商務此次必欲在八募近地設埠以金沙江爲兩國
公用之江究屬是何命意馬格理答以聞福成云雲南
礦產甚富而運道極艱卽如目前起解京銅勞費遲延
至爲不便若由滇境內之大盈江取道金沙江入海
一水可達天津此中國所必爭且此事於英人在緬商

務亦未始無益。若滇貨不出大金沙江，則越南之東京現已通商。如由滇境經紅江，取道富良江入海，較之目前運道由滇而蜀，由江而海，亦尙便捷。則通商之利盡歸法人之手。商人既走熟越南一路，而欲改使入緬，勢有所難。似非中英兩國聯絡交誼之意也。山特生等均大以爲然。用筆誌之。福成之意，則以我不立商埠於緬境，彼必立商埠於騰越。騰越陸路直接印緬，若使異族麇集，窺我礦產之富，將來事端必多。故不如由我設埠緬境，綰轂大盈江之口，分彼入募之利，設關徵稅，必可暢旺。以上兩端，若無中變，似稍易商。其南掌擇人之境。

劃歸中國一層頗難就緒。又野人山地在大金沙江以西者約四分之三。在大金沙江以東者約四分之一。鄙意與議以江爲界。則彼此畛域劃然中分。或可屏蔽數十土司。不致被彼蠶食。無如印緬各員以翡翠玉石等礦皆在此處。堅不肯舍。福成尙當據理與爭。雖甚喫力。亦所不憚。能多爭得數分。甌脫之地。究於各土司有益。刻下適屆英議院更換議員之期。英人尙分公保兩黨。就所選議員之眾寡。而政府及各部大僚之更動。亦視爲轉移。恐外部或須換人。尙難預定。月內此事暫停會議。須至閏月始能再談。福成愚見趁此時候。滇中派員

先查明附近滇邊之野人山地。或各土司之地。有與犬牙相錯者。必須大勢瞭然。庶稍杜彼族希冀朦混之心。此本係兩國當查之事。彼之查勘。已不止一次。我亦先宜派員往查。明示彼以不忘此土之意。或較易於就範。亦免兩國會勘之時。更滋口舌。伏乞回明。堂憲。裁示。爲禱。又福成面晤歐格訥。據云。約需冬初赴華。計到滬已值封河時候。擬先至朝鮮。明春入都。蓋歐兼任朝鮮使事也。此人能稍遲到京。免其另生枝節。於事亦未始無裨。謹以附聞。肅泐布達。敬請。勛安。六月初八日英字第二十八號

論阿富汗侵擾蘇滿卡倫書

壬辰

敬再啟者。五月二十一二十五六月初三日。疊奉
署三電。敝處當復電在案。查此事第一次詰問外部時。
外部謂因我未將欲守帕地之意。先告英國。致有此誤。
是彼意仍跟上年送圖一節而來。如謂阿富汗此番舉
動。英人全未與聞。固難深信。竊料英之嗾阿。當在去冬
窺我欲棄帕地之時。迫我守帕而阿爭之。已出英人意
外。至後來之逼遷布回。似該處阿員妄作。不但英廷不
知。或并非阿酋之意。頃告知外部。據稱已立電印督。轉
告阿酋。諭什克南頭。日立時釋放。惟阿什等處。尚未通

設電綫聞由印度寄信至彼約需兩旬方到。福成現擬告外部必須阿酋認錯賠禮并償卹被遷之回民方可完結。能否辦到雖無把握然必如此下手方爲得體。其若何收束則祇可相機爲之。鈞署來電謂告喀使以阿兵佔地彼不甚在意許竹使來函亦謂俄外部於此事佯爲不知其意殊難揣測然若不於此時明告俄人非特代英阿兩國受俄之催逼卽他日俄有責言我國分地自是將來歸宿但蘇滿地方既有御製碑文似應竭力爭爲中界此體統所關不能過於

退讓現交阿兵暫守。他時與英理論。或尙較易於俄。嘉
浴關至烏魯木齊電綫。旣發款興辦。仰見 堂憲綢繆
全局。應機立斷。欽佩無已。此後西事方殷。信息靈捷。裨
補大局。實非淺鮮。但不知需費若干。何時可成耳。肅此
再頌 勛綏。六月初八日

論阿西擾卡及梅生罪案滇緬界務書

壬辰

敬啟者六月初八初九十六十九閏六月初一初五初
十日疊奉 鈞署各電敝處先後電復在案查近日交
涉各端中英會立坎巨提新酋一事大致業已妥協但
冀新疆派往會立之員妥慎將事不亢不卑即可完竣
本日謹具摺奏明另鈔彙咨呈 冰案帕米爾事自以
三國分界爲歸宿而俄廷於勘界一事尙未開議現又
派兵巡帕據英外部函告敝處云近接駐俄公使來信
言俄廷現派游擊喬瑞夫率師赴帕意在探視該處情
形且冀阿富汗因俄師之來不與布回爲難並聲明此

行不犯阿富汗亦不犯中國。但冀中國駐帕之兵。或因
此可撤去云云。惟外部之意。頗慮俄人言不由衷。且欲
慎觀其後。近日英京各新報。論說紛紛。大意謂俄兵入
帕。英人於印度早已有備無患。恐中國將來不免受虧。
此雖英俄素日互相猜忌之習。然時會所趨。局外之言。
不無可採。茲將英外部來函。及新報二則。譯彙鈔呈。阿
富汗逼遷布回一節。近接外部函稱。印度來信。據阿富
汗酋覆云。此事伊處並無所聞。如果確實。渠自當將布
目釋放。又閱新報。阿境內屬部近有叛亂之事。俄兵與
阿兵鬪於蘇滿。俄兵被擒殺者十餘人。內訌方亟。外患

將乘前函所擬飭令賠禮卹償之處祇可相機酌辦。所有外部來函一并譯呈梅生之事。敝處屢電南洋於炸藥之外請律師再控以便更讞迄未辦到旋接英外部函稱准於監禁期滿之日逐出華境。福成念其與鈞署初意尙合且人旣釋放勢須另起鑪竈因亦不復再爭。昨已照會外部綜論始末以著兩國辦理懲犯各案。我甚嚴而彼甚寬借一事以形他事仍寓立竿見影之法藉作釜底抽薪之計容卽另具公牘咨呈以備查核。滇緬界務因首相沙侯將告退外部尙書聞換勞德伯里月杪能否會議尙難豫定古勇薩洞納二地旣承

電示久隸版圖自當據以力爭以杜彼族覬覦之意一切情形俟會議後得有梗概再行續布以上各節祈卽回明 堂憲爲禱肅泐敬請 勛安

閏六月十九日
英字第二十九號

譯英外部寶星克蕾致參贊馬格理函

敬啟者本衙門頃聞印度衙門云阿富汗王答覆所問之事據阿富汗王云並無拿獲布回頭目之信儻此信果確渠自當將布日釋放應回明貴欽差爲荷此復順請台安克蕾謹啟

譯英外部侍郎山特生致參贊馬格理函

敬啟者沙侯請閣下轉達貴欽差云代理駐俄公使

自俄京來信稱俄外部云阿富汗旣奪布回之羊以當貢獻中國兵仍駐紮阿爾楚爾帕米爾是以俄將遣游擊喬瑠夫率師至該處巡閱約八月中可歸俄外部聲明此行無意據地不過探視情形而已且冀阿富汗因俄師之來不再與布回爲難而中國兵或因此可撤又云喬瑠夫此行奉命不犯阿富汗亦不犯中國兵且不近興都哥士山云山特生謹啟

節譯馬格理之子馬繼業自喀什噶爾來信

此間諸事棘手俄領事勢不相容時喉華人從中爲難因華人固深畏之也帕米爾事如何了結實難懸

揣兩月前約有俄兵三百名至大喀喇庫爾南眉喀爾地方距華兵駐紮之郎庫爾約尙有一日半路程當時情形甚爲可駭自俄兵復回阿賴爾之後較爲平靜又深恐華兵與阿富汗兵或至起釁六禮拜前果有阿人約二十名忽至阿爾楚爾之蘇滿塔什謂此地屬阿富汗令華兵退出華兵初不允嗣後議定兩國之師均退出蘇滿塔什地方此係華兵所定之議聞華兵駐阿爾楚爾者盡已退至色勒庫爾之布倫庫爾矣

譯斯丹達報論帕米爾事

西八月初三日

俄羅斯經營中亞細亞近更有事於帕米爾觀其用意較往年尤深記去年我英武員數人遊歷上奧克蘇斯河荒地突見俄幟數處臨風飄搖遂裹足不復深進彼時俄師駐紮該處雖不至無禮於諸員然示此地若屬彼管轄可以閉絕外人也者考此地半屬阿富汗而餘屬中國從未聞爲俄屬當時沙侯立即馳牘森彼德堡申問緣由而俄廷謂此非朝廷命意乃該處將領所爲以致開罪英員謙詞謝過無何印度之市謠傳四起謂可薩克馬軍俄兵名又至其勢洶洶視前更甚今日我英政府接有信息謂所傳皆確

回憶俄廷謝罪言無幾時而舉止不同如是也然歷觀往事來者可知俄之理外務也其在北京城恆辭謙而理正婉言謝罪甘語允從而將領在外仍自得步進步有利必趨至政府何以對答外人有若弗知也者時而倔強不順君命時而無端又興師徒此固開疆拓地之狡謀實俄羅斯之故智若謂帕事獨不類此有識者必知其非矣俄在中亞細亞進取斷無已時俄政府必以此事明告中國而華員必知俄員之狡詐強猛爭論而折服之以保守其固有之地尤爲要圖至我英曾與阿富汗立約如有外患必保護之

則俄廷又必觀我英政府之意。安知不限以界畫。以阻其直進哉。夫此地猶屋之脊。赤露天。空不足以蔽商旅。曾不屑費此唇舌。然以大局計。則阿爾楚爾。帕米爾。乃由北犯印度之要區。則俄將領之欲撫有其地。或欲通道其間。固在意中。幸印度邊防鞏固。可恃無恐。然俄師近逼。則防堵加警。而軍需驟增。禍變漸滋。而外藩騷擾。不如及其尙遠。盡力以阻其來。乃今日所最急者耳。阿王安勃特。臘蠻之才幹警敏。善交印度。毋矜強俄。彼固知之矣。惟其天性素慢。盛氣不平。又確知若過屈於我英。非所以示其民。故近者獨

行其是未免侵侮境內各小部國中內訌境內京城
及侯勒特周圍諸屬部本屬阿富汗者又起兵變勢
甚倉皇故阿富汗之率師在外者奉召馳歸以剿叛
部近聞諸兵調自北省者爲賊所敗兵爭一事在阿
富汗本習爲常然此次爲患尤巨該王幾有不安於
位之苦觀此知阿富汗境內有諸部之變境外有強
俄之侵則該王必應與印度結好也明矣

譯遊歷印度人致斯丹達報館論帕米爾事書

西曆八月

初三日

俄兵據帕消息於中英兩國極有關係然於中國尤

甚敢詳言之。甲必丹喬瑙夫已至興都哥士山一事。儻此說果眞。則俄政府竟無異負諸失信。是不可以一息姑容者矣。帕米爾俄兵之數。甲必丹喬瑙夫所帶者。必不踰五百人。蓋此行彼自認專爲探路。人多則令人生疑。況糧餉輜重載運甚難。非大措置不能進大軍。帕米爾人煙稀少。正亦無須動大軍耳。俄兵或已至中國境內之塔戛爾瑪及阿克塔什。則未可知。因中國極西邊界。固在蘇滿喀什也。我英政府近於乞托拉爾雅辛。那戛爾之舉。先患預防。印度兵力保守有餘。故俄人此時進犯。與我英關係較輕。中國

則正與我英相反刻下俄之舉動於中國何等岌岌試展地圖一覽而知俄兵業至塔夏爾瑪及阿克塔什儻據有其地必將進窺回疆並先圍喀什噶爾成功而後已直逼南北西三面而後待時而動竭全力以塞其東面乃可取道以直達於西藏矣僕謂近者乞托拉爾雅辛那夏爾之布置防穆斯塔格興都哥士之南則有餘然俄若遷移其帕米爾東之邊界而至阿克塔什之南則此後步驟必及其西或侵佔阿富汗一面然後我英之責任伊始因此面尙未設防耳但就俄現據塔夏爾瑪及阿克塔什觀之我英原可不

甚經意然如下碁然俄人目下此着後患可知而知而帕米爾西面並阿富汗一面亟須嚴防彼此後舉動必不出此數處豈可不思患而預防哉

譯英外部侍郎山特生致參贊馬格理函

敬啟者上海總領事來電云中國官員所聘訟師謂梅生並無加重罪名實據然彼亦並未設法覓保是以是月之杪卽須逐出華境矣沙侯囑告閣下轉達貴欽差爲荷山特生謹啟

日修五席
卷五

三

三論滇緬界務書 壬辰

敬啟者本月初七日祇誦 堂憲六月十九日公函並
大谷及鈔件等領悉壹是。自前月至今疊奉 鈞電
均經先後電復在案。滇緬界務因值英外部交替延擱
多時。至本月十二日方接新外部勞德伯里照會。定於
十二日派山特生貝蓄與馬格理會同商議。計又談過
兩次。查從前曾惠敏所索三端利益。其中以大金沙江
爲中英公用之江。及中國於八募附近之地設立商埠。
此兩端大致曾經議論。其南掌擇人之地劃歸中國一
節。現尙未談。緣此次 福成 所與力爭者在分劃野人山

地自二十四度半以北以大金沙江

卽厄勒瓦諦江

爲界江以

東盡歸中國此層辦法原在舊索三端之外當時曾侯雖偶有此說尙未暢所欲言外部亦未允許但思目前不如此劃界則滇緬之境總未能截然不紊將來仍不免有誘脅我騰越邊外土司作爲兩屬之事聞緬督現方建議由八募造鐵路直至米紀納之地再由米紀納渡大金沙江而東直達昔董是其用意已可概見

福成

因探得劃江爲界之說英廷前雖未允卻不甚以爲非頗合西例馬格理謂祇須鈞署堅持相助似可如志如得此一端則其利益足抵前議二端而又過之且其

勢如順流而下。卽三端中亦必有兩端可得者。如此則滇西諸土司安如磐石。且鈞署來電所稱騰越各關外土司地數十里及一二百里者。如在太平江以北之地。均已總括在內。無待煩言。現擬以全神爭此一著。萬一倉猝不能辦到。則相機轉圜。歸到三端。似更易於就範。惟旣爭此地。則南掌揮人等地。不能不略爲放鬆。已囑馬格理向外部微露其意。蓋以野人山地與揮人等境比較。其利益大小相去懸殊。又聞南掌揮人實已大半歸屬暹羅。故不欲受其虛惠也。昔董卽薩洞納做處春間曾照會外部。催令將英兵速撤。至今未接復文。據

馬格理云英兵如退出昔董則大金沙江以東彼亦無險可據自然悉爲我有故以催令撤兵爲緊要關鍵前日會議之時山特生謂英兵如離昔董則彈壓野人保衛商旅應由中國任之答以中國自必力肩此任無須豫訂蓋從前西人嘗以此等措詞嘗試中國因得遂其侵佔之計今宜有以力折之也又聞英駐昔董兵僅二百名因得地勢輒思久據萬一彼果撤兵應請 鈞署電告滇督迅卽派兵一營填紮其地以據形勢而資鎮定必可永久相安矣所有訂期會商情形合先布陳伏乞回明 堂憲爲禱肅泐敬請 台安

七月二十五日
英字第三十號

論漢口英領事帶兵船赴湖南書 壬辰

敬再啟者。漢口英領事聲稱帶兵船赴湖南一節。鈞署以其違約妄爲。囑商外部撤去。當飭馬格理往告。據外部云。此事關係頗重。總須待華使來文。聲說明白。或撤或留。方可酌辦云云。竊意華使徇庇領事。決不肯據實陳報。必多遁飾之詞。聞其前日電告外部。謂鈞署並未向彼提及。初無欲撤領事之說。外部因謂此意出自敝處。然疑竇一啟。諸事掣肘。恐妨全局。昨奉鈞電。知已電鄂鈔寄該領事致蔡道函件。屆時自可據以辯論。仍請鈞署明告華使。以前電敝處日期。囑電外部。

以釋前疑。至兵船入湖一說。空言無實。彼易狡賴。恐領
事或難撤動。然幸賴此一著。以柔華使及領事之氣。暗
中不無裨益。俟鈔函到後。當再切實理論一番。然後相
機了結也。並乞回明 堂憲爲禱。再頌 台安。
七月二十五日

論辦理教案善後章程書 壬辰

敬啟者。做處曾因清查教堂育嬰一事電商。鈞署茲再詳晰言之。查上年教案事結之後。本擬妥籌善後章程。峴帥亦屢有信來。意在及時補救。以保內治之權。冬間又接傅相來函。知有教士在津門遞呈。請由教王派總主教來華。專理教務等情。福成悉心體察。此事應由南北洋妥商建議。請鈞署主持。奏明。

飭使臣照會外邦。則步驟方不凌亂。今春曾擬善後章程十條。函商南北洋。福成駐巴黎時。飭參贊慶常與教王所派駐法公使一再晤談。微示此意。該公使深以爲

然允報明教王定奪。又聞土耳其近與教王通使立約。之後教士皆安分守法。一變舊習。因又囑慶常向土國駐法公使詢問章程。譯寄北洋以備採擇。自三月杪回英之後。因理論坎巨提及梅生罪名。滇緬界務諸事未暇籌議。及此近接北洋來電。知改派總主教一層。尙難就緒。而教王於做處亦無的實回音。自以暫緩爲是。惟乘去年教案之後。總宜略有變更。因於前擬章程十條中。抽出育嬰一項。專以清查此事。藉釋羣疑。爲言囑慶常往商法外部。詎外部以各省新出揭帖。及陝西教案爲詞。堅不就範。且據送閱領事所收各項揭帖。福成查

帖內有庚寅年刊刻等字樣。因令慶常答以教案及周漢等案疊次議結。此等數見不鮮之件。一概不能再提。外部謂此項揭帖實係新出。至年月則可隨意捏造。又答以年月捏造者頗少。且安知非領事去年所收藏。至今始呈報乎。至各處教堂啟釁之由。咸以育嬰爲藉口。欲爲經久之計。不得不設法剖白。以靖浮言。再三爭論。外部始允。以後准中國官紳到堂觀看。卽日函囑李梅酌辦。茲將擬商育嬰堂條議一件鈔彙呈覽。伏乞回明。堂憲並將鈞署近日與李梅商論情形示知。以便飭慶常相機因應。於事不無裨益。再據英外部稱

漢口嘉領事報湖南揭帖愈出愈多。力請電達衙門嚴禁。昨已發電矣。歐格訥於旬內啟行。專肅泐布。敬請

勛安。

八月初三日
英字第三十一號

擬商育嬰堂條議

查西國教會在中國各處所設之育嬰堂。因中國士民素懷疑慮。恐致匪徒造言生事。是以擬定辦法。俾釋羣疑而杜訛言。茲將各條開列於後。

第一條

一現在西國教會在中國各處所設之育嬰堂。其有若干處。坐落何地。應由各國駐京大臣開單知照。

總理衙門存案將來添設之處亦由該大臣開單知照均由中國國家飭令各省督撫轉飭地方官認真保護

第二條

一各處教會所設之育嬰堂應准中國官紳及體面之人前往觀看俾官紳等皆知該堂爲正經善舉以便開導百姓而使該堂之功德昭然其見則人自敬佩毫無疑惑矣

第三條

一各處育嬰堂首領應按季將本堂嬰孩出入數目

開單報明地方官存案。遇有死亡者。亦報明地方官查驗。飭派土工斂埋。並准令紳民往看。以破疑團。而杜仇口。則剜眼剖心之謠。不辯自明矣。

第四條

一凡育嬰堂收養嬰孩之時。應查其來歷。如有形跡可疑者。卽報地方官。儻係竊取之孩。查有實據。仍給還其家。如該堂曾經報官存案之嬰孩失去。亦可報明地方官。設法查追。

第五條

一教堂收育嬰孩。本係爲善之道。斷無中國愚民所

疑之事。然愚民所以起疑者。則中國拐匪之也。中國有等拐匪。慣騙小孩。肆行殘酷。如大清律例所謂採生折割之事。無所不有。迨經地方官嚴捕。往往投入教堂。恃爲護符。教士不知而誤收之。俾得仗勢欺人。遂致衆情忿怒。轉以拐匪所爲之事。指目教堂。百喙莫解。況拐匪亦甚狡獪。往往騙得數孩。以一孩送之教堂。俾教堂與之同擔惡名。亦太不值矣。自宜嚴飭教士。切不可濫收羣民。如接地方官符檄。卽速交出。如此可保育嬰堂。不至誤收被拐之孩。亦可保教堂聲譽日起。

第六條

一育嬰堂如能限定但收十歲以上或十二歲以上之孩童更可免招浮議

第七條

一各教堂育嬰堂首領與中國地方官紳應和衷共濟彼此以禮相待但不准干預地方公事儻遇有事之時可速報地方官妥爲保護

第八條

一以上各條應飭地方官及各育嬰堂遵照施行

論豁除海禁招徠華民書 壬辰

敬啟者。近日接到新嘉坡總領事黃道來稟。大略謂坡
埠富商多屬閩人。雖正朔服色仍守華風。然大抵土著
多而流寓少。其視中國官吏有同陌路。偶有回華再來
者。無不切齒痛恨。極言宗族戚里之訛索。官長胥吏之
欺侮。多自居化外。不願歸國。間有以商賈往者。不曰英
人。則曰荷人。反倚勢挾威。干犯國紀。推原其故。蓋緣中
國舊例。有不准出番華民回籍各條。當順治康熙之時。
因海寇盛行。嚴設海禁。例意森嚴。今則鄰交已訂。海禁
久弛。與往昔情形。截然不同。而舊例並無廢棄明文。奸

胥劣紳恃有此條得以藉端訛索致回籍華民萬萬不能出頭必須大張曉諭將舊例革除庶華民耳目一新往來自便力請 福成 奏開舊禁本日業已具牘據原稟咨呈 冰案竊思此等舊例在今日原同隔歲之舊厯積年之廢券存之毫無所用而一經剷除可以禁遏詭索招徠羈旅收拾既散之人心挽回積壞之大局所裨實非淺鮮惟事關各國交涉與數十萬華民之向背似不當由 福成 一人具奏必須 鈞署以全力主持方能與沿海疆吏呼應靈通擬請回明 堂憲酌奪具摺上聞恭俟

命下之日通飭沿海各省暨出使各國大臣一體遵行
愚見如此此信到後無論 堂憲能否允辦尙祈先行
電示以便轉告黃總領事似於公務有裨專肅布達

敬請

勛安

九月二十二日
英字第三十四號

四論滇緬界務書 壬辰

敬啟者十月十五日接奉 堂憲吉字二十一二十二號兩函敬聆壹是嘉領事各項函件均經細閱卽遣馬格理赴外部告以實在情形據山特生稱嘉領事年來多病難免性情躁急而漢口事務又繁已密商歐格納酌量調一簡缺俾資休息或漸須告退回國均未可定但不能不稍有遲迴以化形迹耳滇省新繪沿邊地圖攷證詳覈可備證據夔帥稱英所注意似在騰越西北通藏之要路實係洞見癥結之論此卽大金沙江東西之野人山地做處所以力爭劃江爲界者職是之故近

據外部稱此地嘗歸緬甸管轄現方催彼呈出確據以驗其虛實普洱以南潞江以東之撣人地歸我頗難控制歸彼又慮內逼自係實情惟權其利害重輕則內逼尤所當慮作爲甌脫一節英廷向不喜此辦法且恐名爲甌脫仍漸被彼佔據進窺滇境自不如先索之歸我約章既定流弊較少仍令各該土酋列爲屏藩處之羈縻之列由我保護實與甌脫無殊似亦不難控制惟聞撣人各地大半已歸屬暹羅客歲英與暹羅定界又稍割以畀暹所存似已無幾又查車里孟連兩土司幅員頗廣久在滇省版圖之內外部忽稱向屬緬甸

福成初

甚駭異。嗣將數十年來洋人遊歷車里孟連各書仔細
繙閱。每稱有緬官到此。又稱入貢於緬。始知乾隆中年
以後。如孟良孟密木邦蠻暮諸大土司。悉爲緬甸所吞
噬。車里孟連雖屬中國。不免陰與緬通。以圖固圉。英人
遂得藉端饒舌。然中國旣失緬甸於前。斷不可於車里
孟連諸地。稍有所讓。幸

福成

於發端之始。已索路東全

地。獲占先著。由此益知我不索地。則車里孟連。彼必益
思侵占。抵制愈難矣。自索分野人山地以來。外部設辭
延宕。已三閱月。迭經催駁。甫於十月二十七日十一月
朔日。會議兩次。大抵野人山地。爲英人全神所注。能否

竟允劃江爲界。尙難預定。然此事原爲前索二端。盤旋作勢。儻三端中能得其二端。似可見風收帆。察看情形。總當以辦到爲歸宿。伏乞回明。堂憲爲禱。肅泐布達。

敬請

台安。

十一月初四日
英字第三十六號

論巴西招工事宜書

壬辰

敬再啟者。巴西遣使駐京一事。前函已陳梗概。頃復詳加探訪。知該國政府用意。實係專注招工。竊查從前美洲各國在華招工之弊。如古巴、秘魯等處。皆有洋人集費在中國招雇華工。與立合同。給發船費。運送該處。轉鬻於種植田園。實需雇工之人。視爲奇貨。迨合同限滿。又被一再轉鬻。終身淪於異域。役使無異牛馬。所以有猪仔之稱。自日秘兩國訂立條約。稍革此弊。然當時因欲顧全先到之華工。不免受彼牽制。所立約章。尙難盡如人意。惟赴美國之華工。人人有自主之權。獲利較豐。

稱爲樂土。邇來該國又有驅逐之政。而華民之生計稍絀。今欲爲吾民廣濬利源。莫如准赴異域傭工。而保其自主之權。杜其驅逐之漸。則必待彼再三籲懇。與之議立專章。添設領事。方可操縱。由我儻彼稍未就範。不妨始終堅拒。蓋彼因注意招工。而遣使。或因不許招工。而撤使。似亦不妨聽之。然後招工。可無流弊。竊謂此事樞紐在許華工自往。而不宜允其來招。華民適彼國者。苟獲贍身家。蒙樂利。往返自如。出入無禁。則聞風者且源源而往。本無所用其來招。務使人人有自主之權。去留久暫。悉從其便。則田主非但不能虐待。而挾制扣留轉

鬻諸弊亦不禁自絕矣。至訂約之始，尤宜以重領事之權，杜驅禁之萌，爲歸宿。然後稽查有法，而規模可久。若夫洋人或挾重貲，或駛巨艦，動輒來招數千百人，運往該國，輾轉販鬻，必當嚴立章程，懸爲厲禁，自無疑義。因遣使一節，福成旣爲轉達，故再將招工利弊切言之。便中回明，堂憲察核爲禱。再頌。台安。十一月十四日

[illegible]

五論滇緬界務書

壬辰

敬啟者滇緬界務自仲冬朔日會議兩次後未能合龍又遣馬格理到外部數次設法磋磨惟野人山地印度英官全神所注不肯劃大金沙江爲界異常堅韌印度部尙書金白蕾尤蠻橫無理受印度武員之慫恿謂中國向不爭邊地儘可遣兵徑自經理所以昔董旣未撤兵旋又紮營昔馬攻擊野人復派兵至蓋西邊外之開社公言不諱查野人山本中國有權之地彼不俟兩國理論妥協輒先派兵占踞非特顯違公法大有藐視中國之意觀其如此舉動則彼旣得野人山地難保不再

聽武員之言。誘脅沿邊諸土司。窺伺滇西一帶要地。殆有必至之勢。其端倪已呈露矣。且聽印度部各員議論。其所以揣測。鈞署及滇帥之語。至爲可恨。所以連發兩電力請示。以堅持不讓。使彼自知所揣未確。必稍奪氣。外部亦深以印度部爲非。惟不欲與顯立異同。所以必欲俟我嚴詰。方可從中轉圜。昨告以中國亦須派兵赴夙昔有權之地。保護華商。其意稍有顧忌。蓋在我不違公法。而在彼必形掣肘也。大抵兩國辦理交涉。其曲伸損益之數。仍各以力量爲主。使臣口舌筆墨之功。不過可得十之二三。中國實在力量。並不讓人。無如數十

年來辦理交涉。尙未處處力爭先著。以致積重難返。爲彼所輕。固不能不設法整頓。而滇省逼近強鄰。選將練兵。必不可緩。庶和局乃可長恃耳。至野人山地。滇圖旣在邊外。無論爭之難得。卽令得之。

福成

亦知滇省派兵

派官。尙有爲難之處。然使彼族得之太易。又必益啟戎心。故宜儘力理論。使彼稍讓。我以利益。然後我之讓之。亦爲有名。庶可窒狡謀而資持久。

福成

擬卽親赴外部

晤勞德伯里。切實爭論。頃據山特生來函。昔馬似有兩處英兵所踞。蓋非蓋達之昔馬山。實蓋西邊外之昔馬也。伏乞回明。堂憲爲禱。除備牘咨呈梗概外。肅泐布

達敬請

台安

十二月十九日
英字第三十七號

出使公牘卷之五終

上虞鍾達卿承刻

出使公牘卷之六

無錫薛福成叔耘

書函 致總理衙門總辦

六論滇緬界務書

癸巳

敬啟者客歲臘月初九日暨十六日肅布英字第三十七三十八號兩函計登 籤室厥後疊發六電布陳梗概旋奉 鈞署五電敬聆壹是滇緬界務迭經 福成親赴外部晤該尙書勞偲伯里向之再三催促始訂元旦再行會商山特生約印度部侍郎貝雷與使署參贊馬格理仍赴外部集議彼族全神所注專在大金沙江東

之野人山地。繼乃漸露在潞江以東讓地之意。詢以所讓何地。據稱卽送圖略而散。旋據送到科干地圖節略。

福成

遣馬格理告以地太褊小。彼又訂正月十三日會

議一次。允再於潞江以西讓地一處。其戶口與科干相等。卻未據送圖說。繼議野人山地。彼謂大金沙江以東中國老界以西。須盡歸英統轄。馬格理與之力辯。山特生云。必不得已。或作爲兩國甌脫之地。再就中間勘一分界之處。其東近中國者。名爲東甌脫。歸中國管理。其西近大金沙江者。名爲西甌脫。歸英國管理。馬格理因以福成可允之意告之。詎料我甫應允。貝雷卽云此事

尙須電商印督馬格理詰以此議發自外部並非使館之言外部必早與印督商定始能出之於口何再電詢之有貝雷不以爲然次日復邀馬格理往議託云印度部尙書金白雷不肯答允且謂潞江旣經讓地則大金沙江以東野人山地應歸英轄野人山地旣作甌脫則潞江左右不能讓地馬格理詰以外部首崇信義豈可忽允忽翻山特生貝雷堅稱前說應作罷論現經福成設法磋磨屢次責問勞憇伯里並憶囑倫敦紳士在議院詰問英廷不應過徇印度之意致與中國齟齬妨礙大局外部頗爲著急意欲速了復於二十九日會議一

次仍未就緒。總之野人山地與滇境毘連。印督受武員之慫恿。窺我滇西武備之廢弛。未嘗不思得步進步。若全佔野人山地。即可相機誘脅諸土司。俾爲兩屬。彼所以儘力爭之者在此。

福成

所以儘力阻之者亦在此。如

山特生前次所許。適與我之本計相合。蓋大金沙江以東有一甌脫。足以阻隔印度。使其地不能生根。無從侵軼滇西。固宜其靳之甚堅。不肯遽舍。

福成

於初三日復

率馬格理往晤勞偲伯里。詰以外部自出此言。豈可無端翻悔。勞堅稱山特生並未請示。自陳所見。實係錯誤。福成爭論良久。勞始微露其意願。允滇西老界稍加展

拓其潞江東西兩地。仍請收受。並請福成辦文照會。再

當酌復等語。竊思彼族異常狡黠。異常堅韌。動輒借端停議。迫用盡氣力。催趲益緊。亦必閱月經旬。始議一次。議又猝難合龍。曷勝焦灼。目下審度情形。甌脫之議。斷難辦到。祇可就彼展拓之說。見風收帆。雖未能設天然藩籬。但留此展拓形迹。可使印度武員知中國讓地之不易。或稍杜其侵占之意耳。伏乞回明。堂憲爲禱。肅

泐布達敬請

台安

二月初五日
英字第三十九號

敬再啟者。向來使署與外部商辦要務。必須詳敘問答。節略以備查攷。此次理論滇緬分界事宜。已逾半年。英

之外部。既浮滑而兼堅韌。其印度部又强悍而兼狡黠。互相串謀。復互相牽掣。以致議論游移。事倍功半。或此部允而彼部復悔。或今日諾而明日復翻。所言既不足爲憑。迨往返駁正。彼此各執一辭。而前後實多重複。除關繫尤緊者。迭經電陳外。其餘已撮敘於迭次函牘之中。此事應期會議。與傳述語言。皆係馬格理一人。馬既承辦使館事務。又令奔走外部。實已萬分忙碌。若再責其屢敘問答節略。轉恐耽誤要務。且馬不知漢文。更多周折。目下英法兩館人員。差期屆滿。其事理通達。可以執筆者。已有數人。陸續銷差。人手不齊。此問答節略所

以稍缺之故理合聲明再請
台安
二月初五日

上巻之片

ネノ

四

再論阿富汗侵擾蘇滿卡倫書 癸巳

再客歲六月連奉 鈞署來電疆撫電稱阿富汗佔蘇
滿後進踞波孜納及家什激伯孜遷布民八九十戶赴
什克南布目不從均捆去應告英飭阿賠禮償卹布回
等因當時曾屢向外部理論外部允俟行查明確始能
照辦惟英廷祇能電告印度總督而由印度至阿富汗
由阿富汗至蘇滿及什克南多尙未通電線郵音往返
動須數月正在根查之際忽俄兵遊獵帕米爾與阿兵
開仗力爭蘇滿俄英阿三國正在口舌紛煩之際中國
自不必插入其間是以暫緩詰問迨冬間俄兵旣退不

能不理前說頃始據外部函稱阿王查覆並無此事等語刻下時異勢殊蘇滿等處尙未知誰屬則查究布回之事亦可姑緩並乞回明 堂憲再請 台安 二月初五日

七論滇緬界務及帕米爾事書

癸巳

敬啟者四月杪奉到 堂憲吉字二十三號公函並與
歐使問答節略敬聆壹是 堂憲堅持太金沙江爲界
之說甚覺得勁外部設法轉圜未始不因乎此自接外
部三月二十三日來文以後大致已覺就範除節次電
達梗概外因候滇省詳查地名回電中間小有停頓又
自紅蚌河起至天馬關一帶邊界亦係最關緊要初因
力爭野人山地不暇旁及近始與議此段據云印度日
內有詳圖寄到即可開談 敝處亦於五月初六日答彼
來文示以所分野人山地不能愜意蓋又爲紅蚌河以

上卷之六 卷之二
下一段作勢也。若此處議定，便可妥議商務，訂立條款。具疏覆陳，計已在秋深矣。車里孟連兩土司地形遼濶，實可抵內地半省。姚道前有英人誘爲兩屬之信，新設威邊一廳，亦從孟連土司地分出，又係卡瓦諸種舊地。英人因其向曾入貢於緬，遂欲索爲兩屬，以與野人山地相抵制。然此兩土司一廳，久在滇界之內，豈容稍更舊制？今彼允我收回全權，亦係堅索野人山地之力也。至孟艮土司地亦頗大，今已分散爲十餘土司，皆在潞江以東，直與暹羅接界。英人以其屬緬已久，未肯讓我，僅分科干地歸中國，乃孟艮之迤北一隅耳。舊八募作

埠之說。係本曾侯前議三端而來。客歲外部屢稱丙戌立約以後。當另起鑪竈。於所謂三端者。堅不承認。福成恐徒勞無功。不得不另闢畦徑。改爲索野人山地之說。扼定主腦。與之力爭。今計所得權利。較之三端。又互有異同矣。惟商務尙未開議。設埠係商務中事。舊八募雖難索爲我埠。新街設一租界。或可辦到。以商務須求彼此有益也。帕米爾事。俄外部雖允英使之請。暫不派兵入帕。然聞英俄各派員入帕察看一節。至今尙未成議。帕境西南一面。俄人亦未與商。其意或欲俟中國事有眉目。再與英人會商。亦未可定。俄人狃於從前黑龍江

一帶獲地之太易得步進步貪求無厭卽如光緒十年所定喀約因承辦此事者倉猝未及攷究不免受彼欺朦遂有自烏仔別里往南之說今已無可奈何然俄人自知理曲決不肯輕於發難如鈞署與許竹使堅持喀約力與磋磨似可不再有所讓也海禁自嘉慶以後實已早弛細核美續約第五條語意則舊例不刪而自刪確有證據今遵照堂憲指示恭疏具陳然此不過爲之嚆矢卽使議准之後所以使疆吏實力奉行不致徒成具文者仍視鈞署精神之所注此百餘萬華民所喁喁感戴者也以上各節伏乞回明堂憲爲禱肅

泐布達敬請

台安

五月十五日
英字第四十二號

論坎巨提照舊進貢書 癸巳

再承 堂憲示及英領兵官刁勒答復陶方之中丞照會語意太覺自專直以坎部爲印度所管中國官吏無須飭諭實與兩屬之義不符等因前奉 鈞電因俄人有中國已將坎部讓與英國之謠擬派員駐坎爲兩屬憑據以杜俄口而爭小帕米爾曾向外部商議據克蕾答云坎本兩屬英未損我權若欲權反加於舊則難小帕地屬中國各國皆知可嚴拒之已發電布陳在案今復趁彼兵官之出言背理告以中國不能不派員否則彼之兵官蠻橫自專不顧體制將兩屬者漸變爲專屬

中國豈能甘心退讓。爭論良久。外部始稱與印度部安商再覆。鄙意彼如允諭飭兵官一切均照原議辦理。亦勿干與華官與坎部交涉之事。自可姑允所請。徐觀其後。俟得的音。當由恰克圖電布陳。再去秋張都司鴻疇等赴坎會立頭目後。據稟稱各項禮節尙稱妥洽。惟於封立時曾向坎酋言及歲貢舊例。英官輒攔阻云。此事應由兩國大員議定後飭遵。敝處接到此信。卽向外部理論。告以此事早經議定。何以英官復有此說明。係不阻之阻。外部亦已囑印度部轉飭英官。如坎部入貢中國。該員不必與聞。敝處亦已函致喀什噶爾李道。囑其

自向坎部徵貢並以英官必不攔阻明告坎酋矣請卽
回明 堂憲知照陶方之中丞飭屬遵辦爲禱肅泐再
請 台安 五月十五日

論與法國聲明瀾滄江外滇屬土司書 癸巳

敬啟者。法國與暹羅啟釁一事。已兩次電陳梗概在案。數月以前。法國羣議洶洶。咸謂暹羅湄江以東之地。係越南與柬埔寨即真臘兩國舊壤。兩國既已歸法保護。湄

江東岸。均應割歸法國。湄江即瀾滄江下游也。初時暹

羅未肯就範。兵釁遂開。警信日至。駐英暹使遣其參贊

前來探問中國能否設法相助。福成囑馬格理告以該

國久輟朝貢。一旦有急。勢難援手。姑以此說卻暹使之

請。然就大計而論。中國未嘗不隱懼暹羅之亡也。英廷

爲暹羅之事。連日聚謀。頗形忙碌。并密勸暹人速與法

和法人隱慮中英兩國之援暹。遂未敢窮其兵力。兩發戰書。要以割地賠餉。暹人一一依允。現正互商和約。惟湄江東岸。既盡歸法國。法地多與雲南接壤。該外部所以有屢催分界之說。竊查車里士司轄境甚廣。有四大城在湄江以西。八大城在湄江以東。東境今皆與法毗連。近見法人新刻地圖。竟將車里東八城。劃入法國界線之內。似豫爲將來爭地。張本。意殊叵測。然車里東八城。屏蔽南徼。關繫臨安。開化。普洱各府形勝。萬一稍爲所侵。彼必蹈瑕伺閒。得步進步。滇疆之患。不可勝言。福成。因囑參贊慶常赴外部詰問。外部答稱。圖中本已聲

明尙難作爲實據。且云湄江東西滇屬土司之地。法國願不侵佔。彼因暹事未了。措詞尙屬和順。所以電告擬仿英廷辦法。乘其未生覬覦之時。速商外部。依言寫立憑據。彼旣無可狡賴。勘界雖稍緩。亦無妨礙矣。至議界一節。近數月內。自不值於法。暹多事之秋。攙與其間。轉嫌示弱。似應電告滇帥。遴派幹員。將車里東八城界限。及湄江以東各土司。密速勘查。俟詳覆到後。開議方有依據。商辦或在一年之後。福成交卸在邇。病體難支。久客思歸。擬將詳細情形。告知龔帥。遴星使。俾得相機因應。抑或山鈞署與李梅妥議。大約此事籌之豫而了。

之速必可順手。若辦理愈遲，則愈恐枝節叢生耳。以上各端，應請回明。堂憲爲禱。附呈英上議院問答節略。即可知法遲近事梗概。肅泐布達。敬請 台安。六月二十八日。

英字第四十四號

譯泰晤士報載英上議院問答節略

西六月二十一日

沙侯問於外部尙書勞偲伯里曰：暹羅允法之實在條款，未悉可以告知議院否？答曰：法人兩次戰書，第一次遲人於禮拜六晨約十點半鐘承允，第二次法廷謂卽第一次戰書補編。此書條款，我於今日下午方知消息，亦經暹羅答應矣。第一次戰書六條，一認

柬埔寨及越南有至湄江左岸及各島之權二限一月之內所有湄江左岸暹羅兵寨全行退出三侵凌湄南江法船水手及寓暹法民須愜意賠禮四懲辦罪人並賠銀給受害者之家眷五各種受虧法民應賠補法銀二百萬佛郎六擔保照行第四第五條所開之事暹羅須立即出銀三百萬佛郎如不出銀即將先利潑及班德本兩處歸法國收稅第二次戰書四條一法國佔踞湛地門江及岸待暹兵退出江左岸然後讓還二離湄江二萬五千尺地內不准暹羅兵入其地三暹羅兵船不得入大湖四法國有設立

領事於孟范及哥拉脫之權

八論滇緬界務及辭行 國書書 癸巳

敬再啟者滇緬界務自接外部三月二十三日來文以後大致已覺就範惟由穆雷江以南至太平江以北中間邊界最關緊要迭與外部妥議外部囑待印督所寄詳圖及所查兩國邊界憑據既多停頓加以勞憊伯里與山特生等或養病或避暑累次下鄉動輒稽延旬月洋人辦事之遲緩實過於中國遠甚漢龍天馬兩關經福成再四磋磨雖已許歸中國總須於勘界時格外留意又查印度所繪鐵壁虎踞兩關似較中國舊圖稍移而東或疑係印員之詭計冀我不能確指彼即可售其

日修公牘 卷二
欺或關有東西兩口。皆有十餘里數十里之長。彼但就東口填寫。致滋歧異。現與外部切實理論。彼亦不能強辯。擬儘三箇月中。將界務商務約章一概議結。似不再拖延矣。再前此劉芝田星使回華。在英則遞國書辭行。在法則仍循舊例。未遞

國書。全彼體面。已將問答節略鈔咨。冰案竊思英法兩國遇事多相競之意。此等虛禮。在我能一視同仁。尙無所損。而於邦交則有裨益。擬請回明。堂憲裁示。爲禱。再頌。台安。六月二十八日

論法使李梅覬佔車里土司書

癸巳

敬啟者前接六月二十五日 鈞電李梅請我議界所
擬界綫在緯綫二十三度零覬將車里全境佔去已駁
其誤希設法探訪車里貢遲之若干處若何名目能得
詳圖尤妙等因查法人初與暹羅啟釁頗鑒於越南一
役時時以中國干預爲虞又慮英人隱勸中國合力助
遲故法外部兩次與參贊慶常晤談聲明不欲傷中國
權利 福成初聞法藩部所印地圖擅將車里全境劃去
又聞有擬綫至二十三度之意因囑慶常向外部詰問
外部謂車里劃在中國界外係照英國舊圖所繪本不

上卷之片二
三
作爲證據。至北至緯綫二十三度之說。則諉爲新報傳
訛之詞。昨已將六月十九日問答節略鈔咨。冰案竊
思法外部欲使中國不助暹羅。故其措詞頗尙馴順。不
謂李梅復以其餘緒到。衙門嘗試也。李梅非必竟受
外部之囑。彼或素聞其國中隱謀。而不知外部已自更
改。或知外部雖已更改。欲姑試爲朦混。自以爲功。竊謂
衙門應付之詞。口氣不可稍鬆。恐彼乘間而入。或異
日執爲憑據也。車里屬部貢暹一節。細訪實無其事。英
外部於車里各部查攷甚詳。亦證其說之誣。至法人謂
車里劃在中國界外。係本英圖。亦曾向英外部詰問。外

部謂倫敦輿圖各店出圖甚多各式皆備原非國家所
及過問轉瞬界約一定續出之圖必將車里劃在中國
界內矣茲購得法印地圖四幅惟第一幅可查暹羅及
車里各境特稍譯註地名并標明原界及法所自擬之
界附呈察閱應請回明 堂憲爲禱肅泐布達敬請

台安

七月十二日
英字第四十五號

九論滇緬界務書

癸巳

敬再啟者。外部前送印度所繪滇緬界圖。其鐵壁虎踞
天馬三關地位。皆較舊圖稍移而東。似係有心朦混。稍
不審慎。便恐蹙地。今已將鐵壁關理論明確。其虎踞天
馬兩關。數日內必有確電。便可就範。界務卽稱全竣。滇
緬三面接界。犬牙相錯。周圍四五百里。一處稍不認真。
卽開罅漏。而印度各官。又狡黠異常。動思佔地。一加駁
詰。音信往返。動輒稽延時月。故此次分界。實爲異常繁
重。異常喫力。今界務幸已蒞事。商務祇立簡明條約。自
有大概規模。無甚爭論。現擬尅期於秋杪。一概議結。先

上修五版

卷六

以奉聞再頌

台安

七月十二日

論英法兩國議將車里南界外甌脫之地讓歸中

國書

癸巳

敬啟者八月中旬接奉 堂憲蘭字二十一號公函以
法暹有事李梅送到洋圖一分指所畫紅綫爲界意欲
舉車里士司全爲法有貪狡已極俟據滇圖度數再與
辯論等因查保護車里一事已疊發咨函電報縷陳梗
概在案外部覆文亦經參贊慶藹堂往催始據送到前
已鈔稟咨送備查昨聞送圖係李梅臆見並非外部之
意所以接到 衙門照會迄未轉達外部恐爲外部所
詰也洋使在華遇事輒思朦混以自爲功往往如此李

梅在華日久積習尤深近將受代回國大約新使明年可到。福成慮其別有覬覦情事囑藹堂於晤談時詳曉之矣。至法割暹境直抵湄江車里必先受逼卽彼允不損我權利而車里原界終難保不稍被侵占且勘界必多輾轉此。鄙懷所竊用耿耿者也。嗣據法外部告藹堂云英法現議於車里南界外設一甌脫之地俟議妥後可讓歸中國管轄蓋在彼本無所費不過藉此見好之意。福成知英廷必不肯讓法人獨自見好於我因令馬格理赴外部故露此說旣而外部開送節略果亦有歸中國之言且云現正與法爭論欲使格外寬廣查車里

南界外之地。譯音或作江墾。或作整欠。似卽孟艮土司舊壤。乾隆以前本屬中國。曩曾惠敏與外部原議。亦有由中國收爲屬地之說。旋因滇緬久不分界。英乃割與暹羅。今暹羅旣不能有。英法又不能管。惟中國受之。可息三國爭端。且有利無弊。西南兩面均以湄江爲界。形勢旣極穩固。勘界時可省無窮周折。祇有車里東面與越南毘連。自不至大受損礙。蓋得此甌脫之地。而後車里可安。車里安而滇省南境皆安。此地東西約百五十里。南北約三百里。計其幅員與形勢。似不遜於帕米爾。而土脈膏腴。則遠過之。若不煩口舌。不起風波。坐得此

地則中國威望愈隆。聲勢愈盛。屬我之後。不過用其土
司。俾仍舊貫。薄其職貢。善爲羈縻。且有英法保護公約。
在。更可無虞外患。此等難得之機會。不可錯失。似無疑
義。惟此時英法議其四至。尙未定局。姑靜待之。暫不露
出收受之意。做處告以報明。鈞署斟酌。便中令慶馬
兩參贊。示以我無所貪。必不得已而爲彼調停。亦自不
妨收受。蓋所以杜彼市德責報。更防其限制我之權力。
萬一屆時有不便收受之處。亦不妨拒而不納。我之進
退。更自綽有餘裕矣。以上辦法。慶馬兩參贊皆喻此意。
經理無不合宜。儻數月內未能就緒。新任到此。想意見

亦必相同也。伏乞回明。堂憲酌奪爲禱。茲附上英外部節略一件。車里節略二件。以備察閱。肅泐布達。敬請

台安。

十月初二日
英字第四十八號

英國外部開送節略

近來法國待暹情形

中朝諒必深知。今法國將向來屬暹地方大股奪去。勢甚岌岌。儻仍聽其侵削。恐卽吞併暹羅。未悉

中朝漠然置之否耶。刻下英與法商擬於英法兩國屬地中間。自江洪南邊界至湄江自東向西轉灣處。中間立一局外之地。各不占據。讓歸中國管轄。並欲

令該處地形寬大。法人則欲令其窄小。現正商議最要之時。儻中國欲爭聲勢。必速往開議矣。

車里屬部節略

從西人遊歷書內譯出

車里一名江洪。分爲十二板納。土人呼十二爲細魄

松。是以名爲細魄松板納。

板納又作猛

卽十二部之意也。

每部有一頭目。各頭目皆歸宣慰司管轄。宣慰司前

居湄江西岸之九龍山。約距江五里。

中國

近居湄江

東岸之曉明陽。約距思茅六日程。

英人麥克半曾於一千八百三十六年遊歷其地。又法人辣葛里帶人一隊於一千八百六十七年亦曾

往遊其遊歷隊之第二頭目名葛爾尼者曾刊辣葛里遊歷之書自西貢起程至東川地方辣葛里歿時一千八百六十八年三月十二日也葛爾尼繼辣葛里爲領隊頭目遊歷之隊帶總理衙門護照自江洪行至漢口遂乘輪至滬旋由水路回西貢於是年六月間到西貢距起程之日約二年之久葛爾尼云江洪之國分十二部其名如下

猛拉太

緊接中國爲中國之門戶

猛紀

爲緬甸之門戶

猛郎

爲景東之門戶

猛丰

爲暹羅之門戶

右四大部皆係要地

猛拉

近猛

猛虎

猛洪

建東

近猛

猛興

猛

邦 猛衣佛

右八小部皆次要地

葛爾尼又云名單有時不同從前包括猛尤在內如是則有十三部矣

英國領事波恩曾於一千八百八十五年遊歷江洪分十三部但未詳其名

英國駐紮曼谷

暹羅京城

領事阿爾哲曾於一千八百九

十年年底遊歷江洪據云今已無細魄松板納之名矣現在各部之名如下

猛分

猛拉

猛狃

此部又分爲
狃紐狃太

猛拉太

猛興

建東

右在湄江以東

猛紀

猛蒙

猛郎

猛海

及

猛星

王

及

分奧

及安

板

及

建陸

右在湄江以西

辣葛里遊江洪時宣慰司所住之江洪鎮雖仍在湄

江西岸而其地位已與麥克牢遊歷時不同蓋因國

內有事舊鎮燬爲平地後於別處復建新鎮矣

車里疆界節略

江洪卽車里別名東北爲十二部之猛狃佔括南狃

江上游全地。南瓠江及南德江之水流分界處。卽接連近布分之法國地。此地之下卽南德江。又名黑江。此處已爲法國地矣。

猛瓠之南。江洪邊界之地。至江鎮止。係在猛拉之地內。佔括南拉江上游全地。東邊南拉江及南瓠江之水流分界處。可爲實在之邊界。界綫可以劃得極清。此嶺上一山口相近處。大辣干地方。有柱數條。數百年前所建也。大辣干譯言金柱嶺。今雖僅存其柱。而此處自古以來。兩邊之人。皆認爲江洪與隆勃刺邦卽南掌國之界綫。我曾遊歷其地。覓得刻字石碑一小塊。今尙

存我處。此處想卽是所說之老辣干。又名阿倫辣吉。但其上無旗。亦不與安南相干涉。自大辣干起。猛拉之邊界。轉而向西。爲南瓠江與南太江之水流分界處。係天然之界綫。但江洪之地。展及於南太江低地處。南太江及南拉江之水流分界頗低。界限難分。邊界綫過南太江之支江。南德倫江之低地。截大麥鹿高崗爲二。由此登山脊。此山脊卽在江鎮之後。界綫不清。無處可爲好界限。因南太江之低地。及江洪內各小地。皆山嶺崎嶇。人民稀少。俱係遊行無定之土番。亦無貴重之樹本。僅一二處有鹽井。而南拉江低

地處鹽井較此更勝至此處作邊界之故須考其本地史乘方能詳悉一千八百年間猛南之土司進攻江鎮時並入江洪之邊境將該處居民移往南邊餘逃往北邊其地遂無居人徑至距今二十年之前北邊羅人即老過人始復來居南奧江之低地想因此處有鹽井之故耳由是逐漸開闢至南太江之上游此處之地係暹羅人所棄去者數年之前暹人欲越江洪界外數英里路爲邊界密士得哥林及暹羅測繪之人屢次設法入江洪繪圖俱被孟拉之官阻住致未成功

自猛犭東角至江鎮邊界全綫一帶地名今查得如下

霍南羅即南羅江之根源 班達 班顯南犭江岸 猛安

太南安江 大庚南庚江及南倫江 大辣干南奧

南法江之水 洽潑林 好南募 好南邁以上係

三支 葛倫德大石一塊約距 大登雲係一高山

江及邊界相近又與 黃庚特在南德 南紐本有前

花樹一株為邊界 浙倫門在大 脫辣邦在南太

之記號今已枯矣 山布白克在猛星

老撾人皆謂往南邊之邊界係在南分江口及海松

納約距浙倫門之北七英里

十論滇緬界務書 癸巳

敬啟者。滇緬界務商務約彙與英外部疊次商論。大致已算合龍。騰越八關。其迤北四關。尙在老界之內。可無轆轤。現既劃得野人山地一塊。四關更有外障矣。惟迤南四關。除漢龍關自明季已淪於緬。天馬關爲野人所占踞。此二關英人已允勘明後歸還中國。尙有鐵壁虎踞二關。中英均但知其名。究未審其實址所在。福成以爲必在滇界。英人亦視爲中國所固有。遂徑認爲我地。並未深論。近因與外部商劃界綫。而不知該關坐址度數分秒。則界綫不能劃定。特詳查中外圖說。並由

處徑電滇帥請其派員尋勘始知四關皆在滇之極邊漢龍天馬儼同異域固不待言卽虎踞鐵壁亦早爲英人所占矣英兵越虎踞關而東者一二十里越鐵壁關而東者亦近十里皆已築兵房修道路幸彼早有成議似難狡賴現已由滇員馳抵新街會同英員履勘數關半月內可以竣事必有來電卽可定約此又訂約稍遲之故也至通商各款外部必欲以天津所定越南條約爲藍本且謂如有異同則英不如法彼必爲議院所責備福成與之磋商半年似尙稍有進步至八募設租界大金沙江行船彼雖不認曾惠敏前議已有八九分答

允之意若訂約時不再翻悔則我所獲利益較多矣擬俟約章一定由電寄呈但電詞簡約難以解釋原委茲特將界務商務各條用意之處略爲表明冀電到時可互相參證或此函到時電音業已先到亦未可定

一分界各條悉照三月間原議惟所敘山水及地名繁瑣纖悉或係土音圖記無從攷核但期不致歧誤若悉照原文電達鈞署則電費不貲是以渾括其意轉覺大勢瞭如

一英人原讓之野人山地兩處約三百七八十英方里現因查出野人種類不一分地而居不能不查照原議

兼依野人所居地勢酌量分劃中國所得約短數十英
方里茲於分劃猛卯以東至潞江西岸之地照數補償
中國

一英人所注意經營者欲由滇西野人山通入西藏惟
自昔董以北狹夷怒夷之地英人亦未嘗深入其境外
部初議約略分至二十八九度之間但既爲人迹所不
至滇中亦無從查攷萬一受彼朦混分入藏地將來彼
必執條約爲證據關繫非輕現已再四與爭訂明白二
十五度三十分以北暫不劃分

一八募設關及租界一節

福成

援曾惠敏原議與之辯

論彼族始終不肯承認。據稱地球各國無此國設關於彼國地界之事。福成答以香港澳門中國皆已設關。卽

其成例。彼既恐中國留爲將來索地之據。疑慮多端。又謂華商之在八募者。不甚肯遵英官約束。若再設有華官。必更多所倚恃。福成告以兩國分界已定。斷不再生

枝節。華商得華官照料。勸諭漸守規矩。必可相安無事。彼終懷疑莫釋。告以立約試辦數年。如有流弊。不妨停止。現今馬格理先擬約稿。俟定約時再行互商。大致可以就緒。蓋洋藥稅釐併征章程。其初亦訂明試辦。至今收其利益。毫無阻礙。若八募設關及租界。可免彼在滇

境開埠利一。入募水陸輻湊關稅必旺。利二。設關在綰
轂要口。不必多設分卡稽查。利三。入募華商有官聯絡。
可收無形之益。利四。有此四利。不能不儘力磋磨。儻將
來能如九龍拱北兩關之徵收巨帑。不妨添設關道。更
可收利柄而張國勢矣。

一大金沙江。爲滇邊外絕大尾閘。較之潞江瀾滄江尤
爲寬深。兵商各輪暢行無阻。西人皆視名山大川爲國
家之寶。苟有機會。必以全力爭之。雲南遠隔邊隅。宜有
通海便捷之道。局勢方爲靈活。卽解運京銅亦可減省
鉅費。茲將行船一事。力與磋磨。若作爲公用之江。則形

勢與彼共之。利益與彼均之。彼始以慮他國援照爲辭。業已層層辯駁。定約時當可如志。

一英人援照越南條約。謂中國允法設領事者。共有五處。雖滇桂暫議緩設。而法於蒙自龍州蠻耗等處。已設領事三員。未聞中國設一領事於越南。外部初議在雲南省城設立領事。繼又指定普洱順甯永昌三處領事。均已與極力爭論。設法翻騰。現議定中英各設領事一處。中國設領事在緬甸之仰光。英國設領事在雲南之順甯。福成初意本欲罷設領事。乃彼執越南條約爲辭。竟不能不允設一員。且方與爭。八募設關。尤宜稍示牢。

日修公牘 卷二
籠而英人運貨入澳亦不可竟無一員照料致難鈴束
惟英人以限於一員謂與法人相形見絀意終未懌定
約時是否稍有爭論亦尙未定

以上數端關繫較鉅大致似可就範其餘各條或援照
成案無甚出入或臨時商辦容再續陳所以豫爲申說
者因重洋遠隔每達一函輒逾數月恐誤事機也伏乞
回明 堂憲察核爲禱肅泐布達敬請 台安
十月十日英

字第四
十九號

呈送滇緬條約並論小帕米爾及車里甌脫之地

書

甲午

敬啟者滇緬商界條約英廷疑慮多端內外互相牽制遲遲不決直至歲杪甫經定議已於正月初七日電陳梗概在案旋准鈞署復電奉

旨照辦

福成

於正月二十四日率同參贊等赴外部會

同該尙書勞德伯里互簽草約現乘各員銷差之便擬派繙譯世增隨員沈翊清賚送條約赴鈞署呈交以

昭慎重

福成

遂於二月初四日馳抵巴黎使署辦摺交

代事宜靜候龔仰使蒞任以便卽日內渡

福成

創議經

營尚未遽了之事。在英則小帕米爾之地。可與商劃歸中國。卽瓦罕帕米爾。英亦有願讓之意。在法則車里以南。湄江以東。甌脫之地。可與議明。收爲中國藩籬。俾滇南形勢屹然穩固。惟此二事。若索之過急。就之過殷。轉恐蹈躡等之弊。或啟彼挾制之謀。似宜靜以待之。稍俟機緣湊拍。則披卻導竅。不難迎刃而解。應由仰使到英。法後督同馬慶二參贊相機因應。不難循序以收厥效。總之洋人辦事。審慎遲迴。頗有急脈緩受之意。自不能不磨以歲月也。應請回明。堂憲爲禱。肅泐布達。敬請

台安。

二月十五日
英字第五十號

論熱河法國教堂賠款書

甲午

再福成

於抵巴黎之後往晤外部尙書白立業面遞說

帖尙以熱河教堂賠款爲言

福成

嚴折而詳曉之辯論

數四白立業無可置辭但請代爲電致鈞署察核此事

自法使李梅發其端彼自謂熟諳中國情形輒思肆

其恫喝故智觀其迭次照會辭意倨傲直以從前積習

待我中國英德等國已稍不如是矣迨李梅辦理不能

如志轉爲外部所尤是以有撤換之舉新遣熱使素有

能名諒尙必再三曉瀆以相嘗試然彼實違背公法不

妨以不願商量四字拒之彼其奈我何哉茲將外部說

帖譯漢附上並乞回明
堂憲爲荷再頌
台安
二月十五日

出使公牘卷之六終

上虞鍾達卿承刻

出使公牘卷之七

無錫薛福成叔耘

照會 劄文 批答

照會江南製造局總辦彙送譯刻西學書籍

爲照會事照得本大臣奉

命出使。亟應督率隨帶各員研求西學。貴局於天算

輿地製造格致各書。譯刻不少。均屬有裨實用。今擬將

局中譯刻各書。每種攜帶一部。以資印證。相應照會

貴總辦。請將局中譯刻各書。一分前來。以便本大臣攜

帶出洋。爲此照會。貴總辦。請煩查照施行。須至照會

出使公賣 卷七 照會

一 傳經樓校本

卷一

者

光緒十五年十一月二十五日

札繙譯學生寫呈日記

札學生

王豐鎬
胡惟德
郭家驥

知悉。照得該學生等隨本大臣出使泰

西。以策勵精神。增長學問。爲先務。惟不宣之筆墨。本大臣無由考其底蘊。課其淺深。今自登公司輪船之日始。該學生應各置日記一本。每日隨所見聞。自一行以至數十行。各聽其便。凡緯度道里山川形勢風土物產礮臺。苟閱歷有得。皆可登記。該生等每於次日。將前日所記呈本大臣親閱。一則藉覘該學生能否用心。可以隨時討論。一則備本大臣擇要選記。免得再費一番查訪。實屬兩有裨益。合行札飭。札到該學生。即便遵照。勿稍違

誤切切特札

光緒十五年十一月二十五日

札駐法參贊官陳季同合算中西權度表

爲札飭事照得光緒十六年四月十四日承准北洋

大臣李咨開據北洋沿海

云

相應咨會請煩查照

會同核明見復以憑轉飭等因到本大臣承准此前經接到總理衙門來咨正在核辦間查法義比三國均用法文該參贊久居法國精熟法文應飭該參贊查詢明白彙編成表先以中國之整數計外國之散數如中國一寸當英因制一四一之類再以外國之整數計中國之散數如英國一幅地當中國八寸五一零六三八之類彼此互相對勘由分至丈由分至斤編列成表彙

同稟覆以憑核辦。再查外國尺寸斤兩名目繁多。有量
體積量面積量流質量乾物之法。有權寶物權藥料權
雜物之名。又有至微極細。虛有其名而實無其物者。該
參贊若能分別臚舉。固善。如或一時未能查海軍原咨
係專爲購買船礮軍械等項起見。卽先將尋常用物之
尺寸觔重及銀兩數目。詳細聲明。分別比較可也。合行
札飭。札到該參贊卽便遵照辦理。毋違。此札。

光緒十六年五月二十二日

札新嘉坡領事官左秉隆籌設義塾章程

爲札飭事照得本大臣案查前卷有光緒八年十月該領事稟復在新嘉坡擬設義塾章程甚爲詳備前經

前出使大臣曾咨呈總理衙門核復旋准復稱以

經費支絀礙難撥款興辦或能就地勸捐試行自無不可應仍由出使大臣酌量地方情形辦理等因查該領事原擬章程以初設經費如房屋書籍等項約需五六萬金日後經費如束修獎賞等項亦須另籌五六萬金以備生息經前大臣曾批示將創設局面收縮量入爲出徐圖增廣後來畢竟如何辦理之處查前卷未據

詳報是否因集費不易以致中輟。現本大臣擬酌採該領事前議。小試其端。如原擬章程購地造房一節。似可改爲租屋暫住。原擬挑選生徒二百四十人。延訂總教習一人。教習八人。現擬先挑選生徒二十四人。或三十二人。至多以四十人爲則。延訂教習二人。分爲兩班。原擬董事四人。僕役七名。現改爲董事一人。僕役二名。所支束修薪水工銀。卽照該領事前定之數給發。合之獎賞等項。一切雜款及租屋之費。約計每歲共需二千餘員。查該領事原稟。稱該埠商董於創興此事。尙能就地籌款。如示以鼓勵。捐資更當踴躍。若照現擬之數。歲需

二千餘員。則捐集二萬金。常年生息。選定紳士數人。管理此項經費。仍由領事督察查覆。已可源源接濟。縱有不敷。爲數亦屬無多。可由本大臣酌量籌貼。自應察度情形。及時舉辦。合行札飭。札到該領事。即便遵照。妥籌詳細稟復。及時興辦。切切特札。

光緒十六年八月初五日

日修五用

卷一

三

札直隸候補知府姚文棟順道查訪滇邊及緬境情形

爲密札事。照得現據該員面稱前以在洋期滿稟請銷差回華。擬於光緒十七年正月由巴黎起程順道遊歷印度緬甸等處。當經出使德國大臣洪批准在案。各等情。本大臣查接管卷內光緒十一年英國印度派兵進據緬甸時。前大臣曾所與互商緬甸各事。除業經改議各節無庸申述外。英文參贊官馬格理與外部侍郎克蕾迭次商論。據克蕾稱英廷願將潞江以東之地。自雲南邊界之外起。南抵暹羅北界。西濱潞江。卽薩

爾溫江東抵湄江左右其中北有南掌國南有撣人各種咸歸中國或留爲屬國或改爲屬地悉聽中國之便
曾侯咨 總理衙門又云現所爭論者係索八募之地八募似卽新街在雲南邊界之西厄勒瓦諦江上遊之東龍川江下遊之北大盈江卽檳榔江下遊之南中國若得之爲通商之埠則邊防較爲鞏固收稅亦扼要隘等語復查光緒十二年六月中英所訂緬甸條約內第三款稱中緬邊界應由中英兩國派員會同勘定其邊界通商事宜應另立專章等語目下中緬界務雖尙未議定聞英廷已迭次派員或議築鐵路或察看形勢

或探詢礦產。現又議辦暹羅界務。彼俟布置妥協。再與中國會議。則彼考校已精。而我諸事茫然。斷無不受虧損之理。本大臣前已咨呈總理衙門。並照會英國外。部申明舊議。一俟暹緬界務事畢。卽當開議辦理等因。查得該員精勤穩練。留心時務。研究輿地之學。茲旣身歷緬境。便可順路諮訪。儻有切要情形。不妨隨時稟報本大臣。暨雲貴督部堂王。以備他日派員勘界之用。但此係乘便密查。尙非定期專勘。切勿顯露端倪。俾外人知我有查探之意。或致轉生窒礙。再緬甸之仰江。亦名漾貢。聞有華民三四萬人。亦係扼要之地。本大臣

尚擬商設領事該員如經此地亦卽留心查訪據實稟
復茲特酌給路費銀三百兩稍資津貼合行札飭札到
該員卽便密速遵照此札

光緒十七年正月初五日

札仰光紳董林作秉襄辦就地義舉公會並文報
爲札行事。本大臣現據鹽運使銜直隸候補知府姚委
員文棟稟稱行抵仰光。咨看商情。該處當英緬交兵之
際。賴各紳董維持調護。華民得以安堵。且義舉善會。次
第舉行。設立公會。宣講

聖諭。俾童蒙得讀華書。遠方咸被

帝澤。於化民成俗之中。寓忠

君愛國之意。實爲他埠之所未有。等情。據此。本大臣查
華民流寓各國。不下數百萬人。國家一時未能徧設領
事。全賴各紳董等苦心保護。和衷辦事。全國體卽所以

御外侮。今仰光紳商能體此意。本大臣披閱之餘。曷勝
忻慰。本大臣擬於仰光增設領事。雖未與英國商定。將
來諒可照行。俟領事到任之後。該紳等務須竭力襄辦。
佐理一切。本大臣當援案擇尤保獎。以酬勞績。爲此札
行該紳董等。札到仰卽遵照。切切。此札。

光緒十七年四月十三日

札新嘉坡總領事官黃遵憲給發英君主準勅

爲札發事照得本年九月二十一日承准 總理衙門

文開發給駐札英國新嘉坡兼轄海門等處總領事黃
遵憲文憑一分遞寄本大臣查照辦理等因當經照會
英國外部并將總領事文憑送驗請給英君主準勅去
後茲據外部聲稱將總領官之憑照一紙附遞並將君
主文憑給與黃遵憲領事官之權一併寄上各等因合
行札發札到該員祇領仍將收到日期申復以便查核
存案可也務希該總領事於任內應辦事宜悉心經理
以副厚望切切此札

計發
準勅一件
附憑照一件

光緒十七年十一月初三日

札新嘉坡

總領事官黃遵憲
繙譯官那三

代理領事酌給俸薪

爲札飭事照得

該黃

總領事現丁父憂援案照舊留差仍

給假百日回籍治喪

該那

繙譯官代理總領事事務查出

使章程惟出洋期滿三年請假六箇月回華者仍准坐

支薪俸其奔喪給假人員無坐支薪俸明文

該黃

總領事

雖經本大臣咨請

總理衙門准其接算舊金山前資

照章請獎若就到倫敦之日起算僅滿兩年且領事非

隨員可比既有應辦之事則必須有代理之人以一缺

而支銷兩分薪俸章程既無明文勢必難於開報惟

該黃

總領事回籍治喪費用既繁且坡署要務亦須照料籌

商本大臣現擬體卹變通辦法所有該總領事及該繙

譯官薪俸均照舊支領該繙譯既代理總領事酬應較

煩應由該總領事每月津貼庫平銀一百二十兩以濟

辦公而免偏枯則本大臣開報既可仍舊貫毫無出入

而該總領事與該繙譯通融酌劑以全寅誼庶公義私

情兩得其平萬一該總領事到期滿之時未能剋期回

任則既出百日之外所有總領事薪俸應暫歸該繙譯

支領俾昭公允除檄行該繙譯官外合行札飭札到該

員道卽行遵照切切特札

光緒十八年三月十八日

札新嘉坡總領事官黃遵憲設法嚴查華商船隻

販私結會

爲札飭事照得本年五月初六日承准總理衙門咨

復內開准咨稱據新嘉坡總領事黃遵憲稟稱新嘉坡

等處流寓華人日增繁盛其往來貿易與內地互相關

涉者有船舶財產逃亡拐誘誣告數端自應設法革除

擬請此後遇有事端較大者由總領事稟請出使大臣

轉咨閩督撫核辦其小事由總領事徑咨各地方道

府州縣辦理以期中外官商息息相通互相關照保護

除批准分咨閩督粵撫外呈請查核等因查該總領

事所擬各條爲保護華民起見自應飭令照辦至該處緊要事件若必稟由使署轉咨

粵閩督撫輾轉稽延動

須逾月設有要事恐誤機宜自應一面稟明使署一面

徑稟

粵閩督撫消息更覺靈通辦理可無隔閡再文內

所稱華商自造之船甚多其中輪船帆船及有無西人股分該總領事均應詳查具報此項船隻冒險販私及水陸平安會飛龍角等名目切須預籌弭患大約船上買辦若不串通斷難作祟坡港安分商民舉能言之曾於上年正月吉字四號函內詳指流弊請飭查禁在案現在既設立總領事官事權較重應再由貴大臣轉飭

該總領事官隨時密查各船買辦。如有前項情弊。卽將姓名知照閩粵地方官。設法嚴禁。以遏亂萌。而安商旅。並將辦理情形聲復本衙門等因。本大臣查該總領事於華商船隻。如有冒險販私及水陸平安會飛龍角等名目。亟須嚴禁。尤宜密查各船買辦。務期隨時整頓。以安商民。而杜奸究。遇有緊要事件。一面稟明本大臣。一面徑稟
閩督撫免誤機宜。爲要。合行札飭。札到該總領事。卽行遵照。此札。

光緒十八年五月十四日

日修五部

卷一

札委檳榔嶼紳商候選知府張振勳充當副領事

官

爲札委事。照得英屬新嘉坡改設領事官兼轄海門等處。其附近要埠酌設副領事官。前經

奏明在案。本大臣屢飭黃總領事留心訪察。總期人地相宜。前據黃總領事稟稱。選得紳士候選知府張振勳。在海門等處經商三十年。聲望素著。若爲檳榔嶼及其屬地威利司雷省並丹定斯等處之副領事官。堪以勝任等情。當經本大臣照會外部。請英廷允准。並發諭照辦在案。茲接英外部大臣函稱。接到新嘉坡及海門等

處總督來函稱已認張振勳爲中國副領事官等語合
行札委札到該副領事遵照仰卽盡心職守保護中國
民商遇事隨時稟商總領事官並稟報本大臣查核務
於任內應辦一切事宜妥爲經理以副厚望切切此札
光緒十九年正月二十日

批新嘉坡領事官左秉隆稟查各島華民情形由
據稟各島華民數目及辦法次第均係實在情形惟本
大臣查香港一島爲中外咽喉且逼近粵省交涉事務
極爲衝煩亟應選派賢員咨商外部核給准照前往開
辦至新嘉坡等處或改爲兼充檳榔嶼麻六甲領事或
改爲總領事兼轄新嘉坡附近之英屬各地及歸英保
護各國之華民仍須覓有妥員再行籌辦其就地擇派
殷商酌充副領事等官相助爲理事屬可行但宜隨時
隨地察看情形存甯闕毋濫之意總期於保護華民有
益而經費略有加增不致過鉅乃爲切要仰候妥商英

國外部並咨呈 總理衙門酌度辦理此繳

光緒十六年十月十六日

批直隸候補知府姚文棟呈報設立仰光文報由
據稟已悉緬甸既歸英轄中英界務交涉益繁暫於仰
光設立文報易於通中外之信似於滇南邊務有裨所
需信資應准其開報由英館撥給該經理委員既不支
領薪水或可援照出使文報之例辦理三年之後咨請
雲貴總督部堂酌保一二人仰候咨商 雲貴總督
部堂察核辦理除札委仰光紳董林作秉并咨明 雲
貴總督部堂外此繳

光緒十七年四月十三日

批姚文棟稟請仰光商董著有勞績援案請獎由
據稟已悉仰光商董歷年調護華民得以安堵且義舉
善會次第舉行設立公塾宣講

聖諭具徵拳拳故國之心披閱之餘實深忻慰至請將
紳董援案保獎一層查近年吏部有嚴核保舉之章極
爲認真前出使美日秘國大臣陳擇保金山古巴
紳董數名出使日本國大臣徐亦援案擇保橫濱
紳董數名均在開辦領事數年之後摺中卽以襄助順
事辦理一切爲詞本大臣現擬於仰光設立領事應俟
領事到任以後再行擇尤保獎以勸勞勩稟存繳

上修公牘

卷一

光緒十七年四月十三日

三

批姚文棟稟寓居印度華商擬請 奏頒廟額由

據稟已悉

關帝天后均列祀典朝野上下莫不崇敬惟中

國內地廟宇莊嚴馨香崇奉隨處而有其得邀

御書匾額者不過數處近年日本橫濱華商捐助山西賑款一萬二千餘員美國舊金山華商捐助順直賑款三萬零六七千員該商民等不請獎敘籲

頒匾額經直隸總督順天府尹先後奏頒該處 關帝

廟

御書匾額蓋因該商民等急公好義勇於爲善故有此特舉以答神庥卽以勸民義也此係破格創辦之事礙

難援以爲例。且該處廟宇駐藏大臣有堂基狹小門戶
壅塞之語。本大臣尤不便遽行瀆請。想該商民等素知
大體。必能諒悉也。此繳。

光緒十七年四月十三日

批印度華商黃琨等稟請設立加里吉打領事

由

據稟已悉查萬國公例無論何國商民寓居此國地方
卽應遵守其政令受治於法律卽如加里吉打俄法德
美各國雖設有領事而地爲英屬必應遵照英例不得
以本國之風俗有異政教不同自滋疑惑也該商民等
遠出貿易務宜勉爲良善恪守章程保全中國聲名毋
貽外人恥笑是爲至要至請設領事一節我華人流寓
海外者不下數百萬人而刻下止設七八處該處不過
二三千人設立領事經費浩繁一時尙難照辦也此繳

日修公牘

卷一

光緒十七年四月十三日

批越南華商林蕙軒等稟控梁雲峰盜賣農山煤

礦由

據稟及鈔件均悉。梁雲峰承辦農山煤礦。以辦理不善。經眾商議令退職。經將所領越南戶部執照。廣南巡撫部照。當眾交出。香港總理人收存。並繕立退職字據。事屬可信。其退職字據中。既聲明以後不能干涉盤據該公司事務。而梁雲峰仍擅將該礦賣與華人江亞木等。其爲盜賣亦毫無疑義。惟該商等於梁雲峰退職之後。竟不稟告越南戶部及廣南巡撫。更換名字。繕立新憑。直至數年之後。查悉梁雲峰盜賣。始行稟控。而梁雲峰

等先既稟法國全權公使由越南機密院準令法商姑尊等買受新商有辭可執舊商無憑爲據此實該商等自誤之由亦卽今日爭訟不勝之故也該商等以鉅萬之資歸諸烏有不平則鳴情殊可憫本大臣接稟之後登卽函告駐法慶參贊囑令訪問律師梳威利原冀設法申理昨據慶參贊函稟接律師覆函此案經代控都察院詎於上月初九日批駁未准無可挽回等語查法國體制上控之案如批駁不准案卽不能再翻本大臣亦頗爲悵惜惟據稟稱此礦現因失火延燒數月火尙未熄卽使爭回諒亦不能收拾餘燼再圖利益且尙須

納稅仍有餘累。該商等遭此不幸。祇可誘之氣數。所望
改圖他業。冀獲大利。庶慰該商等積年辛苦之心。本大
臣亦有厚望焉。此繳。

光緒十七年六月二十二日

批廣東惠潮嘉道曾紀渠稟陳辦理南洋各島情

形由

來牘閱悉。廣東惠潮嘉三屬民人在南洋各島謀生者日眾。外國屬地政令寬苛不一。中國已設領事之處。尙可隨時妥籌保護。其未經設員地方。誠苦呼籲難通。貴道所陳應行事宜三端。條理精詳。規畫久遠。具見良吏苦心。深堪企佩。查英屬地在南洋者。現新嘉坡已改爲總領事。其附近屬地亦奏准添設副領事。布置漸密。於粵省內地呼應較靈。所有事宜三端。係該總領事等分內應辦之件。自應責成悉心經理。毋庸再行派員。此

外如緬甸之仰光東印度之甲谷他近雖議設領事而
尙未就緒新金山一埠前經英外部聲明有礙難設官
之處似須通融酌量辦理凡此皆英屬地也小呂宋係
日國屬地加拉巴係和蘭國屬地其餘各國屬島在南
洋者尙多非本大臣奉使之國勢難越俎過問又查
前廣東督部堂張派員出洋查探係以遊歷爲名並非
久駐其地與來牘現擬辦法情形不同卽如其中緝拏
逃犯一端萬不能不照會本地洋員商同辦理若各國
未允設官之先遽擬辦此必生枝節且亦萬辦不到此
層在三端之中最有關係似應由 貴道稟請 廣東

督部堂咨商 總理衙門可否變通酌辦之處必有確
實把柄方可派員前往又出使大臣於外國屬地除札
委領事官及領事署中人員係照章辦理向無於例外
札委人員駐洋辦事成案所請派員商辦援案咨行各
節於事例均有未協礙難照辦本大臣極欽 貴道盡
心民瘼不遺在遠但謀事經始不厭反覆求詳率抒所
見以副商榷之雅此復

光緒十八年正月二十八日

批新嘉坡總領事官黃遵憲稟稱出巡各島由

據稟出巡南洋各島情形極爲詳晰足見實事求是之意至爲欣慰檳榔嶼設副領事既據稱查有候選知府張振勳智計過人羣相推重足膺斯任應俟與英外部商定後卽行札派以專責成大小白蠟等地各國旣未設領事則中國獨設副領事有無窒礙亦俟與外部詳細妥商再行知照可也此繳

光緒十八年五月二十八日

出使公牘卷之七終

出使公牘卷之八

無錫薛福成叔耘

洋文照會

與英外部商設英屬各埠領事

爲照會事。照得華民寓居英屬各地者極多。中英往來交情日加友睦。日增緊要。而中國領事官仍僅新嘉坡一處。本大臣擬請貴爵部堂漸除此等立異之見。稍合兩國親睦之道。及

中朝惠顧出洋華民之意。本大臣奉總理衙門來文。囑與貴爵部堂相商中國設領事官於英地之事。從

前議設中國領事官於新嘉坡時一千八百七十八年四月十六日。貴爵部堂致郭大臣照會內曾云中國與各國往來係照特定和約之章非遵各國通好之道。況中國尚未盡准洋人入內地。洋人商務亦未各處開辦。故不能援引各國之式。准派領事官分駐英地等。因此事於一千八百七十八年中國與別國往來或有此等情形。但於近日觀之。實無此等情形。中國並未不遵萬國公法。而近來十五年之內。更覺按照萬國公法辦事。雖尚未將內地各處盡准西人通商。然卽中國所辦之事論之。亦足有准設領事官駐紮英地之理。各友

邦均許派領事官分駐英地。中國深望英廷照此例一律辦理。中國有二十餘處地方。准令外國人民居住經商。其收稅之輕。與有約各國比之。中國實可稱無稅之地耳。計有二十二處。英國曾派領事官駐紮其地。本大臣請貴爵部堂詳察之。蓋非恐英廷有不允之意。不過於貴爵部堂前一爲講解而已。一千八百七十八年四月十六日。貴爵部堂繕寫照會時。煙台條約尙未核准。此條約內已言中國有派領事官至英地之權。又一千八百六十九年十月二十四日條約中。曾明言英國願認中國有派領事官至英國各處之權。此約雖

未曾照行。本大臣必提及此者。因欲聲明英廷已早有允中國派領事官之意。而其約之未經批准者。係由別事之故耳。今本大臣又向貴爵部堂言明。如此事商妥中國。並非欲一時徧派領事官分駐英國各處地方。因有酌量添設之處。並爲以後陸續派領事官時請給文憑之事而已。相應照會貴爵部堂。請煩查照。須至照會者。

光緒十六年八月十五日

與英法外部請給姚文棟遊歷印度緬甸越南等處護照

爲照會事照得本大臣接准 出使俄德奧和國大臣
洪 咨稱據駐德隨員候補道姚文棟期滿稟請銷差
擬順便遊歷印度緬甸暹羅越南等處舍海登陸繞出
滇黔查該員所擬遊歷之印度緬甸越南等處非有洋
文護照深恐艱阻難行各等因爲此特請 貴爵部堂
給發護照一張轉交該員領收以利遊行可也須至照
會者

光緒十七年正月初八日

與英外部阻止駐緬英員率兵私越滇邊土司

爲照會事照得本大臣奉 總理衙門來函之意照會

貴爵部堂中緬交界地方近來英兵遊歷其地有未
合常規之舉 總理衙門接得雲貴總督及雲南巡撫

會銜西曆五月初一日公文一角內開騰越普洱文武
官員稟稱英員帶兵多名至麻湯壘弄猛海等處中國
所屬土司地方在猛海地方又與土官宣慰司會晤麻
湯壘弄係騰越廳所轄土司地界來此英兵約有百名
馬二十匹大眾約有三百人又在普洱鎮地界之洋兵
約有六十名帶領官二員其一員似卽監督北揮人各

地把總德理友也中國委員刀丕文遇見洋兵之地係
猛海其日期係西曆三月初六日當經刀丕文勸令折
回並探問其來此情由據稱係奉鎮守緬甸大臣飭令
踏勘邊界到猛海來見宣慰司查外國官員與中國屬
下之士司徑相往來似不合於公法邊界上突見兵丁
即使不越邊界亦恐驚擾人民滋生事端

中朝欲令中英兩國邊界人民往來和睦是以囑本大
臣請英廷諭知鎮守緬甸大員謹慎辦事如有遊歷人
員欲往中國地界必須先行知會給發護照以便保護
儻兵丁欲遊歷中國邊界不得准其越界並不得准與

中國所屬土司交往爲望。此種要事。若行文告知鎮守
緬甸大臣。必多日方到。儻能將以上之意。電達駐緬大
臣。深爲欣感。相應照會。貴爵部堂。請煩查照。須至照
會者。

光緒十七年六月初五日

與義外部請交還中華書院產業

爲照會事。本大臣前據 貴國納玻里城中華書院學
長等九人呈稱。納玻里府向有中華書院一百七十年
前義教士馬國賢所建。馬國賢曾在中國效力有年。蒙
聖祖仁皇帝恩賚優加。回國後自出資財。創立書院。俾
中國子弟學習文字語言。格致諸術。按照學規。共計學
生三十四名。內設中國學生二十二名。作爲常額。乃近
年以來。貴國學部侵挪學產。以致興訟。經 貴國刑
司斷明。中華書院產業乃民家私產。不得侵挪等語。而
學部創定新例。擬將中華書院裁撤。以其產業改設東

文學堂致華生二百年來所享利益一旦剝削無遺此諸生呈訴之原委也以上各情本大臣前駐羅馬時曾於二月二十三日向貴大臣面陳梗概茲將原呈譯送查閱本大臣查中華書院設立已久爲中義兩國交誼綿遠之據況諸生所習語言文字格致諸學使兩國往來貿易通達情意聯絡邦交彼此有益之事想貴大臣居心公正辦事和平必能悉心查核持平辦理以仰副

中朝柔遠睦鄰之意本大臣有厚望焉須至照會者

光緒十七年二月初七日

與英外部駁除新金山加那大限制華民新例

爲照會事。照得自光緒二年在倫敦設立中國使館以來。本大臣之前任各大臣。曾辯駁英國屬地數處。看待寓居華民。及往來該處華民之無理。除前任劉大臣辦理葛龍巴一案。得以辦妥。廢其舊例。其餘各大臣之竭力辦理者。皆不獲成效。因澳大利亞仍設分別之例。以禁華人入境。加那大總政府之議院。復設前葛龍巴議院所定違法之例。不過稍改式樣而已。加那大新設之例。名爲一千八百八十六年禁止華人入境之例。其首段云。係英君主所定。加那大上下議院所允。備載所有

中國屢次駁詰之條。如英屬地澳大利亞所立禁止華人入境之例一式。中國

國家所不悅於此例者。非在限制之嚴。丁稅之重。而在專爲禁止華人入境之例。且明言非禁止他國人入境。乃專爲禁止華人而設。未免輕視。

中朝不以友邦相待。本年二月二十四日及二十五日。葛龍巴議院擬設加嚴之例。禁止華民赴加那大。辯論之際。擬將此例用以禁止日本人入境。與華民同。後仍將原議攔起。不言日本。此舉非由議院之喜日人。實恐載日人於例內。致犯日本國家之怒耳。本大臣實不解。

此理議院計及日本國家何以與中國

國家不同看待各屬地華民何以與待各屬地別國之民不同各屬地與中國均有極大商務英屬地所索利益自昔至今皆如願以償載入條約今苛待華民如此則以後英國屬地之民亦不能得此利益祇能照萬國公法而行總之無論如何概不得以相待如仇之例施於友邦之民而此苛待華民惡例爲澳大利亞及加那大所立中國

國家聞之深滋不悅屢由前任各大臣照會 貴爵部堂按照萬國公法與兩國條約細心合議本大臣茲亦

不必贅說。是以僅將以上數事爲貴爵部堂言之。並達總理衙門之意。望英廷速將此事革除。

中朝以此事非僅輕視中國。實是阻止兩國人民日漸親睦之情。此等用意。斷不可施。應由兩國設法更改也。相應照會。貴爵部堂請煩查照。須至照會者。

光緒十七年六月二十五日

與英外部請保護智利厄瓜多流寓華民

爲照會事。照得寓居智利及厄瓜多之華民前承貴國盛情。經貴國駐紮各該國等處公使暨領事保護等因。今本大臣接准總理衙門來文。囑本大臣照會貴爵部堂。

中朝欲請英國國家仍隨時保護寓居該國各處華民。至將來中國能有別種料理而止。如蒙照准。

中朝深爲欣感。本大臣是以請貴爵部堂垂察。望英廷准如所請。爲此照會。貴爵部堂請煩查照。須至照會者。

上卷之四

光緒十七年七月二十三日

與英外部請重定英犯梅生罪名

爲照會事。照得去年九月間本大臣照會 貴爵部堂

總理衙門來電稱有英民梅生一名在鎮江海關當差。因代會匪販運洋鎗已被拿獲。又於其衣箱內搜出炸藥禁物。後經審問。僅審其炸藥一項之罪。上海按察使判斷定罪。監禁九箇月結案。今本大臣奉 總理衙門來信告知 貴爵部堂

中朝初聞此重大案件。斷得如是輕罪。極爲失望。疑其判斷之不公。及細閱此宗案卷。與按察使判斷之詞。而失望之心更有甚焉。蓋以爲按察使未知此案之緊要

亦不知其分內責任之鄭重。查條約言英民在中國歸英員懲辦。英員宜如何令寓華英民各守規矩。自不待言。迨閱梅生口供證據。明爲哥老會中會友。與中國爲難。而身任鎮江關要職。隱與不知姓名數人結成私黨。並力勸關上同事及委員俱入其黨。又赴英屬香港雇募歐人十九名。並裝各種洋鎗三十五箱。包紮極好。假寫別物。以便到滬。欺騙關官。自帶炸藥。先赴上海一面。囑所雇之人附搭別船。隨後來滬。籌畫可稱精詳。僅鎮江一處查出之貨。已裝有洋鎗三十五箱之多。梅生犯此重罪。且有多條。一查此案。卽應照例懲辦。何以僅判

梅生炸藥一項之罪。卽炸藥一項例內。又何以僅定第四條之輕罪。而不定第五條之重罪。梅生又犯一千八百六十五年英國所定管理在中國日本英民之例第八十一條幫助亂黨抗拒。

中朝之罪。又犯在外國雇人之罪。以上所犯。指不勝屈。僅定炸藥一款最輕之罪。此何以故。按察使云。帶炸藥一罪。有極輕。有極重。此案宜斟酌於輕重之間。監禁之期。故減輕爲九箇月。此實非秉公辦理之道。因察該犯行爲。絕無可以從輕之理也。況此時適值民教不和。無論何國人民。查有幫助亂黨。騷擾中外之罪狀。必須格

外重辦方足以警效尤而梅生行爲更覺恕無可恕
中朝欲梅生供出同謀之人可以略從寬恕而梅生既
不肯供黨羽姓名亦不肯供買鎗雇人之銀由何而來
若謂梅生不肯供出之故因恐洩漏之後陷人於罪則
渠在公堂上已自供明初入會之意係欲查探哥老會
之細底然後將其機密實情告知中國官員今前後口
供不符明係叛黨始終通同一氣巧爲遁飾之語判斷
此案旣不得其平然補懲猶爲未晚是以欲望英廷俟
梅生監禁期滿之時解至香港再審判其所犯別項之
罪較爲妥當亦合一千八百六十五年英廷所定第六

十七條之例

中朝極懇英廷切不可令梅生於未辦之前先行逃脫。是爲至要。因各海關上雇用之人及各處通商口岸外國領事衙門各洋行中細慮人役多有會黨託迹其中。本大臣現欲嚴辦梅生之理不必詳說。但請貴爵部堂一爲斟酌。酌理即可知。

中朝於此事必大爲失望。貴國之人要中國保護而洋人敢私入哥老會以與中國相抗。

中朝安能不慮及將來之禍。且與各國睦誼有傷乎。相應照會貴爵部堂請煩查照施行。須至照會者。

大清光緒十八年正月十三日

炸藥例第三條

懲辦欲做轟發之事或製造炸藥或藏備炸藥有欲害人命或毀物產之意

英民無論何人在英地內或在英地外違例舉動

一蓄意用炸藥或幫人用炸藥以做轟發之事欲害人命或毀壞物產

二製造炸藥或備帶炸藥或管理炸藥有欲害人命欲毀壞物產之意或囑令別人用炸藥以傷人命或毀壞物產無論炸藥曾否轟發此人即已犯罪俟審實後即當辦其充軍不出二十年或監禁或連作苦工或不作苦工均不出二十年其炸藥隨即充公

一千八百六十五年三月初九日英國軍機處所定
管理在中國日本英民之例第八十一條
懲辦雇人打仗及謀叛之罪

一在中國當英君主與中國皇上友好之時
有英民欲開戰或同做戰事以抗中朝又或幫助
或鼓勵欲戰之人又或幫助或鼓勵謀叛之人以抗
中朝

二在日本國當英君主與日本王友好之時有英
民欲開戰或同做戰事以抗日朝又或幫助或鼓勵
欲戰之人又或幫助或鼓勵謀叛之人以抗日朝

犯以上之罪俟審實後卽當懲辦監禁其期不出二年連做苦工或不做苦工連罰銀五千員或不連罰款或罰銀五千員卽不監禁聽憑當時公堂定奪以上辦法懲辦之後又有加辦之法可將此犯驅逐出境不必再審公堂可以發諭逐出中國或日本至於逐出往何處聽憑公堂審定

第六十七條

提解犯人至香港審辦

無論有何英民犯罪凡在中國日本之地已設有英公堂者如審判各案應移至公堂審判較妥卽可改至英地訊斷定罪如是則犯人可解至香港審辦

如提解犯人至香港可將原審公堂所有一切此案
卷宗俱送香港並可令所有在事時英民到香港公
堂作爲見證

與英外部轉飭駐緬英員撤兵退出漢董地方

爲照會事照得近年以來本大臣迭奉

上諭向貴衙門或面談或行文告知貴爵部堂緬

督擅自派兵多股赴中緬邊界野人之地查察地理以致人心恟懼大有不便本大臣去年十月二十八日照會內所開之事及此次照會所說情形知英兵所到之處不特已入一千八百八十六年七月二十四日北京所定條約俟兩國派員查探之公共地方且已至絕無緬甸管理證據之地非惟緬甸無管理之證據實爲中國向來管轄之地有真實憑據可證英兵雖在邊界各

地·去·留·無·定·然·此·時·派·往·殊·不·合·理·且·恐·與·邊·界·土·人·
滋·事·

中·朝·不·欲·別·有·舉·動·惟·有·急·催·英·廷·早·日·派·員·以·辦·理·
兩·國·界·事·爲·要·況·

中·朝·於·此·事·等·候·已·久·從·前·英·兵·所·到·之·處·云·僅·查·察·
地·理·起·見·刻·下·英·兵·竟·已·佔·踞·一·地·故·派·員·定·界·之·事·
不·宜·再·緩·查·雲·貴·總·督·及·各·員·文·函·去·年·五·月·十·四·日·
有·英·兵·四·百·名·由·八·募·起·程·十·九·日·到·漢·董·該·地·向·屬·
隴·川·土·司·被·英·兵·焚·燬·房·屋·佔·踞·其·地·其·地·在·山·上·可·
下·望·隴·川·猛·卯·兩·土·司·之·城·兩·土·司·俱·歸·中·國·管·轄·

總理衙門以爲此舉深不合理。致緬甸本地之官似欲趁劃界未定之前。擅踞地方各節。是以望英廷立即發諭。囑其退出漢董。貴爵部堂或未知漢董在於何處。查漢董係在隴川猛卯中間。距兩處各遠九英里。閱飛智所繪地圖。猛卯正在中國邊界之內。又查加爾各搭印度政府與圖局一千八百七十一年所印之圖。講解安得生遊歷滇省西境報單。隴川在中國地界一邊。距華界有數英里云。相應照會。貴爵部堂請煩查照。須至照會者。

光緒十八年正月二十八日

上諭
附錄英外部尚書侯爵沙復文

爲照會事。照得本爵部堂接准 貴大臣前月二十五日來文內開 貴國國家欲兩國趕緊派員以定中緬疆界。又告知八募英兵佔踞隴川土司所屬漢董地方等因。均經領悉。今本爵部堂欲告知 貴大臣英廷自當審量此事。爲此照會 貴大臣請煩查照。須至照會者。

西歷一千八百九十二年三月初一日

與英外部請禁香港軍火出口展期

爲照會事照得前承香港政府於十月初一日發諭禁止軍火出香港口以六箇月爲期至四月初一日止今聞兩江總督劉報知

中朝場子江一帶各省經其竭力整頓之後雖地方安靜大有起色惟私會尚未全行歛跡前因私會之故致請禁止軍火今此事仍須嚴禁本大臣奉總理衙門來電請英廷諭囑香港政府俟禁期滿日仍行發諭展期再禁本大臣望貴爵部堂詳察准如所請爲感相應照會貴爵部堂請煩查照須至照會者

光緒十八年二月十二日

與英外部請阻止英兵過野人山境

爲照會事。照得西正月十四日日本大臣告知 貴衙門以總理衙門來電據滇督稱土司呈報英兵入野人山境以致騰越西北邊界野人騷擾異常。前因電語簡略本大臣未能告知英兵所到何地且 貴衙門亦未有英兵到該處之實信。今觀目下情形及騰越邊境之避難人知 總理衙門之電卽係指都司尤利所帶之兵攻擊薩洞納_董卽昔之葛干人一事。此兵於正月初到薩洞納遂與葛干人及居於滇省北境野人相戰數次。都司尤利之兵在中國邊界其所備軍器鎗礮等非僅

爲遊歷查地應帶之物。此事緬官必能知之。此等情形實出中國官員意料之外。後英兵將薩洞納佔踞。更覺詫異。查薩洞納地方及又有一處古勇地方。都司尤利所到。係上厄勒瓦諦江一段。皆緬甸界外之地。向來未經緬轄。此地所居皆野人。無國政亦無擔當責任之政。府將來中英兩國定界。應照一千八百八十五年曾侯告知外部辦法。分歸兩國管轄。刻下

中朝以兩國界事未定。此等地方不得驚擾。卽兩國如欲遊歷查地。或有不能不懲辦野人及干預野人事件之處。兩國亦應各在自己邊界一邊舉動。或在自己邊

界相近處之野人地舉動斷不得至鄰國邊界相近處
滋擾也相應照會 貴爵部堂請煩查照須至照會者
光緒十八年二月十五日

與法外部議裁越南等處華民身稅

爲照會事。本大臣前准本國總理衙門來函，以中國請裁越南等處身稅一事，業經前任出使大臣許於光緒十二年間知照。貴國前任總理外部事務大臣佛來希尼查辦在案。先是貴部佛前大臣遣員面稱此事，應俟將來查看情形，再爲酌辦等語。又於光緒十二年七月初五日照會許前大臣，內開本部前將遣員轉達之意，今再聲明，祇要中國襄助，便能有成等因。彼時本國總理衙門因越南等處尙未平定，經費支絀，是以未肯催辦，以示體量。現在該處地方漸臻安靜，

諸事大有起色。歷見公牘。信而有徵。竊喜貴國當年未能照辦之事。至此必可施行。況中國於越南等處邊界通商。不憚煩難。妥爲籌辦。原冀往來交涉等事。日增月盛。相與有成。諒貴國國家當有同心。自不待言。今身稅一事。旣與中越等處工商藝業。實有妨礙。想貴國必肯毅然革除。以表善政。且此稅雖名亞細亞客民身稅。其實大半出於華民。華民困累較重。人所共知。是以本大臣將裁革之請。復爲申明。務請貴大臣體察情形。允許照辦。以爲敦篤睦誼之據。而此事發端已閱五載。緩至今日。尤徵中國委曲求全。辦事和平之意。故

望 貴國通飭越南三圻等處卽所謂華印屬部之地將所徵之華民身稅一律革除以蘇民困俾中國工商雜藝人等貿遷有無通力合作推廣利源其沾實惠爲越南等處富庶之資於 貴國大有利益而 貴國行此德政中國自必欽佩可使兩國交涉通商邊界等事益加和睦裨益良多此正互相維持彼此交孚之道想貴大臣定能洞見無遺不待本大臣之贅述也相應照會 貴大臣請煩查照施行須至照會者

光緒十八年二月二十四日

與英外部預擬滇緬劃界事宜

爲照會事。照得貴爵部堂前月二十四日所寄中緬劃界事之節略。茲值候總理衙門回諭之時。本大臣先寄答覆節略一通。請貴爵部堂察奪答允爲荷。相應照會貴爵部堂。請煩查照。須至照會者。

光緒十八年二月二十九日

附答覆英外部滇緬劃界節略

昨接貴大臣本年二月二十日所寄節略。附圖一幅。繪明英廷所擬劃清中緬疆界大略。已轉寄中朝矣。但恐圖內所繪界綫。

中朝未必能允者。其端有三。一上厄勒瓦諦江之地。段。卽大金沙江在潞江以西滇邊之外通貫緬境入於南海。中國所應有分者。須全讓與英國。近中國邊界之人向認中國爲上邦者。亦由此而歸英。此不允者一。一將中國各處疆界推進一層。須有一大變動。由滇邊之西向厄勒瓦諦江至八募之東及東北方如舌形之地。本係方形。平日所見中西各地圖皆如是。今新圖將此地忽改爲三角形。與昔迥殊。此不允者二。一欲令雲南商務興旺。由厄勒瓦諦江運貨出海。最爲緊要。而今將蓋達以北商貨悉改由穆雷江。一名麻里江在檳榔江下游之北入於大金沙江。運

出反將厄勒瓦諦江之水路割去。此不允者三。從前英廷極願幫助

中朝令邊境上往來商務興旺。已允厄勒瓦諦江爲滇貨出口之路。而

中朝之意欲令此事易行。必須於八募相近之處立

一中國碼頭。則雲南出海礦產。既可省費。而緬甸貿

易亦必大有增益。所以曾侯曾議及此。擬於太平江

卽檳榔江下游一名大盈江亦入於大金沙江及穆雷江之間。厄勒瓦諦江

之上設一中國碼頭。庶幾滇緬商務各有起色。英廷

亦以爲然。因於一千八百八十六年允派員往八募

及厄勒瓦諦江上段窄處覓一合式之地設立中國碼頭今英廷若仍照曾侯前議則敦信睦鄰之道益加厚矣大約

中朝望英廷允許者其要亦有三端一將薩爾溫江以東之地卽潞江潞東之地係指普洱順甯西南邊外之各土司而言非謂滇境內之騰越以東地也並英國克緬甸時所得擇人之地均讓與中國

二厄勒瓦諦江上立一中國碼頭三厄勒瓦諦江爲中英兩國公用之江令中國船隻出海與英船同以

上三事亦係一千八百八十六年英廷已允中朝者前因英國已得緬甸全境此等事件關係較

小且於兩國均有裨益。是以英廷慨然允許。厥後倫敦商辦條約之事。改往北京商辦。英廷所索各要事。一千八百八十六年所定條約。一切均載齊備。而中朝所索各利益。無一條載入約內。英廷必知此係中朝疏忽遺忘。非因前允之事。未曾給與。貴國是以不載。向來英廷辦事。悉秉大公。此事諒仍照舊給與。

中朝至於節略末段云云。尤不得不一爲聲明。孟連

江洪

卽車里

兩地。英廷擬讓與

中朝者。此地實皆屬中國。因中國在彼聲勢大於緬

日修公牘 卷五
甸聲勢謂之理應歸還中國則可謂之讓與中國則不可也現正候

中朝答覆節略之時謹代

中朝先一爲陳說

光緒十八年三月初一日

譯英外部秘密節略

所附之圖繪明英廷所擬中英兩國邊界大略

北緯二十五度三十分之北邊界信息尙未全備自此處至南邊一帶英廷可與中國會同派員劃界以此圖所繪界綫爲底橐英廷之意所有上厄勒瓦諦

江之地均歸英國管轄則兩國俱有益處商務亦交相有益蓋有天然之山可爲界限則英廷可保護雲南來之商路英廷極願令其商務易行使界上來往商務興旺又於厄勒瓦諦江預備中國商務出路并願與中國於邊界上商立電綫可將印度電綫與北京電綫相接現印綫已築至八募照此辦法歐洲與中國之電綫又可另多一條矣英廷並願將江洪孟連地歸中國查孟連江洪有時進貢中國有時進貢緬甸今可認此爲中國屬地但中國須擔當治理該處政事以後亦不得送與別國

西曆一千八百九十二年二月二十四日

與英外部解明會立坎巨提酋之事

爲照會事。照得三月十二日寶星山特生來函所說英廷答允中國派員會立坎巨提王一事。總理衙門所會之意似乎與貴衙門所告及本大臣所知之意不同。本大臣是以必解明前說來函云。此次會立坎王辦法以後不得援以爲例云云。總理衙門所聞之華爾身者似限定僅可會立此次坎王以後再立坎王。中朝卽不得與聞。本大臣以爲此非函內字句之意。亦非外部所欲達之意。本大臣所知者係英廷不令中朝援刻下立王之例爲後爭辯會同立王之據。儻有

別項可問之理儘可查照向章辦理現因

中朝不欲失在坎納貢舊章是以解明函內所說之意
最爲緊要不得稍涉游移閃爍總理衙門前聞英廷
俟坎新王選定卽請

中朝派員會立等因甚爲欣慰今再講明必更釋然矣
相應照會貴爵部堂請煩查照須至照會者

光緒十八年三月十一日

與法外部催請裁去寓越華民身稅

爲照會事。照得華印屬部等處請裁華民身稅一案。前經本大臣按照總理衙門之意。於本年二月二十四日知照。貴大臣辦理在案。查此案前後懸擱已閱六載。

中朝頗以此事爲重。故不憚反覆申辯。況此等苛徵之稅。於中越等處工商事業。實有妨礙。徵之則彼此受累。革之則彼此有益。此中利害關鍵。前文已詳言之。諒

貴大臣早已明白。無須贅述。且總理衙門所以囑再催詢者。皆因兩國真心和好。推誠相信。似此案件。斷無

不能速結之理。本大臣前駐巴黎曾與貴大臣晤談此事。承貴大臣告以查明酌辦等語。乃至今尙無回音。未知究竟如何。如已查明。卽請示知。如尙未查明。務請作速飭查。允如所請。并望從早見覆。以便本大臣咨復總理衙門也。相應照會。須至照會者。

光緒十八年六月十五日

與英外部再論英犯梅生罪名

爲照會事。照得本大臣接准 貴爵部堂二月二十三
日來文。英民梅生一案。上海英公堂訊斷定罪。總理
衙門以爲懲辦未當。不足昭公道。承 貴爵部堂允爲
細心察奪。本大臣特陳謝悃。已蒙 貴爵部堂往詢審
斷此案之正。按察使亨甯及官律師威金生。並欲本大
臣解釋。總理衙門所云之意。茲本大臣告知 貴爵
部堂。總理衙門謂應辦梅生之罪。不止一款。當訊問
梅生時。梅生自認爲違例私會之會友。由香港購辦長
鎗手鎗及藥彈等。偷漏運入中國。以供會黨之用。又雇

十九人爲助。自帶炸藥。後經搜出。並有實據。此皆梅生顯犯各罪。斷不能掩飾者。而官律師卻僅控其帶炸藥一罪。謂梅生帶此炸藥。疑其謀爲不軌。所用梅生當卽招認。設卽按此論罪。照一千八百八十三年所定炸藥之例。亦應監禁十四年。並作苦工。今定梅生之罪。何以僅監禁九箇月。不作苦工。又未言定將來逐出境外。試觀近貴國華爾沙爾一案。所定懲辦炸藥之法。其罪輕於梅生。而懲辦反重。則所以懲辦梅生之輕。不辦自明矣。貴爾部堂接本。只臣照會。雖辯駁數端。而於梅生辦法之輕。亦無所措。詢查本大臣二月十四日照會。

貴爵部堂所辯論者一梅生不能援一千八百八十三年炸藥之例第二條控告因此第三條之例係專辦在英國犯款之人二梅生亦不能援一千八百七十年外國雇人之例控告三如照一千八百六十五年三月英廷所定辦理在中國日本英民之例第八十一條控告亦未見有加重梅生之罪緣此條辦法監禁不出二年今本大臣聲明各節查此次梅生一案罪重罰輕總理衙門所最不解者當此案審實之後僅按炸藥例一條懲辦且辦法并未全照英例此案若出英國懲辦必無此種輕法此中關鍵不得與可告梅生別項之罪與

不可告別項之罪兩說相混也。總理衙門謂現辦梅

生已認之罪與律例已不能合。儻將梅生所犯別罪再行提審則知辦法之輕與其應得之罪更大相逕庭矣。至於貴爵部堂所駁三層本大臣逐一詳究欲知來文所論之理是否先須知何者爲律例今照兩國條約而論一查軍機處所定之例卽知管理在華英民當用英例治之軍機處所定之例第五條內言管理爭案及罪案之權應照平常之理及公平之道並國家議定之例及當時通行之例在英國及爲英國辦理並給與審事公堂審判各權柄本大臣查閱此條卽足以答貴

爵部堂之辯。梅生亦可援一千八百八十三年炸藥例第三條控告矣。或者第三條例不能用於英屬地。本大臣亦不參意見。但英民在中國應用在英國通行之例以管轄之。則梅生之案。卽不得因例內有在英國字樣。遂云不能援引也。若謂同一律例。第四條可以援。而第三條則不能援。斷無此理。猶之英民在中國走近官房。有可疑之情形。可以辦其監禁十四年。並作苦工。同是此人。因僅帶有炸藥。見其將炸藥放於官房。而正在逃避時被獲。反不可以辦罪。有此理乎。貴爵部堂又謂梅生不能援犯一千八百七十年外國雇人之例控告。

本大臣二月十一日照會。尙未確知此例可援與否。今觀此例第三十條內。云外國國家字樣。非僅作外國國家之解。並可作一省之解。亦可作省內無論何人。或多人。或一人。欲與國家相抗之解。洵如此言。則哥老會亦可作外國國家之解矣。則梅生亦定可援外國雇人例。第四第五第六等條控告矣。因梅生在英屬香港雇募歐人十九名。購買軍器以供匪用。俱有實據。理應從重分別治罪也。若貴爵部堂第三端所駁一節。謂控梅生犯一千八百六十五年軍機處第八十一條之例。亦屬無益。照此審辦。罪名既不加重。辦法亦不加多。本大

臣詳加考核意見與貴爵部堂不同。本大臣查得英國辦理犯人常見有一人被控多款。儻審實其犯罪多於一款者。卽照多款分別治罪。如前嫡智邦一案。審得發假誓兩次。後定其罪。每次坐監七年。七年之禁。非同時兩罪並銷。乃分作前後計算。是以此犯坐監十四年。非僅七年而已也。儻將梅生應得各罪分別科斷。所犯決非一條。必如嫡智邦一案。逐款治罪而後可。卽使別項罪款。尙未能審實。而入哥老會之各證據。定可查出。則梅生之罪。亦不應如此之輕。僅監禁九箇月。不連作苦工也。今日午刻有一華人。由園慈華次監牢期滿放

出此人坐監三月。連做苦工。詢其罪爲偷漏稅項之故。偷漏僅梅生罪中最輕一款。辦法尙如是之重。今乃因僅控梅生一款之罪。又因其自己招認。案遂未曾深究。則訊判亦有名無實。枉法寬縱太不公平。梅生與哥老會來往證據。官律師應出力搜尋。在中國須與在英國一樣。此官律師職分應辦之事。不得以無從搜查推諉。緣英廷旣允遵照條約。管理在中國之英民。不作壞事。英廷尤須力任應辦事件。凡英民在中國結黨鬧事之案。

中朝雖無交出應有證據責任。而無不願幫英員搜查。

自上海審判梅生之後。總理衙門查出梅生罪款甚多。儻再提審。卽當交與香港審事公堂察辦。刻下本大臣將以上各情節告知。貴爵部堂聽憑辦理。近來歐洲各國頗患炸藥。國家人民皆受其損。實可懼也。梅生係首引炸藥。謀禍中國之罪魁。本大臣知貴爵部堂必將此人重辦。以示警戒。俾後人不敢效尤。且查英國懲辦炸藥之案。自一千八百八十一年至一千八百八十五年。犯炸藥案者二十九人。內十七人辦以終身監禁。連做苦工。其餘十二人監禁五年。連做苦工。自一千八百八十五年之後。審辦炸藥之罪。祇有日漸加重。未

見日漸減輕。日前華爾沙爾炸藥一案。罪犯三人。其所辦者與辦梅生同一條例。其罪若與梅生比之。直可云無罪耳。而按察使所定之罪。一犯監禁連做苦工五年。二犯監禁連做苦工十年。梅生所犯之罪。實爲有教化國家所當結實懲辦。不可稍從寬恕者。乃梅生所受之罰。僅如平常竊賊。是以本大臣欲其再行提審。分別定罪。不許再至中國。緣華人入哥老會者。多辦死罪。梅生逗遛中國。眾人見之。必起不服之心也。相應照會貴爵部堂。請煩查照。須至照會者。

光緒十八年四月十八日

與英外務部理論緬甸入貢事宜

爲照會事。照得本大臣接准 貴爵部堂三月初九日來文。承示按照一千八百八十六年七月二十四日中英所立緬甸條約第一款內。緬甸每十年派員赴中國入貢一次。因款內未曾載明第一次派員日期。印度政府誤從定約之日算起。料理派員赴華。本大臣欲告知貴爵部堂。條約內雖未載明第一次派員日期。而載有照向章辦理。每十年派員云云。卽此可知緬甸十年一貢之例。非定約時從新另立。乃照向來緬王分所應辦者。接續辦理。第一次派員之期。非照緬甸歸英國管

上修公牘
轄日算起須由緬甸未曾服屬英國時統前計後每屆
十年則入貢一次照章辦理茲從諦保王派員之期迄
於今日逐年計算英國應派員赴北京逾期已久矣相
應照會 貴爵部堂請煩查照須至照會者

光緒十八年五月初五日

與英法義比外部鈔借用洋債奏案

爲照會事。照得本大臣接奉總理衙門來文。奏明嗣後中國各省督撫借用洋商銀兩。必須預先奏明有案。方准借給。若無奏准案據而私借給者。

朝廷概不承認。已於光緒十七年十月二十四日奉

硃批依議欽此。此係慎重借款。以免洋商受累起見。除由總理衙門照會各國駐京公使。並分咨出使各國大臣。通行各國外部查照外。相應鈔錄原咨照會知照貴大臣查閱。卽請曉諭貴國官商人等一體遵照施行。須至照會者。

光緒十八年四月初八日

與英外部議定會立坎巨提西體制

爲照會事。照得本大臣接准 貴爵部堂本月十一日來文。承示封立坎巨提新王之事。因欲令中國官可以從容到坎。已照本大臣之所請。改定前八月十五日爲九月十五日。本大臣曷勝欣感。又承示封王之禮。克什米爾王頒敕書一道。由英員送交新王。中國官爲尊貴觀禮之員。當備以合式之位。本大臣知中國官赴坎。貴國國家自能發諭告知駐坎英員。優禮接待。然必須詳細解明。不致英員稍有誤會。本大臣亦可豫告中國所派之員。不至臨時有所爭論。所有應行一切禮節。須

在英預爲商妥英國官及中國官應在同一尊貴之位。克什米爾王所派之員居於稍低之位。如是則克什米爾之員不至與中國官並行。查棍雜城與倫敦及北京相距寫遠。儻在坎英員與華官或有意見不同處。欲從新請示。必多日方到。是以諸事須料理周備。免得偶有差池。以玷中英兩國封立坎王之盛典。此次會封坎王。乃兩國極爲親睦之據也。相應照會。貴爵部堂請煩查照。須至照會者。

光緒十八年六月二十六日

與比外部派員赴考核罪犯會

爲照會事。本大臣接奉總理衙門來函。知本年西曆八月初七日。貴國都城開設考究罪犯形體之會。因貴國駐京公使之請。擬由本大臣派員赴會觀看。本大臣查使署旣無驗犯官醫。又無形名律師。姑委三等繙譯官吳宗濂。屆期前往看會。以盡禮儀。其入會之費。法銀二十佛郎。已交該員祇領。面交會中可也。相應照會。須至照會者。

光緒十八年閏六月初七日

出使公牘卷之八終

上虞鍾達卿承刻

出使公牘卷之九

無錫薛福成叔耘

洋文照會

與英外部三論英犯梅生罪名

爲照會事。照得本大臣接准 貴爵部堂西七月初二

日來文。詳辨英民梅生一案。並鈔示上海英公堂官律

師來函。備述辦理此案巔末。及按察使來函所言大意。

以辨 總理衙門怪其定罪太輕等因。均已閱悉。查梅

生自供在鎮江通匪謀叛。又在香港招雇英人十九名。

滬關查獲洋槍三十五箱。種種罪狀。無可遁飾。本大臣

現雖不欲再爲多辯。然究不能不將官律師及按察使所言各節。一申論之。官律師告知 貴爵部堂。南京制台一面怪梅生定罪太輕。一面專派一員嘉其在公堂陳說之是。後云伊亦不必辯論。請本大臣自己解釋。伊所辦之事。早經制台極意稱贊。何以至今反被批評云云。本大臣欲告知 貴爵部堂。本大臣非爲各省官員辦事。乃代本國

國家辦事。卽就制台而論。亦未見本大臣初次照會意見與制台意見有不同處。制台贊官律師陳說之是。本大臣亦未嘗以官律師之陳說爲非。本大臣所怪官律

師者非怪官律師之陳說。乃怪官律師於此案應行查辦各節。未曾妥爲查察。並怪其僅控梅生一罪。致按察使雖欲審辨別罪而不能。至於律例一節。本大臣前次照會已經詳論。茲亦不必贅說。惟云梅生不能援外國雇人之例。訊問亦不能援一千八百六十五年英廷所定管理中國日本英民例之第八十一條。訊問此語殊屬不解。同一例也。第五條內明明詳載訊問英民自有英國尋常之例。及議定之例。何以英民在華結黨鬧事。偷漏犯禁軍火入境。而謂無例可援。俾得脫逃羅網。此實讞定梅生案情。未能曲當者也。若謂華員不知哥老

會作何事。欲向梅生探聽確信。此必官律師誤會華員之意。蓋中國嚴禁此會。案已不計次數。儻不知其有害。必不懲辦。如此之嚴。按察使謂彼職司。係照英律審斷。不計如何辦法。本大臣亦以爲然。蓋按察使應辦之事。卽照所控之罪。按例懲辦而已。官律師控告梅生犯炸藥例第四條罪。按察使照例應斷監禁二年。並作苦工。或斷充軍十四年。今按察使僅斷梅生監禁九箇月。不作苦工。按諸律例。相去太遠。中國之所怪者在此。非欲按察使照華例懲辦也。至謂梅生僅若與同席之人。造戲一劇。並無實在險事。不過癡妄之想。本大臣殊不以

此說爲然。梅生確爲結黨謀叛之人。卽就克老司開之口供證據核之。可決其非癡妄之想。蓋梅生早蓄異謀。實有望其必成之意。直至公堂審問時。忽佯作癡呆耳。故其語甚虛幻。前後不符。且本大臣不解梅生寫於日記簿之事。何以與造戲消遣一樣。此時同席之克老司開已不在海關矣。初雖不信梅生欲爲不軌。後旣見其眞實。何又爲之幫手。梅生將一切私事。均託克老司開經理。此外又有梅生力辦各種證據。如此舉動。何人能信爲兒戲耶。蓋梅生捨一生事業。不憚數千里遠赴香港。出銀購辦軍火。雇人作亂。而尙不得爲眞實證據。試

問 貴爵部堂更有何種證據爲真實乎。尤可異者。官律師盡知其情。於陳說時則詳論其罪。於控告時則不詳敘各罪在內。官律師云。梅生已入亂黨。係極險事。彼實欲將此軍火交與亂黨耳。此皆官律師自陳之言。而控告時卻不將各罪敘入。以致按察使無從審辦。而按察使亦以事同兒戲一語。輕爲開脫。則英國之例。必待重新修改矣。總之梅生所犯各罪。理應懲辦。不得以無例可援爲辭。官律師及按察使。理應照職辦事。不得袒庇英民。以致案情遁飾。去年教案一起。貴國公使疊向總理衙門。催逼懲辦鬧事罪犯。必如願而後已。稍

不遂意則謂中國法令不行。動以絕交用武爲辭。其情
形何等利害。今英廷於官律師所信爲與亂之人。竟不
一問其別項之罪。願英廷詳察之。今中朝正辦理教案。
所有撤官懲犯賠卹諸事。無不竭力爲之。以順各國之
情。將辦理不力。不能彈壓頑民之員。革職撤退。懲犯則
正法者數名。軍流徒杖者多名。賠卹則通計各處。其銀
三十餘萬兩。本大臣平心論之。當日愚民之蠢動。以有
會匪爲之倡也。會匪之鴟張。以有代辦軍械之梅生助
其膽也。中國被擾實甚。受虧實多。皆隱受梅生之累。謂
此舉僅係癡想。且云不能實有險事。本大臣實深悵悵。

明係招人謀叛而謂之癡想。則愚民之攻擊教堂。皆可云癡想矣。顯有洋鎗炸藥。而謂無險事。則不服西教者之謗書揭帖。更可無險事矣。中國愚民甚多。彼不知西洋律法之執一。而但見中外辦理之失平。萬一再有燒毀教堂及別項滋擾之事。亦將曰我兒戲也。瘋癲也。自此中國懲辦之法。更形棘手。請問貴爵部堂將何以處之。卽西洋各國公使。亦將不復辯論乎。貴爵部堂來文謂照英國常規。按察使所做之事。必令其全由自主。國家不得干預。然我中國督撫司道之辦事。亦有一定辦法。去年所辦教案。各省督撫實係委曲勉強從事。

其撤官懲犯各節。若照中國原定律例之意。本不應如是加重。所以如是加重者。亦爲顧全中外睦誼起見耳。自今以後。各省督撫。是否視貴國此次辦事爲榜樣。此非本大臣所敢懸揣。但望兩國交涉。從此平安無事。方不至再啟爭論。及一切難辦之事耳。相應照會。貴爵部堂。諸煩查照。須至照會者。

光緒十八年閏六月初七日

皇朝通志

卷十

七

與英外部告知奉

旨商辦滇緬界務

爲照會事。照得本大臣接准 貴爵部堂來文。爲中英擬劃中國與上厄勒瓦諦江地及英屬緬甸地之界綫事。本大臣將此文並 貴爵部堂前次言此事之來文。報知 總理衙門。今奉到本國

上諭。著與 貴爵部堂商辦。並商辦本大臣三月二十八日節略內所說別項之事。俟 貴爵部堂何日有便。卽可起手商量。本大臣擬各派一員。照從前商議各事同式。貴大臣派一員以代外部。本大臣亦派一使館中之員。先行相商。因本國

國家望此事早日商妥。務俾兩國劃界之事趕於秋涼
開辦也。相應照會 貴爵部堂。請煩查照。須至照會者。
光緒十八年六月十六日

與英外部催請商議劃清野人山地及滇緬界務
爲照會事。照得本大臣七月初八日照會所說一節中
英兩國派員會同劃清野人山地及中緬交界之事。必
須預商。本大臣望 貴爵部堂於放假期內。可以料理
商議之事。因中國急欲辦此劃界之事。不可令其再遲。
茲查劃界之期。轉瞬卽至。本國
國家望此大概情形。早爲商妥。俾兩國委員可以派出。
早日相會也。爲此照會 貴爵部堂。請煩查照。須至照
會者。

光緒十八年七月初二日

上
修
之
片
一
身
ナ

與英外部派參贊官馬格理與英員會議界務

爲照復事。照得本大臣接准 貴爵部堂來文。承示劃
清中緬交界之事。當預備開議。均經領悉。今本大臣已
遣本使館參贊寶星馬格理與 貴爵部堂及印度部
尚書所派二員。於明日下午四點鐘。在貴部衙門會商。
相應照會 貴爵部堂。請煩查照。須至照會者。

光緒十八年七月十一日

與英外部請退昔董英兵並索問厄勒瓦諦江上

段之地

爲照會事照得本使館參贊馬格理呈閱寶星山特生
本月十二日來函內稱 貴爵部堂聞本大臣奉到

上諭請英廷退出昔董之兵爲商議中緬邊界之首事

貴爵部堂甚爲詫異並欲本大臣言明索問中國邊
界與厄勒瓦諦江上游中間一帶地段之理今本大臣
據理而論昔董卽在此段地內請英兵退出昔董並請
允以後不再佔踞爲商議劃界之先務此乃自然之理
否則中國索問其地豈非徒屬虛文矣本年二月間英

兵初至昔董近地本大臣卽奉

特諭告知英廷英兵過野人山在騰越西北地方該處人心惶惑後爲英兵所攻佔踞其地又遵本國

上諭請英廷速諭退兵並不准再行前進因察勘上厄

勒瓦諦江東邊形勢必應歸入中國查本大臣與貴

部前任外部大臣沙往來文書及面談一切本大臣方

謂貴爵部堂必能卽允退兵況緬王屬地以北上厄

勒瓦諦江東之地在英國克緬甸時曾侯出使任內

早經論及嗣後本大臣與貴部照會中及五月間與

沙侯會晤時亦曾論及故昔董退兵之事前次會見

貴爵部堂及函內無須再行贅述因早經言過也

中朝旣欲索歸金沙江東邊之地自必力請英兵退出
昔董其地應歸中國正無須說出證據然旣承 貴爵
部堂詢及本大臣亦甚願答覆今將索問前緬王屬地
以北厄勒瓦諦江東所有之地起至厄勒瓦諦江之根
源而止中國索問之理可證者約有五端一照大概規
矩中國邊界一帶野人之地有別國進來不得不預備
保護二其地所居之民認中國爲上邦凡遇有事之秋
每請中國之示及請中國幫助三該處貿易及一切工
作居民皆中國人或中國種類之人四該處民人之教

化皆中國之教化五貿易之事皆中國人且每年加增
中國有此五證非特可索東邊之地并可索問厄勒瓦
諦江西邊之地則分界更覺均勻但必照此而行或致
界事難辦

中朝亦願省去跋涉不欲多索可令劃界之事不致耽
延儻因退兵之請遂致商議界事延擱多日本大臣實
深悵悵蓋因緬約在北京立後至今已六年矣界事候
商已久又因此而致緩議殊大失所望也且厄勒瓦諦
江東邊之地

中朝已屢次索問卽請昔董退兵一事於議界之先早

經說及今乃一言此事。貴爵部堂卽以爲異。尤本大臣之所不解。本大臣之意。儻英廷能允華兵到後。英兵卽退。則其餘劃界之事。仍可從早開議。本大臣亦不必再述。本月初八日。日本使館參贊在外部所說各節。英兵如退出昔董至厄勒瓦諦江之西境。

中朝擔承自中國邊界至厄勒瓦諦江一帶地方居住之民。不至滋事。務令道路通達。及保護商人可也。相應照會。貴爵部堂請煩查照。須至照會者。

光緒十八年七月二十七日

昌傳五期
卷ナ

與英外部請增修管理在華英民條例

爲照會事。照得總理衙門於西歷八月間照會駐京

各國欽差。請增修管理在華英民條例。諒經貴欽差

轉達。今本大臣奉文告知。貴爵部堂。總理衙門前

次照會。係欲照行天津條約。禁止軍火進口各款。益加

嚴密。去年梅生之案。及朝陽建昌亂民所用軍火。皆外

洋製造之物。由私運而得。藐法妄爲。不得不重申禁令

以便保護地方。按照一千八百五十八年十一月初八

日所立通商章程第三款。內云。凡有違禁貨物。如火藥

大小彈子。礮位。大小鳥鎗。並一切軍器等類。概屬違禁。

不准販運進口。又通商章程第五款第五節內云硝磺白鉛均爲軍前要物。應由華官自行採辦進口。或由華商特奉准買明文。方准進口。如違查出充公。此等大件較難偷漏。尙易防範。若第三款所說之貨。卽不易查察。一因此等之物掩藏極易。二因舊樣軍器其價在歐洲極廉。運赴中國。每得重價。偷漏入口。習以爲常。卽查出充公。亦不能絕其來路。一千八百六十五年貴國所定之例。未載懲辦此等違約事條款。卽查出英民出售軍火。祇要華人非明作叛逆之事。卽無懲辦英民之法。官律師不能控告梅生犯偷漏軍火之罪。可爲此節之

明徵也。

中朝深望英廷卽命律例官察度情形於管理在華英民例內修改數條或續增數條俾臻周備爲要本大臣請英廷詳察總理衙門照會並請諭知寓居中國商口岸英民相應照會貴爵部堂請煩查照須至照會者。

光緒十八年八月二十三日

與英外部添設檳榔嶼副領事

爲照會事。照得華民寓居檳榔嶼頗眾。中國

國家欲於該島設一領事人員。本大臣囑駐紮新嘉坡及海門等處之中國總領事黃遵憲選擇一合式之人。爲檳榔嶼及其屬地威利司雷省並丹定斯等處之副領事官。今已薦舉紳士張振勳莅此任。查張振勳係候選知府。卽檳榔嶼之富商。在新嘉坡及海門等處經商約三十年矣。頗有聲望。本大臣欲請英廷允准。並發諭照辦。曷勝紉感。相應照會。貴爵部堂。請煩查照。須至照會者。

光緒十八年八月二十七日

與英外部刪除加那大苛待華民新例

爲照會事。照得本大臣去年七月三十日照會所開及本年八月二十日與貴爵部堂面談之事。因英國屬地看待寓居華民與別國之民不同。近聞加那大域多利亞議政院又新改一例。於本年七月初九日照行。此例於寓居加那大華民大有關礙。一千八百八十六年間所立華人入口之例。本大臣總望英廷不可准行。此例之第十三條爲近所修改。煩苛已甚。頗覺不平。屢經中朝批斥。今不料所改之條不特未將前語刪除。且較前更加嚴酷。同一寓居之民而待別國之民與待中國

之民。顯分區別。殊屬太不公平。查所定原例。華人欲離加那大赴別處。將來仍欲回加那大者。給與執照一紙。以便回加那大時。出示執照。可免付丁稅洋五十員。不與第一次入境同。今改易之條。將執照廢去。加入以下所開章程。

一、每華人欲離加那大。將來仍欲回來者。應在起程海口或內地。呈送該處管理官知單一紙。單內開明欲赴外國某處海口或內地。去時及來時路程走法。送此知單時。須出費洋一員。管理官即將其人姓名住址。行業年貌。並別項應載之端。註入冊內。

二如此註冊之人欲回加那大須在六箇月期內自註冊之日算起期內回加那大經管理官查看無誤便可向該官收回登岸時所付進口稅如該官看此人可疑原銀卽不能收回亦不能控告

今觀此等章程是限定華民離加那大祇六箇月之久六箇月爲時甚促離加那大之華民難保無關涉貿易或患疾病或遇行船不測之事每易耽延逾限俟其回加那大覺已逾期看待卽如初次到埠之人稅銀卽不交還是令其付第二次之丁稅矣再如卽在六箇月期內回加那大若必須在前起程之地方官處證其是否

本人儻華人由加那大西邊文古法赴別國回來時欲在加那大東邊哈力法克司寓居則必由加那大東邊不辭遼遠奔赴加那大西邊管理官處以證其原人矣本大臣告知 貴爵部堂新例一事係加那大政府所改看待華民殊屬不公而

中朝見怪之大端尤在分別看待華民耳在加那大各國之民均給與一切權利獨於華民異樣看待此中朝所以常欲批斥耳英國有議政院之各屬地設此分別看待華民之例既不合中國條約之理亦與萬國公法相背且此等屬地與中國貿易最大得中英條約

益處最多。其看待華民。乃至今如是。本大臣望英廷速將此例革除。況如香港等處。寓居者華民爲最衆。華民享受一切權利。與別國民同。其管理之例。亦用同樣之例。未見有不足管理華民者。何以僅加那大與澳大利亞。必另設苛例。以管理華民乎。相應照會。貴爵部堂。請煩查照。須至照會者。

光緒十八年九月十一日

上巻
片
名ナ

與巴西駐法公使允准照約遣使

爲照復事前准 貴大臣西曆十月二十五日文開
貴國大伯理璽天德願照光緒七年八月十一日兩國
所定條約遣派使臣駐紮京師請代奏

大清國

大皇帝允准照辦以固邦交等因本大臣比將 貴國
之意電達 總理衙門茲接 北洋大臣李轉到 總
理衙門電稱 貴國旣願照約遣使自應按照中國現
行禮節與各友邦使臣一例接待以敦睦誼 貴國派
使何時能到中國如將所派銜名開示卽可轉達 總

理衙門奏明

大皇帝允准照辦相應照覆
貴大臣轉報
貴國查
照可也須至照會者

光緒十八年九月二十五日

與英外部續催會議滇緬界務

爲照會事。照得西九月初九日兩國委員在外部會議劃界事務。中國以昔董退兵爲商議界務第一件事。因此轉使界務輟議。英廷以爲有所阻礙。至今仍未肯續商。茲本大臣請貴爵部堂以退兵之請作爲未有其事。但本大臣欲聲明者。謂此次照會所請並非於索間厄勒瓦諦江上游東段之地稍行改易。

中朝仍欲索問前說一切全數。不過去其阻礙仍可復續前議。望從速定一日期。以便續商界務。本大臣昨與貴爵部堂面談時。許於下禮拜可以示覆。今本大臣

靜候來文盼切施行相應照會
貴爵部堂請煩查照
須至照會者

光緒十八年十月十四日

與英外部三催會議界務並聲明失望情形

爲照會事。照得本大臣接准 貴爵部堂本月初七日來文所言之事。類多含混。本大臣殊爲失望。前月三十日與 貴爵部堂面談之頃。英廷所詢

中朝索問厄勒瓦諦江之東。緬甸之北。一帶地段之意。均經本大臣答覆。承允下禮拜可有回音。迄今未蒙見告。又遵照 貴爵部堂收回昔董退兵之請。以便續開中緬界議。今仍未蒙定一續商日期。本大臣之照會。係九月十七日中國索問厄勒瓦諦江東上游之地。一係觀該處實在情形。一係照萬國公理。若欲查訪該處細

情現已數月英廷諒必查清若論萬國公理亦無待再
辯江東地歸中國之說不難早定刻下此段有數地雖
經英兵佔踞本大臣知英廷本不以此等地方卽據爲
英國之地無庸過慮卽暫佔踞音董亦不過欲懲辦葛
千人卽科所爲不善而已以後治理此等地方之人悉
由

中朝肩任其事務俾安靜可也相應照會 貴爵部堂
請煩查照須至照會者

光緒十八年十月二十四日

與英外部遵 旨致謝英君主送呈自製書集

爲照會事照得 貴國駐京欽差昨日覲見我

大皇帝時特呈 貴國 大君主所贈盒一隻內裝

書二本一係阿爾白王行述一係居巴麻宮之日記內

有一本卽 大君主自著

大皇帝見之甚爲貴重因此見 大君主與

大皇帝極爲親睦之據今本大臣奉 總理衙門電傳

諭旨致謝應請 貴爵部堂轉達此意於

大君主前相應照會 貴爵部堂請煩查照須至照會

者

上卷之月

卷之

光緒十八年十月二十六日

與英外部聲明開欽野人並厄勒瓦諦江上游應

歸中國

爲照會事。照得本大臣接准 貴爵部堂西去年十二月十三日來文內言

中朝索問厄勒瓦諦江以東緬甸以北地段之事。係答覆本大臣西九月十七日之照會。辯駁

中朝索問之理。其實僅駁復本大臣前文五條內之一條。此一條又非五條內要事。貴爵部堂僅辯開欽萬干野人不屬中國一事。此事本無關緊要。儻 貴爵部堂不詳問

中朝索問之理本大臣直不計及此等土人之事。今據來文謂英廷未能查得此等土人。中國曾經治理之實據。此說不然。緣各國屬地土人有向屬其國而無治理實據者甚多。非特邊界外有之。卽中國十八省內亦有之。如湖南貴州苗人。瑤人各種居於山中。平時不甚歸中國治理。而實未嘗不歸中國統轄。由此觀之。卽使中國未經治理開欽人。亦不得因未見治理實據。遂謂中國不能有治理之權。英廷查得百年以來。中國未經管理厄勒瓦諦江之上游。遂謂厄勒瓦諦江兩邊之地。至恩梅開江及邁立開江匯流之處。必係緬王派員管理。

本大臣殊不以此說爲確。英廷創此一說，是否欲索問厄勒瓦諦江與中國邊界中間之地？若果如此，乃此時商議界務新創之說。緣本大臣向未聞英廷提及也。緬甸北境與中國邊界中間之地，係一千八百八十六年間，曾侯與外部商議時，曾說明留出此地，在緬甸之外。日後須另行商議。自一千八百八十六年以後，凡有說及江東邊地之事，無不以此爲中國有聲勢之地。卽英廷亦屢有此議。昔董在華界一邊，照地理形勢，定應歸屬中國。西一千八百九十二年春間，

中朝請英兵退出昔董，英廷並無辯論。儻此段之地，亦

係緬甸所管。彼時必早說及矣。又貴爵部堂前任尙書沙侯在外部時。使館與外部往來文書及談論之際。分地之理。爲兩國所共認。未嘗有所駁辯。西去年二月二十四日沙侯節略內云。英國治理厄勒瓦諦江東之地。係因兩國利益有關。保護利益起見。必須先請

中朝答允。並非英國有治理之權也。本大臣於西去年末次與沙侯會晤時。言及厄勒瓦諦江上段之地。爲野人所居。自緬甸歸英國以來。情形改變。此等野人之地。將來必須兩國分之。此說已談及多次矣。

中朝雖知英廷必不改此辦法。惟貴爵部堂來文。旣

言及緬甸歷來之事。並云緬甸曾管理厄勒瓦諦江東之地。直至恩梅開江及邁立開江匯流之處。本大臣卽不得不將從前詳細情形再說一番。

中朝仍以爲厄勒瓦諦江上段之地。並非緬屬。與一千八百八十六年七月二十四日條約所載分界之事不同。今兩事自應乘便同議。商賈往來中國與厄勒瓦諦江之路。自宜保其安穩。開欽野番亦宜妥爲管轄。

中朝亦以此爲要事。俟厄勒瓦諦江上游界限定妥後。中朝當審量辦理此事也。相應照會。貴爵部堂請煩查照。須至照會者。

光緒十八年十二月二十四日

與英外部聲明管理江洪孟連及新設鎮邊廳權

勢

爲照會事。照得本大臣接准 貴爵部堂西十二月二十六日來文。內開英廷近查知一千八百八十七年雲南中國官曾發兵至孟連北方山中老瓦之地。後卽隸入滇省。設立鎮邊廳同知。以管轄其地。又管轄鎮邊及湄江中間一帶之地。此係傜人及別類土人所居。前爲孟連江洪所屬等因。今本大臣已經察核矣。英廷怪中國官如此舉動。大約因見江洪孟連兩頭且同時進貢中國及緬甸。似有同樣索問之權。謂華官管理其地。稍

改變一千八百八十六年前歷來辦事之情形英廷所得信息本大臣未知是否確實。儻係確音本大臣欲告知貴爵部堂雲南制台管理此等地方並非改變向時情形。即使江洪孟連實有貢緬之事中國亦未曾阻止。江洪孟連地方中國之聲勢較大英廷已早答認緬甸與江洪孟連之關涉較中國大不相同。中國所以索問江洪孟連者非如緬甸之僅在進貢一節。進貢不過有上邦之權而已。若江洪孟連非僅認中國爲上邦實資中國爲治理。回在雲南作亂以前江洪孟連向屬中國。惟此管轄之權作亂時暫爲停阻。該處小事中國

雖聽宣慰司辦理而其如何計地輸糧係由滇督派員定奪且徵收錢糧數目

大清會典所載甚明滇境設立鎮邊同知及管理鎮邊與湄江中間一帶之地不應視爲中國在該地別有舉動不過將一千八百五十一年間回匪作亂時暫行退出之管理稅務官員仍行派往收回從前權勢而已本大臣以上所說自足去英廷誤會之見

中朝之意以爲中英兩國交情所關儻能於此劃界之事愈早議定則愈妙耳相應照會 貴爵部堂請煩查照須至照會者

光緒十八年十二月初二日

與法外部申論刪除寓越華民身稅有益無損

爲照會事。照得越南等處徵收華民身稅一事。迭經本大臣咨請 貴國設法裁革。並飭代理使務駐法參贊官慶常面催在案。查此稅於該處工商事業均有損害。業將其中情形詳於歷次文牘。諒 貴大臣查閱案卷必能洞悉。無煩贅述。上年七月接准 前部大臣李

照會。稱此事正在籌畫。一俟酌定辦法。卽行知照等因。今遲至數月。未得要領。是以遵照 總理衙門函囑之意。再向 貴大臣重申前說。按身稅一項。於華民固有損於 貴國。亦得不償失。緣該處工商事業。皆須華

民爲之。華民稅輕，則工省價廉，百廢俱舉，其利仍歸於貴國。若華民稅重，則工費價昂，諸務拮据，其害亦仍歸於貴國。此中得失關鍵，一經道破，想貴大臣自然解悟也。況華民勤苦耐勞，安分守法，尤非他國人所可及。以越南物產之饒，自然之利，所在皆是，苟得華民通力合作，必能日臻富庶，裨益良多。惟貴國必須薄其稅斂，蘇其困苦，方能有濟。儻徵稅太重，財匱力竭，是自塞利源矣。試觀南洋各屬，部物阜民豐，商賈輻湊，皆賴華人經營之功。而其優待華民，諸善政實有足取法者。今貴國欲開利源，致富庶，曷不擇善而從，准如所

請則異日生發之利。取償之資。當有十倍於身稅者。捨目前多損少益之小利。而圖將來富庶豐盈之大利。是所望於貴國之賢大臣也。且今歲北圻各處盜賊滋熾。邊境擾攘。而法兵亦疲於奔命。比因總理衙門飭令邊界官員設法防範。以靖疆圉。護援法兵以敦鄰好。足徵

中朝休戚相關。遇事提攜之美意。卽此一事而論。想貴國所得之益。所省之費。亦當數倍於身稅矣。貴國素講禮尚往來之道。則革除身稅以恤華民。正與此道相符。且可表明貴國推誠相待之心。使兩國邦交日

固彼此皆獲裨益除飭代理使務參贊官慶常面陳一切外相應照會貴大臣請煩查照見復施行須至照會者

光緒十九年正月十六日

與英外部條擬展界讓地辦法

爲照會事。照得本大臣於本月二十日與貴爵部堂面談中緬劃界事。因貴爵部堂不認兩國分管甌脫地辦法。議論不協之際。貴爵部堂囑本大臣另擬一法。以八募東北中國界外一條之地。請中國稍加展拓。今本大臣雖仍以分管甌脫辦法爲是。然因貴爵部堂之請。仍允收受。貴國所願讓地兩處。姑擬辦法四條。一中國所索問厄勒瓦諦江東邊全地歸中國。今改爲中國邊界應行展拓之地。距邊界外扯算酌中之數。闊二十英里。自穆雷江起至北緯度二十五度四十分

止歸中國。二自北緯度二十五度四十分之外之地。俟查得該處地理情形。稍詳細後。然後兩國再定。三所有照以上所定地界之外。至厄勒瓦諦江之地。均歸英國。英國須將江洪孟連各處上邦之權。皆歸中國。並將薩爾溫江之東九鄉之地。俗呼爲科干者。讓與中國。又由薩爾溫江之西。中國屬地猛卯城相近處。包括漢龍關在內。起作一直綫。至薩爾溫江對面馬里百地方止。一切之地。皆歸中國。四所有兵寨。刻下或日後兩國之兵。儻遇駐於以上所說之地。非歸其本國者。俟議定邊界後。兩國再定退兵日期。本大臣擬此四條。送 貴衙部

堂察核如或不允此辦法則中國

國家索問厄勒瓦諦江上游全地之權仍舊如前耳相
應照會 貴爵部堂請煩查照須至照會者

光緒十九年二月初五日

與英外部續擬展界讓地辦法

爲照會事。照得本大臣接准 貴爵部堂五月初八日
來文。內開本大臣三月二十二日照會所開中緬劃界
事宜。英廷均經察核。惟所擬劃分上厄勒瓦諦江一節。
未能應允。另擬辦法等因。本大臣卽將英廷所擬寄呈
中國

國家查核矣。前本大臣所擬欲將中國界外自穆雷江
起至北緯二十五度四十分止一條帶形之地闊二十
英里。包括昔董在內均歸中國者。因華人散布厄勒瓦
諦江各處。並勒開伯陽墾拓陽及南塞陽地方爲最多。

以便易於管轄耳。乃今英廷所擬則大不然。劃歸中國之地一在穆雷江北一在穆雷江南。此二處絜長補短僅五英里闊一條帶形之地亦祇包括昔馬而不包括昔董則與本大臣所擬迴不相符。儻英廷所擬之條不至相去太遠。

中朝無不應允。今將厄勒瓦諦江東段勻分兩半歸英國者皆係平地歸中國者僅爲山嶺肥磽懸殊奚啻倍蓰卽此一端已可易英廷所許薩爾溫江東西之地及江洪孟連之權利矣。乃英廷又擬自薩伯坪北以薩爾溫江及恩梅開江中間之山水流分界處爲界綫兩江

相距如此之近。中間之山如此之大。是仍以老邊界爲
邊界。也是以未能答允。若照公平辦法。以邁立開江及
恩梅開江中間之地。分一界綫。較爲公允。望 貴爵部
堂一詳核之。至於英廷所詢

中朝索問穆雷江北厄勒瓦諦江全股地段之理。云英
亦有實在憑據。彙集印度。不難出以相示。本大臣曾於
去年十一月十七日照會內將

中朝索問之理。開列多條。除一條經 貴爵部堂辯過。
其餘至今未覆。卽外部商議界務各英員。皆以爲厄勒
瓦諦江東山嶺之地。向不歸緬甸管理。平地上亦僅米

紀納相近一小地爲緬甸所轄儻印度所得憑據異是顯屬新創此說本大臣不解緬甸索問此股地段之理在何處耳若云二十英里帶形之地劃歸中國以後山中土番來攻英地英廷便難防禦此論殊太牽強實非持平之見卽如近日厄勒瓦諦江東邊情形亦屬英人自好窮兵黷武

中朝屢次勸過不可輕攻開欽野人因攻非其時照羅馬古例自開邊釁不得向人索償兵費也相應照會貴爵部堂請煩查照須至照會者

光緒十九年五月初六日

與英外部轉催坎巨提進貢沙金

爲照會事。照得總理衙門接准新疆巡撫電信稱坎巨提每年到進貢之期而貢物未來請示如何索問等因。總理衙門知貢使未到之故非坎酋不願進貢必因諸事更新恐駐格里格提英員不悅是以不貢本大臣欲請貴爵部堂諭知坎酋英員並無此等意見前沙侯與本大臣所議之事貴爵部堂諒必記憶若坎巨提不歸併印度中國原不欲加權於該國而向來所有受貢及別項權利仍應照常坎部貢金一兩五錢爲數甚微若就權柄而論則所關甚巨總理衙門

頗以此事爲重。因外間有中國將坎權利已經棄去之訛傳。致令與別國交涉。辦理殊多棘手。中國欲去此訛傳。故必出而辨論。自印督發兵佔踞棍雜。與那戛爾之後。本大臣奉總理衙門電信。向英廷商論。擬派中國官駐紮棍雜。雖未經貴爵部堂答允。仍望英廷一再思維。緣此事實。在較妥。中國若無員駐彼。卽不能與坎酋通信。觀到期不貢一事。是其明徵。派員駐紮棍雜。雖屬創舉。但不可以此加權於舊耳。相應照會。貴爵部堂。請煩查照。須至照會者。

光緒十九年八月二十八日

與英外部願收受緬越甌脫之地並保護暹羅

爲照會事照得本大臣奉 總理衙門電信告知 貴

爵部堂

中朝極願暹羅恆爲自主之國及完全之地今聞英廷俱有此意極爲欣喜英法擬如何保護

中朝深願幫助辦理至於湄江上段英法地之中間擬設一甌脫之地 貴爵部堂前言願將此地歸中國

大皇帝屬下茲本大臣告知 貴爵部堂僅能令該處

地形寬闊無礙於中國利益議明送來

中朝亦甚願接受今查甌脫地之北邊與中國江洪毘

連江洪南邊之疆界向未分劃清晰無論何事如劃界等情

中朝自應與聞甌脫地之疆界揆之於理應以南禹江
卽南江爲東方之界限較妥蓋南禹江在江洪之猛禹
猛禹府內者既全係中國之江卽出猛禹境後其西岸亦
仍屬中國儻以南禹江爲甌脫地東邊界綫將甌脫地
歸中國則江洪邊界之難處可免矣相應照會 貴爵
部堂請煩查照須至照會者

光緒十九年十一月初九日

與英外部再催緬甸進貢

爲照會事。照得緬王每屆十年派員進貢。

中朝其期將及。遵照中國向例。自應先行知照等因。一千八百八十六年七月二十四日。緬甸條約第一條所載派員進貢之事。如訂定一千八百九十二年者。其初次英國進貢之員。應於本年年內抵京。今未悉所派之員何時起程。何時可望到京。請貴爵部堂示悉。以便本大臣轉告本國。

朝廷俾得預爲料理。於邊界上接待該員。並護送到京等事。不勝欣感。相應照會。貴爵部堂。請煩查照。須至

照會者

光緒二十年正月十一日

與英外部暫緩緬甸進貢一年

爲照會事。照得本大臣接准 貴爵部堂本月二十一日來文。內開現因緬甸進貢赴中國應過之地未定情形。擬將派員一節。今年應到北京者。展緩一年。俟兩國邊界劃定。治理兩邊地方。比今更臻完備。然後再行舉辦。等因。本大臣以派員起程路上或有未妥。今願自肩責任。答允展緩一年。但本大臣未奉

國家特諭。不能再允展至俟邊界土人安靜之期。漫無限制。現在所議條約已奉

國家明諭。畫押。本大臣更不能聽 貴爵部堂所勸。因

條約載有改變情形便可將十年派員之事停止舉行。所有未能從命之處。本大臣殊爲悵悵。是以請 貴爵部堂預爲料理。務使派員之事。明年舉行以遵一千八百八十六年七月二十四日緬甸條約第一款辦理。相應照會 貴爵部堂。請煩查照。須至照會者。

光緒二十年正月十一日

與英外部問照約定期收回新築大路

爲照會事。照得本大臣接准 貴爵部堂前月二十二日來文。內開印度政府俟八募至南坎經過華地捷路。其權利全歸印度後。卽可照本月初一日簽名條約第二款內。自蠻秀至南坎之路。永遠讓與中國。並停止建築等因。均經領悉。今欲問何時可將條約照行。以便修理赴南坎之捷路。因本大臣將此情節。於條約簽名後。已告知 總理衙門也。相應照會 貴爵部堂。請煩查照。須至照會者。

光緒二十年正月二十八日

與英法義比外部告知

皇太后萬壽慶典

爲照會事。照得本大臣接准

總理衙門電開光緒二

十年十月初十日。卽西歷一千八百九十四年十一月

初七日。恭值

皇太后六旬萬壽。普天同慶。典禮攸崇。擬請 貴部堂

轉奏

貴國

大君主
大總理

璽天德 本大臣不勝欣感之至。相

應照會 貴部堂請煩查照。須至照會者。

光緒二十年正月二十八日

與英法外部告知呈遞辭行 國書

爲照會事。照得本大臣接准 總理衙門電開新任出

使 貴國大臣龔將次抵洋。所有本大臣辭行

國書。前曾陳明奉託 貴部堂轉遞。茲特送上。敬請

貴部堂恭呈 貴國 大君后 大伯理璽天德 曷勝感紉。本大臣

奉使以來。屢承 貴國國家優待兼荷 貴大臣遇事

和衷。易於商辦。現屆任滿。敬陳謝悃。須至照會者。

光緒二十年二月二十日

出使公牘卷之九終

上虞鍾達卿承刻

出使公牘卷之十

無錫薛福成叔耘

電報

光緒十六年六月十八日遞天津

中堂李密海部咨外部撤回羅哲士等昨勸外部暫緩
如琅威理事能轉圜敷衍到滿限尤妙成嘯

八月初七日遞北京

總署密英欲駐員喀城意在與俄爭勝通商尙難定卽
詳細函陳請且堅勿允以函詢敝處爲辭成虞

八月二十四日遞武昌

督院張四月電詢鐵廠用鐵柱瓦等價。諦廠謂須繪圖確估。今據稱貝色麻鋼及做鋼路廠鐵料價萬七千一百鎊。熟鐵鑪及拉條廠料價萬六千九百八十九鎊。候電再訂。鐵礦磷質多難鍊。鋼另覓佳礦尤妥。成敬。

十一月二十七日遞

北京天津

總署中堂醇邸薨。擬照會外部。並下半旂十日。似應電知各使館一律仍候示成。沁。

十一月二十八日遞

北京天津

總理衙門密。今年到洋鄂電較繁。而電價甚昂。因憶大北公司前議報效官電。後忽翻悔。又不肯完落地稅。各

國電綫國家皆有應享權利。並不准商人擅設。大北大東來華設綫。本無核准明文。惟事閱廿年。驟難驅撤。聞東北兩公司由英俄暗中扶持。自爲有事時通電起見。惟該商擅來設綫。奪我自主之權。若德法美倭各商援例效尤。中國門戶洞開。何所底止。卽如甲申年孤拔接法廷密電。掩我不備。遂有馬江之失。愚見藉保護先在華效力之兩公司爲名。卽杜外洋他綫之來。俾報效官電以全體統節巨費。凡遇要務。可多發電以通中外消息。且有事時不爲我敵國通電關係尤鉅。因飭馬格理與兩公司理論。舌敝唇焦。始無定議。未敢瀆報。茲彼已

就範願訂合同約陳大旨一大東大北兩公司素爲中國出力今明認其在上海福州廈門辦理電報事務其吳淞口川石山鼓浪嶼及吳淞口外之大戢山四處向有登岸之水綫頭允其仍享所有利益二自合同批准之日起以十五年爲期准兩公司獨享利益除中國電報局外不准別國公司在中國海邊安設水綫期滿後中國與兩公司或照行原訂合同或酌量修改半年前互相知照三允兩公司與中國電報局自行商訂各項章程祇須無礙國家應有之權利均可准其通行四兩公司如未稟經中國核准不得於向有海綫之外在中

國別處海邊安設海綫並擔保查看所發電報如有損礙中國之事均卽停阻至中國六部海軍總理衙門各省將軍督撫欽差大臣海軍提督統領出使大臣領事官代辦使事之參贊所發官電及答覆此電之電報兩公司均不取費惟經過別綫之費兩公司實在付出者中國允照數償還六兩公司應將中國電報所經別綫之價單隨時送中國官員察閱儻該綫有減價之處亦卽照減七兩公司允將現在電價相機酌減俾商民廣用電報振興中國商務俟減定後所有與上海福州廈門往來之電價無論水綫旱綫一體遵照八無論中國

與何國動兵或似欲開戰之時中國國家可將該公司電報館看守或派員往局監察或徑自管理其寄電等事或全行禁止其寄電等事或佔據其電館暫用以寄中國電報均聽中國之便九訂立合同應繕成華文英文各兩分仍以華文合同爲憑如有應辦事件在中國由南北洋大臣行知兩公司在外洋由出使大臣行知兩公司以便遵辦以上九款雖經別綫仍須出費可減原價三分之二歲省數萬金多事時或省十餘萬金且並無限制更可廣捷聲息惟須趁此機會速與訂定免彼再聽人言翻異可否代奏請

旨准訂合同再由成具疏恭候批准即可開辦此係收回國家權利與電報局無涉且第三款已留電局餘地請勿發議以杜漏洩亦慮兩公司漸生異意至盛道去年所議合同牽於數國一國不允卽難照行徒滋延誤今英廷已批駁矣此電爲電事而發各公司例不取費再英丹俄公使若問此事請告以中國自主之權不願他人干預回覆決絕仍祈速示成儉

十二月十九日遞北京

總理衙門密陽電謹悉第二款不准別國公司在我海邊設水綫北東兩公司函謂他國必生異議此係北東

爭論時情形當大北初來設綫時大東起而相爭謂威
妥瑪前在鈞署理論滇案曾言明在中國設水陸電綫
雖允否未可知威使擅稱鈞署允之所以北東兩不相
讓今大東既設英已無辭趁此訂立合同各國現無要
挾之端必無異議蓋自主之權非他人所能干預美續
約亦明言之況借此杜他綫之來乃永保自主之權前
電不欲英俄丹使與聞者明與彼國家無涉卽非各國
所能問也北東於第四五八等款與我絕大權利若第
二款不行則全款當廢殊覺可惜擬仍照原議商訂第
三款應改之語當遵與北京商辦前電各款彼此推敲

既久大致已無甚出入擬俟議妥一面咨報一面具奏緣洋人性情知係奏案始無翻悔而核定之權仍在鈞署鄙意此事早定一口卽早收回權利關係大局非淺也成效

光緒十七年正月初二日遞北京

總理衙門英允設香港領事新嘉坡總領事轄各島此次易商因望喀城設員先示睦誼已咨明外部調左秉隆任香港黃遵憲任新嘉坡成現駐巴黎蕭

四月初二日遞北京

總理衙門密華使之說係外部見喀事難成自悔失其

把握疑我不顧交情託云港督謂華民不願顯示抵制
尙恐翻南洋各島全局英廷偵俄之謀甚亟將以全力
赴之再三理論始允左黃仍住港坡猶謂試辦一年再
定實卜喀事也昨勸電止華使告以或暗許設員明認
爲遊歷常住人員或俟俄約修定後再議尙無復音准
照尙未發請電示左黃奉 旨日期以便請發文憑
交犯俟設領事後另議章程曾侯前議實關大局不僅
香港惜回華中止應否重理前說諸侯電示成蕭

四月初九日遞北京

總理衙門密承示兩罷作收束細思喀事發端在先港

議在後。事屬兩起。則港罷喀不罷。權仍在彼。港議成於英。示睦誼。事固有領情爲相好。卻情轉生隙者。鈞署統籌全局。不欲徇英招嫌。亦不值代俄任怨。使臣在洋。賴鈞署扶持。方能辦事。港議倖成。而鈞署飭罷。則使臣前說爲誑。外部從此難以辦事。諒非鈞署所願。外部前文所允。若果作罷於彼。亦無體面。昨執原議。詰其不應將港喀兩事牽混。微露港事無足重輕之意。理論數日。已電飭華使勿阻港事。此事華使忽生波折。費盡氣力。以辦妥。港員爲收束。儻彼仍提喀事。可以談笑磋磨。允否權在鈞署。若奉

旨後無准照請惟使臣是問一年之說外部言明實係常局但使年內華民無事決可接續此係爲港督前議轉圜昔新嘉坡亦由暫而常幸釋疑慮成佳

六月初三日遞北京

總理衙門密有電謹悉已詳告英法外部均無異辭辦理認真不過如此惟思滋事地廣恐有會匪鼓煽愚民可憫會匪可誅自治之道拿匪不得不嚴亦卽杜彼族之口成肴

六月十四日遞北京

總理衙門庚電謹悉教案已誅四人辦法無以復加昨

告外部以華使苛求過急非以靖變正恐激變外部然
之稱將電止華使云成寒

七月初二日遞天津

中堂李請轉總署密法外部以閩蜀等處又燬教堂大
局可慮稱已約英德兩國調兵自護聽巴蘭德調度等
語意在合力觀變似應飭各省格外嚴防杜彼藉口速
結前案免彼勾串一氣成蕭

七月十七日遞天津

中堂李請轉總署坎巨提事詢外部據云克什米爾王
築一礮臺近坎非侵坎聞俄兵攜精槍礮游獵帕米爾

相機覓地請電飭喀什噶爾道留心邊界但派人問有無護照彼自知我境成篠

八月十三日遞天津

中堂李海部因添船趕練不暇旁收華徒琅威理宿嫌未釋教案迭出彼怪北洋不派船巡江爲漠視馬現向外部轉圜候回音成江

八月十七日遞天津

中堂李請轉總署寒電分告英法慶常稟稱法外部云接滬領事電各口西人朝不保夕各使謂中國疲玩成習煌煌

上諭視爲具文。口舌難爭。擬卽絕交。會商各國。爲自全計。又送節略。謂中國如無嚴厲痛切辦法。難再顧睦誼等語。探各國有添兵船。分據商埠之議。俟再出案。卽下手。英外部於登岸耀武。持之甚堅。且謂各埠暫安。賴洋輪保護之力。此權一失。後患無窮。可否再電飭各省。悉力保護。有教堂處。暫紮哨勇。多派兵輪。分巡要口。查禁匿名揭帖。前奉

上諭。再飭徧貼。聲名不准刪節。處分最遲延者一員。力任保護之權。隱寓自強之計。新酌定電示。以便答復外部。成錄。

八月十八日遞天津

中堂李請轉總署告法外部懲犯効官卹償三事已辦到尙何求彼欲我力任保護告以保護本係中國責任彼謂如此自妥允電李梅和平商辦梅卽到稍加聯絡可就範篠電所陳與其待彼催迫不如由我自辦兵輪無事現正合用派巡要埠顯示保護隱寓防制亦杜彼自護之說俟不再滋事洋輪漸退可與議善後章程成嘯

十一月十三日遞北京

總理衙門英報緬甸英兵進驅華兵對放空槍不早割

界恐肇釁請電催滇帥速查復措注爲妥成元

十二月二十三日遞北京

總理衙門真電告外部據云須告知英兵實到何地方
能發電滇帥指出地名惟邊界不分卽電緬督亦恐多
爭執宜速定計咸漾

十二月二十四日遞倫敦

使館張馬清臣意欲趁此索問野人山地甚合鄙意望
速照辦薛

十二月二十五日遞倫敦

使館張如能辦到野人山劃歸中國總署必甚合意俟

有眉計當電總署請清臣儘力辦之薛

光緒十八年正月初一日遞北京

總理衙門細思滇邊小地名查亦無益野人山舊案應歸中國作天然界劃去之則滇日蹙卽力爭滇不分界難通商華使嘗試請堅拒梅生罰太輕卽查英律力爭成東

正月十一日遞北京

總理衙門梅生斷罪太輕難以警後已照會外部請告華使以示一氣觀見事法外部云年例在邇擬聽巴蘭德等會商成軫

正月十九日遞北京

總理衙門咸電詰外部據云英兵修路通至礮臺坎酋合那夏爾攔阻英兵攻之坎酋出奔揚言借俄兵恢復印督以坎酋弑父虐民不能還議立其子尙未定鈞署再向華使堅持或辦到成皓

正月二十四日遞北京

總理衙門養電遵詰外部似疑我置帕米爾度外乃先動手告以在帕立界牌修礮臺派兵巡歷彼欣然稱立電印督妥商回覆又云我受坎貢甚微無管轄權實非屬國合先聲明復與力辨彼始無言成敬

二月初五日遞北京

總理衙門派員會同說彼國戊子年華使照會早聲明坎事當時並未駁回中國向不營坎事今忽欲管未免多走一步旋聞印督回電願存坎而立其子外部並不來告及往詢則云因有續議難於回音大有并賴前議意俟晤沙侯再力爭成微

二月十六日遞北京

總理衙門英人狃越緬前樣不願我預聞坎事殊難以口舌爭現始允我派員會立新西後不爲例恐其翻改不得不見風收帆允以此次由彼請我派員後來查照

向章辦理惟派員宜速免彼以不及久待爲詞須電喀道派員尤捷成銳

二月十七日遞北京

總理衙門巧電悉卽照會外部定案告以華員未到以前不得說出所立人名後不爲例另有說已函達請暫緩辯免翻全局成皓

二月二十四日遞北京

總理衙門華使臆說請勿認所論此次派員會立其尋常繼位是否由喀派員應查向章派則仍派否則難援此次爲例若非常之舉必須會商中國貢金賞緞如舊

員未到。不說明一節。彼允電印督。初議立子。因坎酉掣家出奔。乃言明選其兄弟子姪。難豫定人。現與言立子更好。餘函詳。成敬。

三月初十日遞北京

總理衙門屢爭滇邊事。外部送劃界節略。內有數端。已先指駁。並寄呈。儻華使來議。請答以俟。做處寄到再談。以免兩歧。成蒸。

三月十四日遞雲南

督院王現與英爭論野人山地。責令退兵。外部避之。忽閱新報。永昌騰越官出示責罰野人。不應阻止英兵。英

必藉此盡踞各地進佔滇邊。敝處難再開口。請電飭速收前示。查明出示之官。顯加處責。或稍補救。候電復成願。

三月十五日遞北京

總理衙門現爭野人山地。責令退兵。彼已辭屈。忽聞新報永昌騰越官出示嚴責野人。不應阻止英兵。英必執爲進佔滇屬土司案據。敝處難再開口。請電飭速收前示。查明出示之官。顯加處責。或稍補救。成咸。

三月十七日遞北京

總理衙門坎事早定。靜候選定新酋信息。怕事值外部

上卷之片 卷一
放假俟兩旬後開議成條

三月二十二日遞北京

總理衙門英接印電擬立坎酋第摩韓美德拏星爲酋據云喀道亦函薦之請電飭員赴坎成養

四月二十一日遞北京

總理衙門會立坎酋事外部文詢派員官銜姓名請電示以便照復成馬

四月二十八日遞北京

總理衙門英廷已飭駐俄英使與俄外部商議帕事須各派員赴帕察看再告中國會議此事在我干係已輕

儘可俟從容商榷而著重尤在俄國滇界事如交敝處
先議大略規模儻華使照會到署請答以已交敝處詳
復外部且趕商數月希冀爭得數分稍固滇邊歐使到
京此間恐難著力成儉

五月初六日遞北京

總理衙門漾江電敬悉。帕事英俄先自妥商再定滇界
事外部甫答文堅韌不讓。緬督半月後來英。外部須約
使署與印度部及緬督會議一次。當露端倪。成魚。

五月十六日遞柏林

中國欽差許接總署電云。帕地非界內。是屬地。詳載西

域圖志四月致竹使函繪圖錄說可備辨論希向竹使索觀此局不定後慮正多德館歲稅事不速覆巴使屢催詢希電竹使商定迅聞成轉電

五月二十日遞北京

總理衙門新疆巡撫派盛令會立坎西微嫌官小如速電派參遊等員尙趕得及或電准盛令暫照知府銜行事亦可候電示再照會外部成號

五月二十二日遞柏林

中國欽差許總署電云請轉電竹使轉疆撫會立坎西英已知派張鴻疇不便改員盛令官小不足爲國重請

仍派張往隨帶二三十人不可再多英定閏六月會立
宣速往馬格理之子在喀通華英語張可帶往本署今
日與英使商定成轉電

五月二十三日遞北京

總理衙門阿富汗奪蘇滿卡外部謂我未先將欲守帕
地之意告英致有此誤俟電查明白送回信惟我既勢
成騎虎擬催令電飭阿酋速讓此卡再候三國會商西
事日多音信過遲似宜速展電綫由肅州至烏魯木齊
成漾

五月二十五日遞柏林

中國欽差許總署電云。漾電悉。俄使來言。俄因我不肯
撤邊外卡。將派兵進紮穆爾格阿布河。據理力斥。始允
電告本國。以阿兵佔地告之。彼不甚在意。三國不佔之
說。據云本國不以爲然。但允勘界。現若促阿退兵。慮俄
進佔。英又有詞。此事只可以三國分地爲歸宿。試與英
相機商之。並轉竹使設法辨論。一面電喀城。告以俄兵
如進。不必驚慌。不可生事。俄固謂非來尋衅。新疆電綫
已撥款興辦。成轉電。

五月二十七日遞天津

中堂李。請轉總署。已告外部。蘇卡交阿兵暫守。勿讓俄

佔各不佔之說難辦到三國分地事較易商惟須延時
日且著重在俄成沁

六月初一日遞江甯

洋文

督院劉因梅生監期將滿出監之後不可令其逃逸是
最要緊請飭上海道與担文相商速報英按察使梅生
之罪一通會匪二違例雇人三偷運禁貨儻按察使不
允審辦卽請軍機處發諭此間正在與外部爭論此事
洋文原電示英律師担文渠自能知如何辦理以上辦
法尊意以爲然否請電示薛

六月初二日遞北京

總理衙門。滇界事設法磋商。漸有轉機。惟外部有換人之說。又須閱月。方能會議。約計秋間當有端緒。擬請豫電滇督。派員先查野人山地。現可不必秘密。彼知我往。查明白。則於各土司犬牙相錯之地方。不敢圖朦混。成冬。

六月初三日遞柏林

中國欽差許阿部佔帕地。請速告俄人。俾出理論。以資牽制。成江

六月初五日遞天津

中堂李。請轉總署。冬。電詰外部。已電阿酋清理。據云兩

旬方到。今擬商外部。飭阿賠禮。並償卹布回。雖難盡如志。必如此。方得體。且可早釋布回。候電示。並請電疆撫。查布回受虧情形。成歌。

六月初七日遞北京

總理衙門。外部來信。印督定閏月廿三日會立坎酋。由喀至坎。須兩旬。因陶撫有改派周折。未知趕得及否。成虞。

六月十二日遞北京

總理衙門。賠禮償卹已告外部。彼云俟飭阿戢兵。釋放回戶。再議越南身稅事。擬再辦文催法外部。請尊署亦

日傳公牘
催問李梅彼於鐵路等事無罅不尋無理取鬧今我按約應論之事豈可聽其推宕梅生罪名英聽律師之言堅不就範擬再辦文與爭一面電南洋設法勿令釋放以上二事雖難收速效亦可掣其他事之勢會立坎齟禮節外部云英使居中我使與克什米爾使在左右昨與力爭彼允我使英使爲一班左右各便克使居後議定後擬由此間函告喀道尙趕得及成文

六月十五日遞江甯

督院劉梅生事外部來文謂尊處已愜意不允加罪釋放期近爭辨俱窮仍留中國爲患可慮英例已定之罪

難再議前電三罪係在原控之外或一二罪亦可外部已露允辦意謂難照辦恐係洋人相護之習若明言出鄙意徒授洋人口實且難辦到請以尊意電飭滬道招狀師報英按察使上控英廷此間方可再爭否則請示難辦緣由以便電覆總署由此罷論成

六月十八日遞江甯

督院劉電悉招律師上控權在我祈速辦成勿告領事免掣肘成

六月二十四日遞江甯

督院劉英領事電外部云律師已告華官謂控梅生證

山修公牘卷十一
據不足可見彼聯一氣亦畏我再控如担文不遵可由
道臺照會領事以偷運禁物違例雇人請其報英廷審
訊勿再提火藥案外部雖允驅逐梅生然難以儆後現
擬辦文再爭無論效否暗中有益成

六月二十八日遞北京

總理衙門俄廷密告英使派兵巡帕無據地意秋初卽
歸但冀忱華兵全退亦不尋釁梅生將釋外部謂原控
炸藥罪止此我前受律師騙控輕罪今又在滬阻再控
請電南洋飭滬道以偷運洋鎗等罪照會領事卽可再
爭成儉

閏六月初二日遞北京

總理衙門滇事照會外部據云沙侯去留未定難速答約計兩旬後外部事定當可開談會立坎曾已展緩一月成冬

閏六月初四日遞北京

總理衙門二月間咨呈滇邊事祈查文中薩洞納地及鄂刻一統圖古勇士司地請滇督電騰越官查二地向歸中國最近實據電復半月內盼回音儻到會議此事得實證則全局皆振否則恐失勢成支

閏六月初八日遞喀什噶爾

道台李會立坎酋已展緩至西九月二十五卽中七月十五盛張二員已過喀否有一訂明禮節要函託英外部徑寄棍雜城薛倫敦

閏六月十二日遞北京

總理衙門英接阿富汗酋回信據云不知前事卽飭阿員查釋布回梅生已逐出華境昨發照會與外部綜論前事完案成文

閏六月十五日遞柏林

中國欽差許俄兵分三隊入帕聞在蘇滿與阿兵爭鬪其靠東一隊似已軼入華境尊處所聞如何請示成咸

閏六月十五日遞北京

總理衙門客臘接眞電騰越西北土司報英兵遊邊外
報者有昔董土目否亦可作屬我之證請電滇督查示
成咸

閏六月二十七日遞北京

總理衙門今日外部新舊交替領事調兵船事外部深
爲詫異允立電華使查覆請先以違約擅動詰責華使
俟外部接覆音再與理論成沁

七月初五日遞北京

總理衙門華使覆外部電多支飾其分別在兵船多少

兩船則近挾制一船則資乘坐所以須得領事函件爲證則華使他語皆虛竊意船若入湖可以爭令必撤今空詞易狡賴恐難如志然此等事須與切實理論亦可做後外部謂撤領事事俟華使覆文核辦恐華使必有捏飾據電稱領事僅擬帶兵船一號而鄂電云二號請電鄂檢該領事函件寄來作證尤妙成微

七月十三日遞北京

總理衙門現爭昔董事甚急外部疑非出鈞署意請面催華使速催英兵退出昔董以示內外合志成覃

七月十八日遞北京

總理衙門滙事會議兩次告以昔董撤兵中國自能保護商旅請再乘機嚴催華使可裨全局又華使電外部云撤領事似非出署意日前有此一著華使隱爲奪氣今雖不催速撤請告華使前因領事謊稱英廷令調兵船所以電使署商撤否則外部見疑恐妨他事成號

七月二十八日遞北京

總理衙門屢催昔董撤兵外部忽造停商之說冀聳聽聞足見氣餒擬請堅持似卽就範昔董退則滇西土司皆安界務迎刃而解請告華使以地卽非中屬敝處所爭別有道理英不能不認而況早經收撫成儉

同日遞北京

總理衙門昔董亦野人山地英去昔董必退至大金沙江以西方可劃江爲界以保固諸土司乙酉舊議英雖滅緬而野人山地數千里本非緬屬勘界時須兩國均分夏間向沙候申此議沙云頗有道理今爭劃江爲界英自無詞因江以西野人山地尙贏兩倍也成儉

八月初五日遞北京

總理衙門請電滇督急查電示昔緬甸在大金沙江東岸轄地逾八募以北尙有多少里至何地爲止華文地名及土人譯音並須詳示再緬盛時於何年管過昔董

否成徵

八月二十一日遞北京

總理衙門圖說盼切昔董駐英兵各土司終不安英廷
謀議已轉若不索昔董更可速了但關係全局敢不慎
重成馬

八月二十七日遞北京

總理衙門滇帥電俱悉聞穆雷江左右從前野人設卡
以拒緬甸須查此卡所在地名詳示華名及土音並距
八募若干里可作實證請電騰越官向滇商查詢必得
梗概雖回電稍遲目下英漸轉圜能備而不用尤妙成

沁

九月初六日遞北京

總理衙門外部於滇事口氣早鬆卻以英廷審量爲辭未答實信或慮其密屬歐格訥到鈞署試探消息再作翻騰歐使攜去滇緬圖說甚多轉瞬到京儻來嘗試恐中外持論稍歧授以罅隙擬請鈞署但催昔董撤兵且告以諸事交敝處在英商辦無須置議彼計難施當有結束法外部屬李梅商辦數事滇殺教士如果確實自宜迅速查辦所云華匪越界近於無理取鬧似應嚴斥問答節略卽寄成魚

九月十五日遞北京

總理衙門英之印度部及邊吏壹意佔地貪多無厭昔董駐兵勢必誘脇土司窺伺滇境外部尙知大體顧公法惟總疑懼昔董撤兵及索劃野人山地非鈞署本意密屬歐使到署磋磨冀可俯順邊吏之意或圖另索利益此策不行方肯與敵處了結乞賜始終主持告歐以前兩端實國家之意但已責成敵處商辦無須多論滇事可速就範成感

九月二十二日遞天津

中堂李滇界事將就範惟歐格納過津或進異說冀相

牽掣請勿理成養

九月二十七日遞北京

總理衙門頃赴外部催滇事確知專待歐格訥電信始肯回答歐磋商之法或借別項難事繞到滇事請答以事須各辦勿容牽混外部又論湖南揭帖告以必切實嚴防互全睦誼成沁

十一月初八日遞上海

道台聶請轉滇督王外部鈔送張鎮鄒守等二月十三會銜告示嚴拒野人爲昔董不退兵之證致諸事難爭可否暫撤張鎮或記過以明告示非國家意俾資辨論

成齊

十一月十九日遞天津

中堂李。儉電諒蒙鑒核。請轉總署滇緬真界。悉照滇圖
界綫議定。無甚出入。今所爭論。惟擇人野人山地。暨昔
董退兵事。已彼此稍讓。成皓。

十一月二十六日遞北京

總理衙門。滇事議到八分。外部微允野人山作甌脫。印
督不遵。忽派兵赴息馬。攻野人。以逼滇邊。請鈞署向歐
使詰責。何以昔董未退兵。又紮營息馬。外部隱願我嚴
詰。可轉詰印督。此事了則全局定。成宥。

十二月初四日遞北京

總理衙門印度部蠻橫又停商界務據云俟征服野人再議既以護商爲名擾我息馬現又派兵赴近蓋西之開社請告歐使彼停商非理不俟兩國說妥擅派兵更非理若不速退我亦須派兵赴我應分之地保護華商外部已示意我愈嚴詰彼可爲力滇局安危所繫祈鼎力主持再彼稱中國向不重邊務又狃春間騰越鎮廳告示恐漸肆侵占請電滇帥籌整邊防多偵確信電達鈞署謹候電示成支

十二月初五日遞北京

總理衙門爭野人山地非期得地期立妥約保滇疆外部願速了印度部有窺滇意以數十年前事揣測鈞署及滇帥昌言無忌鈞署滇帥示以力爭不讓彼自奪氣外部可用力必速了此則竹使議怕事亦有勁少阻礙成微

十二月初十日遞北京

總理衙門印督恃強嘗試恐漸窺滇事機緊要已赴外部爭論告以中國眾議亦須派兵赴野人山地保護華商以符公法外部允與印度部妥商如歐使來探請免答辭兩歧成蒸

十二月十三日遞北京

總理衙門齊電甫到野人地息馬亦非緬界請駁之否則彼據爲默許之證外部固與印度部一氣仍視鈞意鬆緊爲進退祈鼎力堅持屢請英速退兵議定界務再治野人彼答安商似候歐使密電者蒸電所言英廷頗顧慮亦請微諷歐使成元

十二月二十三日遞北京

總理衙門齊電催外部允訂期商議惟英廷稱鈞署意和平使館認真過分請再催歐使電印督撤兵以示辦法一律成漾

光緒十九年正月初九日遞北京

總理衙門有魚電悉仍請堅持騰越八關除漢龍淪於緬外黃楸材日記謂天馬亦淪緬滇圖尙在綫內又滇圖銅壁在紅蚌河內洋圖在河西英廷方爭紅蚌河爲界謂華使曾向鈞署說過然恐失去銅壁請電滇帥再將二關實址電查速示成佳

正月二十九日遞北京

總理衙門昨英廷允自金沙江東至中國老界作爲兩國甌脫又在潞江左右稍讓我地我旣體面亦可風示俄法次日印度部忽將讓地事翻悔外部願調停依原

說現正候信請告歐使國家總盼金江以東盡爲華界
必有益成宥

正月二十九日遞北京

總理衙門印督有窺滇意必欲全得野人山故翻甌脫
之議成知其叵測磋商半年彼尙枝梧請告歐使廷意
必欲以金沙江爲界則此間可辦到甌脫議院方責英
廷不應徇印督意與中國齟齬擬請申派兵護商之說
辭雖嚴必無礙合龍在旬內一失此機恐又拖延成豔
三月十二日遞北京

總理衙門密外部允潞江左右各讓一地滇西老界連

野人山者悉展出十六里作我外障惟昔董大寨未在内姑向索之據云電商印督卽有回電鄙意得昔董固妙不得亦擬了結以杜變端惟彼有願商鈞署之言恐其復悔前說希圖翻去萬一歐使來嘗試想鈞署自有權衡成文

三月二十五日遞天津

中堂李請轉總署密滇事磋商已久彼堅不認曾侯前議又謂新設威邊廳係卡瓦舊地與車里孟連兩土司向均入貢於緬索爲兩屬緬官又以照約入貢爲恥隱圖狡賴外部被印度部牽制動輒停商殊覺計窮力竭

惟印度覬逼滇疆意甚叵測。此次分界若不稍展拓。無以折彼隱謀。兼啟他國窺伺。賴鼎力始終扶助。伸金沙江爲界之議。彼有所憚。漸就範圍。頃外部來文。據與印督商定。孟定橄欖坡西南邊外。讓我一地。曰科干。抵潞江左岸。凡七百五十英方里。又自猛卯土司邊外作直綫。抵潞江麻栗壩之對岸止。悉劃歸中國。約八百英方里。又久淪於緬之漢龍關。勘界時可歸中國。至展出野人山十六里一層。因山河形勢。未能畫一。印督又稱昔董野人最悍。失此則彼不能彈壓。堅不肯舍。現議以野人山地之息馬。及其迤北迤南歸中國。約三百八十英

方里彼此較易分守。又允我收回車里孟連威邊全權。自後與英無涉。又允飭緬員明年呈進方物。查展地皆係靠邊較易控轄。其餘分界可悉照滇圖界綫。似此收場。雖稍變換。曾侯前議尙足與三端相絜。明知荒地無益。必稍有所展。一杜各國輕視。二窒印度狡謀。三護滇邊土司。四免彼勘界時侵境。正定議間。歐使謬稱威邊地實兩屬。寄到證據。外部又來文索取。惟據密稱成議在先。若速了結。以便兩國派員。歐說仍可罷論。彼族異常黠。勒刻思乘機翻悔。歐使又暗中甚撓。事機呼吸。應否摘要先呈。

御覽電示機宜。迅與定局。杜彼狡變。一面由鈞署奏陳。敝處亦具摺詳奏。並與外部商訂條約。通商章程。擬草後當再電再奏。約三四箇月可了事。前論分界。索彼已得之地。故難今議通商。歆以可獲之利。故易。八募開埠。係商務中事。隨後再議。惟新任請簡。逾期到洋。必在滇事全了後。懇速定。再由古勇經高隴瓦城至昔董大寨。其間尙有何地。及靠邊地名。各地相距里數。請電滇帥查示成宥。

三月二十七日遞北京

總理衙門。英廷允還漢龍關。惟華名土音歧異。地難指

出實據云若在猛卯土司東南必還否則難定查漢龍關土名宛定金養近猛卯城隔瑞麗江請電滇帥電騰越派員同猛卯土司查勘確實電示先與外部證明免勘界時受彼朦混成沁

四月初七日遞天津

中堂李請轉總署條款大概不出前意惟須互爭字句或與商務並訂非三四閱月不辦約既定事卽了矣新任簡放後非大半年不到孱軀難於事了後再待半年乞賜體卹簡新任與訂約本二事若合併爲一恐心緒忙迫轉致貽誤私志不以難事遺後任現與外部說明

日修公牘 卷十
不因放後任而變卦。惟歐使來探。宜渾示不滿意耳。成
虞。

四月二十一日遞北京

總理衙門。滇帥前電。稱天馬關被野人占跨。今外部稱
此關早歸緬屬。木邦土司管轄。請電滇帥查詢。若僅屬
野人。尚可爭回。果入木邦。勢必歸英。如另有可爭之鐵
據。亦請電示。成箇。

六月十七日遞天津

中堂李。寓暹華商稟求兵船保護。英德等國皆添船護
商。華民在暹尤眾。請派兵船赴暹海口。隨同英德等船。

進止最妥。可慰輿情。尊國體。若須入口。中遲向無條約。可告駐英遲使。電知該國。隨後再議。成條。

六月二十二日遞北京

總理衙門。法脅遲羅。割瀾滄江東岸地。與滇接壤。外部屢催分界。應電滇督。勘查。非可猝議。外部告敝處。願不稍侵滇屬土司。彼因遲事未了。措詞和順。宜仿英廷辦法。由使臣請外部。依言寫立憑據。如此雖一兩年後。議界無妨。若遲事大定。彼必漸生覬覦。或致棘手。立據一節。擬請先告李梅。再由敝處試辦。萬一未能辦到。應早由署與李梅妥議。以弭後患。成養。

六月二十六日遞北京

總理衙門遲已割地議和查車里有四城在湄江西八城在湄江東法所覬者東八城也法印地圖將東八城繪入法界敝處詰之外部自認錯誤英以車里歸我明知狡計然會典一統圖及滇督來圖皆隸滇境斷難一旦棄之法人現詢英廷英願助我作證現商所以答法人者俟中英條約刊出更多一重公案矣遲尙自主土司貢遲與法無涉請將與李梅所論詳告仰蘧星使以便內外交洽成省

同日遞北京

總理衙門車里屏蔽滇南關繫形勝李梅朦混駁之甚
當似應明告李梅俟滇督詳覆再與妥議洋圖購寄成
宥

六月二十七日遞北京

總理衙門細思李梅意甚狡外部立據不過聲明車里
所屬十二城在法國權利之外雖難辦到請姑試之順
則旬日必成日後免大爭論不成則知法謀不善可由
署速與李梅議界今但請告李梅已電使臣與外部先
商大概規模便可著手成沁

六月三十日遞上海

道台聶請轉滇督王界務將竣惟印督繪圖虎踞關在南碗河東冀蹙我地儘力與爭外部謂指明實址即可更正請電派騰越一員督同該關撫夷親履虎踞關查明四至近地里數並土音名目卽攜電報新編赴八募速電做處並報明住址如再不信可由外部電八募英員隨我員赴該關一觀成

七月初五日遞北京

總理衙門中國稱車里爲十三猛洋稱十二板納卽十二城也然屢次遷徙要地已多更改法刻地圖將車里及普洱邊地劃入法界前詰外部據認不足爲憑問答

節略已寄照會提否請酌成微。

七月初十日遞巴黎

中國使館慶接總署電近已照會法使云中越兩界孟賓爲止其西係雲南土司所屬十三猛地方若由孟賓沿暹羅而抵湄江須向南轉西繞過車里邊界並非一直向西來圖不符俟滇督查覆再商應先聲明法國欲由孟賓通至湄江自無不可惟車里土司所屬界內不許法國侵及亦不得稍損中國權利法暹界務中國亦不與聞庶免辯論而昭睦誼請電達外部候覆等語希將此意再照會外部卽請照擬洋漢文彙待發薛。

七月十一日遞上海

道台聶轉滇督仍請電騰員速赴八募以虎踞關址告英員已請英廷電八募官接應不如此則爭不明白成

七月十八日遞上海

道台聶轉滇督查虎踞關在邦杭山天馬關在邦欠山如兩關久地請查明邦杭邦欠山實址亦好邦杭離漢董尤近請查相距里數成

七月二十五日遞北京

總理衙門磋商數月界務已竣又索得英前駐兵擾邊之漢董商務已論明大意現擬約款並先疏報大概情

形成有

七月二十七日遞上海

道合聶轉滇督已告外部候滇員赴八募虎踞東至南
碗河西至孟威西南至益干天馬東至南蓋各若干里
查出尤妙成

九月初十日遞上海

道合聶轉滇督騰員尙未到八募悵甚英廷接八募電
稱滇官飭南莫江外緬屬之毛秀土司勿完英官賦稅
又因華官將到飭緬屬益干土司辦差憤甚幾至決裂
蓋虎踞天馬英早據之今既查出彼始悔前誤許還我

每欲借端尋隙。請飭邊吏切勿生事。以便索還兩關。若毛秀益干有屬我鐵據。亦請電示成急。欲定約赴法。并交卸。專候二關消息。若不妥協。祇可於約內聲明。二關俟勘界時再定耳。成。

九月二十二日遞上海

道台聶轉夔帥。委員久不到八募。恐墮敵計。請電催督。十月十二莅八募。台端如發電。由騰送八募。聞好。更聯交誼。成。

九月二十四日遞八募

中國委員與英員格外聯絡。望詳示虎踞天馬關情形。

能探明漢龍關實址更妙薛

九月二十七日遞北京

總理衙門法外部告敝處願保全暹羅自主之權湄江東岸暹兵退淨條約照行法必退兵然後再議保護據又云現與英議車里南界外局外之地俟議妥讓歸中國管屬英廷送節略亦願歸中國查此係難得機會英法暹皆不能管惟中國受之可息爭端有利無弊車里格外穩固西南兩面以湄江爲界勘界時更省事中國聲望亦愈隆矣不受則反多後患聲望更損英人又稱得我隱助事有轉機願與中法同約保護暹羅此亦不

費之惠成沁

十月初八日遞北京

總理衙門。商界約彙可定。因虎踞天馬兩關。滇中不知其址。難以懸寫。英電邊吏會滇員往勘。兩旬後得報可定。英擬保遲約彙。由歐使送署。如何商核。請示大意。辭行。國書祈查電核發成齊。

十月二十八日遞北京

總理衙門。英外部稱湄江東岸甌脫。最要緊者東面。須以南瓦江卽大宣河爲界。方與法人界畫分明。車里等處自然穩固。卽勘界亦甚省事。請與法使言之。成宥。

十月二十九日遞新嘉坡

中國領事黃洋藥新章速遵辦圖補救巴西招工數百人迹近拐販望嚴查截禁薛

同日遞北京

總理衙門條約將定先陳大意除分界妥照前議外一英人本謀由野人山通西藏惟怒夷以北人迹難到無從查勘恐受彼朦混誤分藏地關係非輕現與爭二十五度半以北暫緩劃分一八關內之虎踞鐵壁二關今始知亦早被英人占踞賴有成議在先彼難遽翻俟英員偕滇員勘確卽有來電當可劃還一彼堅不認曾侯

前議而大金沙江行船補益全局。磋商半年已漸答允。一八募設中國租界及稅關尤關重要。力與爭論。據云可商。一英人恥居法後。援天津法越條約。謂法添龍州。蒙自。蠻耗。領事三處。亦欲設雲南。普洱。順甯。三領事。爭論久之。現議我在仰光。彼在永昌。互設一領事。英人意尙未愜也。一法越條約。陸路通商。進口稅比海口減十分之三。出口稅減十分之四。現因英人欲與法一律。方設法翻騰。與議正子稅並交。每貨值百兩。交稅七兩五錢。任入內地無稅。如此則稅數不減海口。若英必不允。祇可仍照越約。一現議華貨運緬。英關概不收稅。似於

華商有益以上皆係大端如臨時小有變動亦擬通融了結其餘照舊約通行之式彼此無甚出入俟定全約卽電陳成豔

十一月初三日遞北京

總理衙門前向英索還久淪於緬之漢龍天馬兩關英既允許其餘六關閱滇圖皆在滇邊英人亦無疑義今英員滇員會勘虎踞關址在極西已屬緬百餘年深入敵境四五十里英人屢加工程勢難索回又不值因一處而礙全局天馬關內亦有英兵修路一條現將定約應否留出一款聲明此段俟滇督與英員細勘劃分抑

或兩邊相讓擬定界址一了百了以省後來軼轢請電
詢滇帥示復成江

十一月二十五日遞森彼得堡

中國欽差許署電述尊電英允讓俄小帕米爾頃請外
部據稱俄使送節略內云俄不越小帕山嶺並無小帕
歸俄之說且英祇能自顧界限界外卽非所問小帕旣
在中國界綫當自向俄爭論非英所能代爭添兵畫守
東南一節亦與節略相背等語鄙意俄人假託嘗試固
在意中似當辯證明白勿受朦混爲要成有

十一月二十六日遞北京

總理衙門小帕事詰外部據云本非英地英自不能管
非讓與俄中國可自爭勿受朦混添兵畫守亦無此說
等語已電許成宥

十一月二十七日遞森彼得堡

中國欽差許節略云俄人蹤跡至小帕嶺北爲止想係
渾淪言之因非英地英亦不復深求但絕無讓地一說
成沁

十二月初十日遞柏林

中國欽差許已遣清臣與英外部商小帕之地外部似
願意另函達成蒸

十二月十三日遞天津

中堂李請轉總署滇緬約已竣卽電呈英俄劃帕界小
帕米爾已歸英綫昨商英廷可將小帕劃與中國據云
俄不能阻如得小帕中國面子已好祇須與俄商定西
界帕事較易了惟英俄約將定稍遲便難商速商則旬
內可定應否與議請呈 御覽候 旨定奪成元

十二月十六日遞柏林

中國欽差許總署電云元電悉英願劃小帕與中國實
爲兩益趁此機會如能將南界議定則西界專與俄商
較易措手應卽與妥商並將辦理情形告許遵 旨

電達云成銳

十二月十六日遞天津

中堂李請轉總署英劃小帕西界瓦罕南界大山大約
無甚可議惟我如失阿克塔什塔克敦巴什則小帕爲
俄所隔須力爭此二地則西南界皆定矣寒電詰外部
據云不在我境印督爲不讓虎踞關作勢今既了結當
可相安成銳

光緒二十年正月初六日遞天津

中堂李請轉總署滇緬商約以磋商入募設關大金沙
江行船一事稽延半年均已就範正將電呈印督忽復

翻異所索過奢有萬不能允之事印督跋扈外部無權
事之難辦在此祇可刪去八募設關以杜狡謀並限制
其領事及商路滇境亦不開埠但設邊關茲將商界廿
條撮要電呈惟地名煩碎祇約舉大勢一兩國界綫自
北緯廿五度三十五分北京西經十八度十七分岡尼
格山起隨山脊西南過薩伯坪峰湖南太白江以昔馬
歸中國又溯穆雷江東南溯旣陽江順南奔江卽紅蚌
河入太平江二溯庫弄河南經洗帕河以鐵壁關漢董
歸中國循山脊至南碗河向西南轉東南溯南莫河西
以蠻秀天馬關歸中國東溯瑞麗江至孟卯又天馬

關北有大路除華民行走外可借與英人行走亦許修路護商惟英兵過路不得逾二百名廿名以上須行文知照三自孟卯向東南約劃一直綫至麻栗壩過潞江以科干地歸中國曲折向東南至瀾滄江四北緯廿五度三十五分之北俟將來查明情形再定界綫五英國允將車里孟連兼屬緬甸之權均歸中國惟訂明中國必不將車里孟連一小地讓與別國六勘界官限定換約後一年內相會三年內一律勘定七劃界後八箇月內兩國各將越界兵寨退出兩國駐界之兵各擔保界內野人安靜無事兩國皆不在邊界三十里內建修新

舊礮臺八英國於華貨入緬緬貨入滇除鹽米外六年內概不收稅九凡出入滇緬邊界之貨祇准由蠻允蓋西兩路行走暫照陸路章程減稅之數俟貿易興旺或當酌量添設邊關十各種鎗礮軍械軍火非經國家准購應禁販運出入十一緬鹽不准入滇銅錢五穀不准運出中國兩國洋藥土藥不准由邊界販運買賣犯者貨卽入官十二中國運貨運礦產各船任意在大金沙江往來行走與英國船一律十三中國在仰光設領事一員英國在蠻允設領事一員俟商務興旺兩國再商添設十四兩國商民赴緬赴滇可請蠻允仰光領事給

發護照十五兩國如有逃犯一經行文卽應設法拏獲
互交十六察看情形俟可以通電時將兩國電綫接連
十七兩國人民凡有權利均與相待最優之國一律十
八此約係中緬陸路應辦之事互相允讓而立如有索
問此權利者亦必有同樣允讓方可十九商務章程試
辦六年續議修改二十此約畫押後六箇月內在倫敦
互換立卽開辦以上界務則西南兩面均有展拓收回
車里孟連兩土司全權鐵壁天馬等關昔馬漢董等要
地商務惟大金沙江行船係我所得格外權利其餘多
仿約章通例而我獲益稍多雖八募設關爲印督所阻

亦已將繪彼權利稍稍撤去。惟各條互相牽抵稍有更動。恐掣全局。印督嫌外部讓地較多。至今耿耿。又恨未能在滇多設領事。力圖宕緩此約。則界址未定。門戶洞開。彼可相機占進。改訂條約。可否進呈請旨。俾速與外部畫押。以杜變端。既將滇事結束。方可開談。小帕前雖據滿口應允。似無枝節。然彼族善於翻悔。總以速定爲宜。鵠候電示。成虞。

正月二十六日遞天津

中堂李請轉總署條約已畫押。小帕商之外部願讓與中國。據云前告俄廷尙無回音。彼雖不能阻總須得覆。

方可互立約據竊思中俄界未定俄未必答英求之過急又恐啟英索報之意擬初四赴巴黎摒擋交代事務請俟龔使到後俾督同馬格理商辦必可妥協成宥

二月十二日遞天津

中堂李請轉總署法外部索熱河教堂賠款仍多曉辯已堅拒而詳曉之恐法使到京尙須饒舌成文

二月三十日遞北京

總理衙門英外部接印督電稱現方等候劃界滇邊華官不認向來界綫請我飭邊吏暫照常辦理俟行條約後再更動可免生事成卅

三月十四日遞北京

總理衙門英廷執辛丑年爲貢期屢爭始改訂今年旋自悔太早定滇約時不肯畫押要挾頗多姑允暫緩以免決裂彼懇代達鈞署答以無益彼云請而不允無悔是此事權本在我丙戌條約彼知難翻其覆文本不爲憑故作攪擾非其實意不足與辯惟滇約未換催之過急恐生他變最妙莫如由署允再展一年告以丙申年辦貢斷難再緩實尙早於原說五年此以鬆爲緊之法彼更無辭新任並不爲難成寒

六月初一日遞天津

由上海發

中堂廿八抵滬大爲紅海炎熱閩洋颶風所苦困頓殊甚休養旬日擬依原奏暫回無錫滇緬界約互換期在七月約本已否寄英念甚請轉總署成朔

六月十七日遞天津

由上海發

中堂日內卽擬回錫趕九月二十前到京不誤覆

命及

慶典成篠

往者無錫薛公奉使歐洲。嘗手哀公牘文字。命美翊爲之編校。總凡十卷。甲午之夏。使旋東渡。舟中無事。乃爲寫定篇目。當時惟書牘電報兩門。因風浪大作。未及選錄。逮抵上海。公積勞得疾。薨於行臺。事遂中輟。越三年丁酉三月。爲公六十生日。重至無錫。拜公遺像於堂。公子慈明以公牘原藁見囑。爲留數日。別錄書牘電報。俾竟其事。付諸手民。又明年七月工竣。乃僭書其後曰。昔孔子稱使於四方。不辱君命。而推本於行。已有恥。春秋戰國之際。羣雄競霸。聘問往來。尤尙爲命。蓋結好弭釁。端賴使者之一言。苟處事一不當。則辱亦隨之。若是乎專對


之重且要也。方今中外互市。時事日亟。奉使絕國。與古大異。自光緒初元以來。使者首稱湘鄉曾惠敏公。而公實繼之。公威重宏毅。學問識量異於人人。至其憂國如家。深謀遠慮。凡關繫交涉之事。與彼國長官相見。或應機立斷。意在必行。或往復辨難。務衷至當。退則考覽圖籍。稽核舊約成案。每論一事。申之以公牘。加之以書函。載以忠誠。而達以文辭。故當軸諸公。輒從其請。卽外人亦敬而服之。是編所載。如滇緬交界。南洋領事諸案。其所籌議。皆有裨大局。觀其辭命問答。委折美備。殆子產叔向之亞。若蘇張之流。何足以云也。美胡從公者久。知

之頗深。追論遺事。未敢多讓。自公薨後。東事益棘。朝廷咨嗟太息。深惜中道告逝。未盡其用。而憂時念亂之君子。私論且謂使公而在。當不至此。蓋其勲業。聲名。旣歿而逾彰。獨美翊志衰氣盡。學不加進。媿負知己。時用內疚。秋。海上極目無際。回憶當日印度舟中。侍公左右。上下議論。猶忽忽若前日事。因黯然流涕而書之。

光緒戊戌秋七月。門下士鄞縣張美翊謹跋於天津舟次。

051
1

1213130



21101000187846

上巻之目録

五